

## Universitätsbibliothek Paderborn

**Trismegistus Doctrinæ Christianæ Tertio Continuatus,  
Seu Brevis Expositio Sciendorum De Ultima Voluntate  
Hominis Christiani In Spiritualibus, Atque Temporalibus,  
Methodo Morali-Theologica concinnata, ...**

**Mayr, Cherubinus**

**Salisburgi, [ca. 1735]**

Distinctio Secunda. De Ultima Voluntate Hominis Christiani In  
Temporalibus.

**urn:nbn:de:hbz:466:1-42295**

# DISTINCTIO SECUNDA.

## <sup>DE</sup> ULTIMA VOLUNTATE HOMINIS CHRISTIANI IN TEMPORALIBUS.

**D**iximus in Distinctione priore hominem Viatorem in via, quâ ad patriam pergitur, & sufficienti bonorum spiritualium commeatu, ne in via deficiat, communivimus; nunc qualiter in bonorum temporalium derelictione habere se debeat, ostendemus.

### CAPUT I.

#### De Natura & differentia ultimorum Voluntatum in Temporalibus.

##### §. I.

###### Expositio Doctrinæ Christianæ.

Punctum I. Quid, & quotplex sit ultima voluntas in temporalibus?

H

RE-

**R**ESOL. I. Ultima voluntas in temporalibus genericè definiri potest, quod sit libera, gratuita, & legitima dispositio de suis bonis in tempus mortis. Definitio hæc colligitur ex P. Wiestner ad tit. de Testam. num. 1. & P. Pichler ibid. Dicitur I. libera; Nihil enim est (ait Imperator L. 1. Cod. de SS. Eccles.) quod magis hominibus debeatur, quam ut supremæ voluntatis, postquam jam aliud velle non possunt, liber sit stylus, & licitum, quod iterum non redit, arbitrium. Dicitur II. gratuita; quia institutio hæredis est mera animi liberalitas, quæ idcirco in arbitrium tertii conferri nequit, l. 32. ff. de hæred. instit. Dicitur III. legitima, id est, admensurata legibus, vel humanis, vel saltem Divinis, & naturalibus, de quo patebit. Dicitur IV. Dispositio de suis bonis in tempus mortis, ad distinctionem ultimæ voluntatis ab actibus inter vivos.

**R**ESOL. II. Ultima voluntas in temporalibus est quintuplex, scilicet Testamentum, Codicillus, Legatum, Fideicommissum, & Donatio mortis causâ. Testamentum est ultima voluntas, directam hæredis institutionem continens. Codicillus est ultima voluntas, in qua aliquis de bonis suis absque directa hæredis institutione disponit. Legatum est ultima voluntas, quâ res particularis, non habens rationem hæreditatis, liberaliter à defuncto relinquitur, alii ab hærede

præ-

præstanda. Fideicommissum est ultima voluntas, quâ Defunctus fidei sui hæredis committit aliquid alteri restituendum. Donatio mortis causa est voluntas liberalis, quâ quis intuitu mortis rem suam alteri in præsenti confert, vel promittit, ut morte secuta, ejus fiat irrevocabiliter. Harum ultimarum voluntatum differentiæ, licet ex ipsis definitionibus colligi possint, melius tamen patet, ubi de singulis agetur in particulari.

Punctum II. Quotuplex sit Testamentum? 116

RESOL. I. Testamentum prima divisione distinguitur in *solemne*, & *insolemne*. Testamentum *solemne* illud dicitur, quod omnibus solemnitatibus Juris est vestitum; *Insolemne*, quod non omnes legibus præscriptas solemnitates habet, & tamen ex privilegio, seu speciali favore Juris sustinetur; *cujusmodi* sunt plura inferius cap. 3, specificanda.

RESOL. II. Testamentum *solemne* subdividitur in *Scriptum*, & *Nuncupativum*. *Scriptum* est, quod in Scripturam redactum, & debito modo subscriptum, & subsignatum est: *Quod testamentum*, quia Tabellionem & Testes, quid in eo contineatur, plerumque latet, *mysticum*, vel *clausum* nominatur. *Nuncupativum* est, per quod Testator, vi voce voluntatem suam uno actu declarat, hæredemque palam coram septem Te-

stibus specialiter rogatis ac idoneis exprimit, & nominat; unde & *Testamentum apertum* appellatur. Ut ut autem hodie ad faciliorem probationem etiam hoc communiter à Notario in scripturam redigi consueverit, ut uno vel altero teste moriente, fides rei gestæ facilius habeatur, adhuc manet *Testamentum Nuncupativum*; eò quod scripture illa non solemnitatis, sed solum probationis causâ adhibeatur.

*Punctum III. Quæ sit origo, & quodnam objectum confectionis Testamenti?*

**118 RESOL. I.** Ex Communiori sententia *confectio Testamenti quoad substantiam* habet originem suam ex ipso Jure naturali; cùm enim quilibet ex propria natura sit rerum suarum moderator, & arbiter, quilibet etiam de ipsis sive inter vivos, sive mortis causâ pro libitu disponere potest, spe*ctato Jure naturali*: quod tamen non est præceptivum, neque prohibitivum, cùm nullus per se loquendo teneatur testari, aut voluntatem non testandi revocare; sed permisivum duntaxat. *Dixi: quoad substantiam;* quod enim factio Testamenti quoad modum, formam, & solemnitates solum ex Jure Civili ortum habeat, ab omnibus concessum est.

**119 RESOL. II.** Objectum Testamenti est hæreditas, seu universum jus, quod in sua bo-

bona habuit Defunctus, per l. hæreditas 62. ff. de divers. R. J. nam nisi Testator de universo jure, quod habuit, disponat, non re-  
tè testatur; cùm apud Jure-Consultos immotum sit dogma, Paganum, id est, non militem, non posse partim testatum, par-  
tim intestatum decidere, L. Jus nostrum, 7.  
d. tit. Unde tametsi quis unum duntaxat  
hæredem in tertia, vel quarta hæreditatis  
parte institueret, is nihilominus ex tacita  
Testatoris voluntate, quam Legibus con-  
formare voluisse præsumitur, in cota hære-  
ditate creditur esse institutus. s. 5. Instit. de  
hæred. inst. Imò quod plus est, si quis scri-  
beretur hæres in re certa & singulari, v. g.  
in domo, vel horto, nec haberet cohære-  
dem, nihilosecius hæres universalis esset,  
juxta L. Qui testatur i. s. 4. ff. de hæred. inst.  
De quo amplius infrà cap. 2.

RESOL. III. Hæreditas in Jure solet 120  
vocari *As*, & qui solus in tota hæreditate  
instituitur, hæres *ex aſſe*. As verò constat  
*ex 12. unciiſ*, seu portionibus; duæ unciae  
appellantur *sextans*; tres unciae *quadrans*;  
quatuor unciae *triens*; quinque unciae *quin-  
cunx*; sex unciae *semis*; septem unciae *se-  
ptunx*; octo unciae *bes*; novem unciae *do-  
drans*; decem unciae *dextans*; undecim unciae  
*deunx*. d. s. 5. Instit. de hæred. inst. Et, si  
Testator, uti potest, expresserit plures por-

tiones, tunc duplicatur as, & hæreditas revocatur ad *dupondium*; sin etiam ultra duplicem assem auxerit partes, revocatur ad *tripondium*.

**Punctum IV.** *An, & sub quibus conditionibus licitum, justum, & meritorium sit testari?*

**121**    **RESOL.** I. Certum est, quod concurrentibus debitibus conditionibus licitum, & justum sit testari; quia per nullum Jus inventur prohibitum: imò Jure naturali, prout in *præced.* Punct. resolvimus, est permisum; Jure Gentium in toto orbe introductum; & Jure tam Civili, quam Canonico, si certæ personæ excludantur, approbatum. Unde & potest esse meritorium, si fiat ex motivo quodam supernaturali, v. g. spei, ut sic facilius ad cœlestia aspires: vel charitatis, ut pacem, & charitatem inter tuos plantes, foveas, vel restituas.

**122**    **RESOL.** II. Pro foro animæ, ut testatio sit licita, justa, & meritoria, hæc potissimum requiruntur. I. *Intentio pura*, quæ est, ut testator non secundum affectum mere carnalem, sed secundum DEUM, & propriam conscientiam velit de bonis suis disponere, & nemini obesse, utpote etiam de hoc rationem DEO redditurus. II. *Gravantiam exoneratio*, quæ est, ut debita solvantur, aliena restituantur, & merces ope-

ra-

rariorum nullatenus procrastinetur ; hæc enim sunt , quibus conscientia morientis gravatur. III. *Anima propriæ alleviatio* per Sacrificia, eleemosynas , preces , aut pias fundationes in refrigerium suæ animæ ordinatas , ac ut efficaciter , & tempestivè fiant, articulatè, & obtestatoriè hæredibus, ac Executoribus demandatas. IV. *Justitia*, quâ iis , qui jure succedunt , justè hæreditatem distribuat , & dividat, sinè involucris verborum , quæ non nisi ad processus, lites , & jurgia viam parant ; & ut neminem hæredum necessariorum exhæredet, aut præ aliis gravet , absque manifesta , & legibus probata causa. V. *Charitas* , quæ, ut ordinata sit , vult inter consanguineos , & alios ad se pertinentes , semper , cæteris paribus , haberi rationem majoris necessitatis, paupertatis, vel ad gratitudinem obligationis ; exemplô Jacob Patriarchæ , qui Gen. 48. dedit filio suo Joseph partem unam extra fratres suos , quam tulit de manu Amorræi in gladio , & arcu.

RESOL. III. Singulari etiam opus est 123  
*Providentia* ; quia nunquam desunt, qui piam testatorum intentionem vel ante, vel post obitum conantur , nescio quibus dolis , & argutiis impedire , cassare , vel evertere. Aut enim impedire volunt, nimirum ex spe succedendi ab intestato, ne infirmus testa-

H 4 men-

mentum ullum condat ; aut ne conditum ante mortem mutet , contra quos etiam Jure Civili L. i. ff. si quis aliquem. decernitur, quòd si hoc dolosè fecerint, successione priventur , eorumque hæreditatis portio Fisco cedat. Aut impedire tentant, ne alios adhuc cohæredes instituat, vel aliis aliquid legat; qui, ait S. Antoninus 3. p. tit. 10. c. 1. §. 2. in hoc sunt prædones, & scientes omnimodam voluntatem volentis aliis legare , & impeditentes, ne veniat Notarius, vel testis, tenentur ad restitutionem illorum bonorum, quæ volebat aliis relinquere, in foro conscientiae ; imò deberent privari hæreditate. Aut quærunt per Notarium, testes, vel alios induci testatorem, ut sibi plus, aliis minus, etsi nullo alio, quam avaritiæ suæ titulo, relinquatur. Aut demum post mortem testatoris, ne alii rem sibi hæreditario, vel legatorio nomine relictam ex testamento capiant, per se vel per alios omnes latebras exquirunt, & umbras Juris, ut testamentum alicujus ementitæ, vel saltem extortæ invaliditatis possint incusare, sicque hæreditatem plenè liberam sibi vindicare. Ad quæ, & similia paradoxa avertenda,

124      RESOL. IV. Consultum est I. ut quis testamentum condat, dum adhuc est sanus, vel statim, ubi infirmari incipit: quod consilium suggerit S. Antoninus cit, dicens : Cautum

tum etiam est, ut provideat sibi de testamento insanitate, vel in principio infirmitatis; quia Consanguinei etiam in infirmitate impediunt multis modis testamenta fieri, ne leget aliis. II. Ut pro possibili curet servari solemnitates, à Jure respectivè requisitas. III. Ut in omnem cautelam testamento apponat clausulam Codicillarem expressam, v.g. Si hæc mea dispositio non valet ut testamentum, volo, ut valeat quæ codicillus, vel modo quocunque meliore. Cujus effectum dabimus cap. 3. num. 252. Vel IV. ut illud statim faciat referri ad acta; cuius efficaciam similiter explicabimus in eod. cap. num. 240. V. Ut sibi de fidelibus, conscientiosis, & cordatis Executoribus propiciat, qui ordinatè, justè, & fideliter omnia exequantur, & opponentibus cum omni justitiæ zelo resistant. VI. Ut si ad pias causas aliquid disponere velit, saltem duabus personis, qualibuscunque demum voluntatem ipsius intelligentibus, vel unius adhuc præter Confessarium, plenæ probationis causâ, se declareret; si aliam formam præsentes circumstantiæ non admittantur. Hæc à potiori ex Marchantio cit. tract. ult. tit. 3. sect. 1. quæst. 1. huc in unum collegi.

Punctum V. Quæ ergo sint solemnitates testamenti solemnis in communi, prout nempe scriptum, & nuncupativum comprehendit?

H 5

RE-

125 RESOL. I. Solemnitates ad quodlibet testamentum solemne requisitæ, ad duo capita possunt revocari, nimirum ad ipsum actum testandi, in se consideratum, & ad adhibitionem testium. Actus testandi in se aliam solemnitatem non exigit, quam ut sit continuus, id est, unico contextu, continuo tempore, eodemque loco peractus, & per nullum penitus actum extraneum notabiliter interruptus. Unde in testamento nuncupativo ipsa hæredis nominatio, in scripto testatoris subscriptio & subsignatio testibus præsentibus fiat, etsi testamentum ipsum diu antea conscriptum fuerit, necesse est, l. 21, § 28. *Cod. h.t.*

126 RESOL. II. In testibus ad solemne testamentum adhibendis requiritur debita qualitas, seu habilitas ad testificandum, cuius defectus, si patens sit, totum inficit, & viat testamentum, per §. 7. *Inst. de testam. ordin.* Inhabilibus autem accensentur servi propriè dicti; Personæ propinquæ, non quidem ut comparatæ inter se (quia Patrem simul & filium, duos vel etiam plures fratres simul in testes assumere licitum est testatori extraneo, per §. 8. *Instit. eod.*) sed ut comparatæ ad hæredem, aut testatorem, cum nec Pater in testamento filii non emancipati, nec filius non emancipatus in testamento patris, neque fratres in ejusdem Patris

eris potestate constituti in testamento fratris, testes esse permittantur §. 10. *Instit.* eod. ubi tamen maritus à testificando in testamento uxoris non prohibetur. Item hæres ipse in testamento, in quo hæres est scriptus, nequit esse testis; cùm principale negotium inter testatorem & hæredem vertatur, ut *ibid.* Nil tamen obstat, Legatarium, quocum causa testamenti tantum indirectè agitur, in testem adscisci, ut significatur §. 11. *Instit.* eod. Porro ab hoc testimonio ferrando excluduntur impuberes, fœminæ, prodigi juridicè tales, furiosi, in actuali furore insanientes, muti, & surdi. §. 6. *Institut.* eod. Item quos leges jubent esse intestabiles, ità ut nec testari, nec in alieno testamento testes esse valeant, cit. §. 6. *Instit.* & l. 26. ff. qui testamenta facere &c. Huc etiam refer ex quo cunque delicto infames juridicè tales seu de Jure, consequenter etiam hæreticos, ubi tolerati non sunt. Haunold. de J. & J. tr. 6. cap. 2. num. 133.

RESOL. III. In testibus ad testamentum 127 solemne etiam exigitur debita quantitas, seu numerus, qui tamen valdè inæqualis introque Jure taxatur. Nam Jus Civile in omni testamento solemnri requirit septem testes, l. 21. *Cod. de testam.* cuius ratio assignatur l. fin. *Cod. de fideicommiss.* ne quid falsitatis incurrat per duos fortè testes compositum testamen-

mentum, -- sed ut per ampliores homines perfectissima veritas reveletur. At de Jure Canonicō valent testamenta, dummodo sint coram Presbytero Parochiali, & duobus vel tribus testibus confecta, ut decidit Pontifex cap. cūm esses 10. de testam. rationem sumens ex illis Deuteronomii, & Evangelij verbis: *In ore duorum, vel trium testium stat omne verbum.* Et hoc Jus etiam in terris Imperii, quantum ad causas pias, observandum esse, ex dicendis Cap. 3. patebit.

**128** RESOL. IV. In testibus ad solemne testamentum etiam requiritur, ut sint rogati, & simul visibiliter præsentes. Rogati imprimis, id est, specialiter ad hunc actum requisiti, per cit. l. 21. Cod. de testam. Quòd si tamen ex alia causa jam præsentes essent, sufficeret, & requireretur, ut testator illos per se vel per alium ad istum actum testificandi specialiter invitaret, ut probat Recessus Spirensis de Anno 1512. Rubric. von Testamenten. Deinde simul visibiliter præsentes, ita nimirūm, ut testatorem non tantum audire, sed & videre valeant, per l. 9. Cod. eod. ubi: *Si testes non in conspectu testatoris testimoniorum officiō fundi sunt, nullo jure testamentum valet.*

Punctum VI. *Quæ sint solemnitates in specie testamenti solemnis scripti?*

R.E.

RESOL. I. Hæ etiam ad duo capita pos- 129  
sunt revocari , nempe ad *actiones testatoris*,  
& ad *actiones testium*. Inter actiones testa-  
toris hic *prima* est , ut testamentum vel pro-  
pria ipsius manu , vel ejus jussu ab alio sit  
in scripturam relatum , per cit. L. 21. Cod.  
de testam. propterea enim dicitur *scriptum*.  
*Secunda* , ut in eo exprimat nomen hæredis ;  
quia non potest ullum testamentum valere , quod  
bæredem non habet , adeò directa hæredis in-  
stitutio est de substantia testamenti , L. 3.  
ff. de his , quæ in testam. debent. *Tertia* , ut te-  
stator coram testibus ritè , ut suprà , præsen-  
tibus , dicat , vel suo nomine dici curet ,  
in hac scriptura , quam subscribendam eis  
exhibit , contineri suam ultimam volunta-  
tem , ead. L. 21. C. de test. idque ad evitandam  
fraudem , quæ aliud testamentum suppo-  
nendo , facile posset contingere. *Quarta* ,  
ut testator coram testibus testamentum  
manu propria subscribat ; aut , si litteras  
ignoret , vel subscribere nequeat , oītavam  
personam , quæ nomine ipsius subscribat ,  
adhibeat , prout Imperator in sæpe cit. L.  
Hac consultissima 21. C. de testam.

RESOL. II. Enarrata *quarta* conditio 130  
de *Jure communi* non est penitus universalis ,  
sed solùm tunc tenet , quando testator  
ipse suum testamentum propria manu non  
scripsit , sed per alium scribi fecit ; si  
enim

enim quis sua manu totum testamentum, vel *Codicillum conscriperit*, & hoc specialiter in scriptura reposuerit, quod hoc sua manu confecerit, sufficit ei totius testamenti scriptura, & non alia subscriptio requiratur, neque ab eo, neque pro eo ab alio. Ita priorem constitutionem limitat ipse Imp. L. 28. Cod. eod.

**131**    RESOL. III. Inter actiones testium in testamento solemní scripto prima est illius subscriptio à singulis facienda, per prælaudat. L. 21. C. b. t. L. 22. §. 4. ff. qui testam. facere &c. & L. penult. ff. eod. ubi insuper exigitur, ut subscriptio testium duo contineat, scilicet nomen subscriptentis, & nomen testatoris; quamvis de hoc ultimo aliqui solum consilium, non autem præceptum, ibi præscribi putent, & P. Schmier tract. 4. part. 1. c. 2. n. 87. aestimer sufficere, si primi duo testes præter nomen suum etiam nomen testatoris exprimant, reliqui vero præter nomen suum nihil, nisi consonantiam testimonii sui cum prioribus; quod quidem Juri Bavarico tit. 34. a. 1. ad fin. est conforme. Hoc addendum, quod L. fin. C. de testam. in gratiam rusticorum sit indulatum, ut ubi tot testes litterarum periti haberi non possunt, illi, qui callent litteras, loco aliorum scribere nescientium subscribant. Quod privilegeum de Jure Bavarico etiam ad alios scri-

scribendi imperitos extenditur, dummodo major pars testium se possit subscribere.

RESOL. IV. Inter actiones testium in 132  
testamento solemni scripto secunda est ejus  
subsignatio itidem à singulis contestibus fa-  
cienda; nam L. 22. ff. quia testam. facere &c.  
§. 4. ita legitur: *Si quis ex testibus nomen suum  
adscripterit, non tamen signaverit, vel econtra,  
pro eo est, ac si adhibitus non esset.* Ibidem.  
§. 2. deciditur, valori testamenti non ob-  
stare, et si unus testium annulō ab ipso te-  
statore acceptō illud signaverit; & §. 5. *Inst.  
de testam. ordin. permittitur, ut testes etiam  
alienō annulō ad subsignandum utantur.*

Porrò de testatore non legitur ullibi,  
quod ipse etiam testamentum suum subsi-  
gnare beat; quamvis, si faciat, nihil  
ob sit.

Punctum VII. *Quas solemnitates in specie  
exposcat testamentum solempnatum?*

RESOL. Hanc solam; ut Testator co-133  
ràm septem testibus, ut supra, rogatis &  
qualificatis, ultimam Voluntatem suam  
circa hæreditatem, & legata vel fideicom-  
missa palam pronuntiet, & personas, quibus  
ea velit relinquere, per se vel per alium  
clarè denominet. Patet ex l. 21. Cod. de Te-  
stam. Nihil etiam refert, utrum pure me-  
moriter, an ex charta ultimam voluntatem  
suam pronuntiet; quia de essentia testa-  
men-

menti nuncupativi non est, quod fiat sola voce, & sine Scriptura, sed ut ultima voluntas testibus in praesentia per testatorem reveletur, sive eloquendō, sive prælegendō id fiat; sive etiam ipse id faciat per se, sive per alium, dummodo hanc suam voluntatem esse, postea annuendo significet, & ne alii ob adhibitam Scripturam decepti putent testamentum hoc esse *solemne scriptum*, ipse per se vel per alium testes commoneat, se solūm *nuncupativè testari intendere*. Ita Fachineo, Gletle, & Klingensperger citatis, P. Reiffenstuel ad tit. *de Testam. §. 3.* & num. 44.

Punctum VIII. *Utrum ultimæ suæ Voluntatis relatio ad schedam coram testibus, valeat in vim testamenti nuncupativi?* V. g. dum Testator coram septem testibus idoneis dicit: *Quod in hac charta continetur, est ultima mea voluntas.* Vel: *Ille sit heres meus, qui scriptus est in hac scheda.*

**134** RESOL. I. Ab authoritate DD. satis probabile est, prædictam relationem ad schedam valere in vim testamenti nuncupativi; quia ita tenent Julius Clarus *§. testament. q. 4.* Barbosa, Georgius Eberhardus, Berlich, Ludwell *tr. de ult. voluntat. part. 2. cap. 1. pag. 190.* testans de suo tempore, esse sententiam communiter receptam; cum testator voluntatem suam testibus satis ma-

ni-

nifestasse videatur, saltem implicitè, per relationem ad schedam istam, quam in manibus tenebat. Quod confirmari posset ex L. 6. ff. de reb. credit. ubi dicitur: *nihil referre, proprio nomine res appelletur, an digitò ostendatur, an vocabulis quibusdam demonstretur; quatenus mutua voce fungantur, quæ tantundem præsent.*

RESOL. II. Probabilior, & Juribus, 135  
 ac anteà dictis conformior est sententia negans, talem relationem ad schedam valeare in vim testamenti nuncupativi. Hanc sequuntur Manzius, Vasquez, Haunold, Schmier cit. tr. 4. p. 1. cap. 2. à n. 104. Reiffenstuel l. cit. num. 49. Pichler cit. num. 26. eodemque teste communis Recentiorum. Probatur ex L. 29. C. de testam. ubi Imperator exigit in testamento nuncupativo nomen, vel nomina hæredis, vel hæredum, ita nuncupari à testatore, ut omni modo sci-  
 ant testes, qui sint scripti hæredes; & ita certò hæredis nomine successio procedat. Et infrà: quemadmodùm enim in elogio, quod fine scriptura conficitur, necesse est testatorem voce exprimere nomen, vel nomina hæredum; ita &c. At-  
 qui testes non possunt omnimodò scire, quinam sint hæredes, si solùm fiat relatio ad schedam, neque hoc est voce exprimere nomen, vel nomina hæredum: Er-  
 go &c.

*Punctum IX. An valeat Testamentum  
Nuncupativum factum ad interrogationem Nota-  
rii, vel alterius?*

**136** RESOL. Valet, dummodò testes fue-  
rint ab ipso testatore, vel ab alio, ejus jus-  
su, rogati ad testificandum, & ex modo  
respondendi ad singula puncta sibi proposi-  
ta satis pateat, se non ad solius interrogan-  
tis submovendam molestiam, sed ex serio,  
& deliberato animo voluntatem annuen-  
do, vel renuendo manifestare. Sic enim  
salvatur tota essentia testamenti nuncupa-  
tivi, quæ in nunciatione hæredis coram  
testibus à testatore rogatis consistit. Reif-  
fenst. cit. à num. 56. Neque obstat testamen-  
to nuncupativo, quod ad interrogationem  
alterius factum sit; quia hoc nullo Jure  
prohibetur, imò positivè conceditur l. 8. C.  
qui test. facere &c.

*Punctum X. An testamentum in ratione  
scripti solemnis attentatum, sed ob defectum alicu-  
jus solemnitatis quæ tale invalidum, valeat saltē  
in vim nuncupativi?*

**137** RESOL. Valet, si tamen habeat omnes  
solemnitates testamenti nuncupativi; et si  
specialis clausula testamento non sit adjecta  
v.g. ut si non valeat in vim scripti, valeat in vim  
nuncupativi. Ità Menochius, Haunold, P.  
Franciscus Schmier p.m. olim hujatis Almaꝝ  
Universitatis Rector Magnificus, Jurisprud.  
Ca-

*Canon. Civil. lib. 3. tract. 4. part. 1. cap. 2. n. 116.*  
 ejusque Germanus P. Benedictus Schmier,  
 ejusdem Univ. olim Vice-Rector ad tit. de  
*Testam. num. 6.* contra Ludwell, negantem, si  
 constet Testatorem in scriptis testari vo-  
 luisse. Ratio nostra est, quia licet quis vo-  
 luerit testari in scriptis, haec tamen inten-  
 tio fuit solum secundaria, primaria vero,  
 quod voluerit decederet testatus; sed in-  
 hac intentione jam implicitè continetur  
 voluntas testandi nuncupativè, casu quo  
 aliter non decederet testatus: Ergo &c.  
 Huc facit *l. 3. ff. de Milit. Testam.* in qua te-  
 stamentum militis volentis testari Jure com-  
 muni, sed ab hoc in aliquo deficiens, reci-  
 pitur pro valido in ratione testamenti mili-  
 taris; *Neque enim* ( ait Imperator ) *qui voluit*  
*Jure communi* testari, statim beneficio militis re-  
 nuntiavit: nec credendus est quisquam genus te-  
 standi eligere ad impugnanda sua judicia, sed ma-  
 gis utroque genere voluisse propter fortuitos casus.  
 Ergò similiter qui voluit in scriptis testari,  
 non eo ipso facultati testandi nuncupativè  
 renuntiavit; neque credendus est illud ge-  
 nus testandi elegisse ad impugnanda faci-  
 lius sua judicia, sed magis utroque genere,  
 saltem disjunctivè, testari voluisse propter  
 casus fortuitos.

Dixi: *Si tamen habeat omnes solemnitates*  
*testamenti nuncupativi;* inter quas cum præ-

cipua sit manifestatio hæredis coram testibus nuncupati, vel prælecti, hæc autem rariissimè adsit, quando quis vult testari in scripto, eò quod istud genus testandi ad hoc sit inventum, ut etiam testes ipsos lateant contenta in testamento: hinc de raro contingente est, ut testamentum in ratione scripti invalidum, valeat in vim nuncupativi.

Punctum XI. *An testamentum, requisitæ solemnitatis habens defectum, sit invalidum tam pro foro interno, quam externo?*

138 RESOL. I. Est satis probabile, quod testamentum carens aliqua solemnitate Juris, valeat adhuc in foro interno, ita ut hæredes & legatarii instituti possint tutâ conscientiâ hæreditatem & legata accipere & retinere, quoisque vel per exceptionem Legis, vel Judicis sententiam ad restituendum compellantur; & hæredes ab intestato venientes non possint eos propria auctoritate licite in illius hæreditatis & Legatorum apprehensione ac usu turbare. Ita Fagnanus in cap. cum esses, de testam. § ibid. Abbas, Molina, Lessius, Mastrius, Sannig, Reiffenstuel, Pichler, & alii planè multi. Nituntur hi Authores & Juribus, & rationibus. Ex Juribus illa specialiter deprædicant, quæ hæredi imponunt necessitatem solvendi legata seu fideicommissa etiam ex

te-

testamento minùs solemnī, si is voluntatem testatoris de hoc agnoverit, ut decidi videtur *l. non dubium 16. Cod. de testam. & l. fin. Cod. de Fideicom.* Quibus adde *L. Etsi inutiliter 2. Cod. eod. tit.* ubi repetitio Fideicommissi ab hærede ex testamento minùs solemnī alteri relicti inhibetur: quæ omnia probare videntur, ex tali testamento nasci saltem obligationem naturalem. Rationes verò cæteris urgentiores sunt I. Quòd nulla Lex possit ostendi, quâ testamentum minùs solemnne etiam decernatur irritum pro foro interno. II. Quòd factio testamenti sit Juris naturalis, consequenter etiam absque solemnitatibus Juris civilis obligationem pariat naturalem, & in conscientia. III. Quòd alii actus, utpote electiones Prælatorum Ecclesiasticorum, alienationes rerum Ecclesiasticarum sínè solemnitatibus Juris, & contractus minorum sínè auctoritate Curatoris, producant obligationem naturalem pro foro conscientiæ, antequam à Judice rescindantur: quidnî etiam Testamentum? IV. Quòd Leges testamentariæ fundentur in præsumptione fraudis, ut colligitur ex verbis *l. fin. Cod. de fideicomiss. supra num. 127.* recitatis; sed actus facti contra ejusmodi leges, si reverâ fraus absit, valent in conscientia, quia in foro conscientiæ spectatur veritas: Adeoque &c.

**K39** RESOL. II. Probabilius est, quod tale testamentum defectuosum, à Persona Juri Civili Imperatorio subjecta conditum, nè quidem valeat pro foro interno, nec ullum jus tribuat hæredi instituto, nec ullam obligationem imponat hæredibus ab intestato; sed, ac si nullum fuisset factum testamentum, ille istis omnia relinquere, vel restituere in conscientia obligetur. Ità præter Magnif. D.P.Schmier, & alios Juristas innumeros, ex Theologis Haunoldus de J. & J. tract. 6. cap. 1. num. 30. Bonacina, Lugo, Dicastillo, Diana, Covarruias, & cum illis noster Illustrissimus Herinex Episcopus Iprensis, *Summae Theolog. tom. 3. disp. 2. quest. 4.* Fundamentum unicum, sed validum, sit hoc: *Quando lex absolutè irritat aliquem actum, & non est injusta, tunc facit illum irritum in utroque foro, ità ut nèc obligationem naturalem pariat, nec civilem;* Atqui Leges Civiles testamentariæ absolutè irritant testamenta insolemnia, non privilegiata, & non sunt injustæ: ergò faciunt illa testamenta insolemnia irrita in utroque foro &c. Major est doctrina communiter recepta, ubi de Legibus; potest enim Legislatores Civilis ex justa causa aliquem actum etiam irritare pro foro interno: & si absolutè loquatur, censemur ità voluisse. Minor, quæ bimembris est,

Prob.

Prob. I. quoad priorem partem, quòd 140  
 Leges Civiles testamentariæ absolutè irri-  
 tent testamenta insolemnia, non privile-  
 giata. §. 7. Instit. *Quibus modis test. infirm.* ità  
 dicitur: *Imperfectum testamentum finè dubio*  
*nulum est. l. 23. ff. de legat. & fideicom. 3. Ex*  
*imperfecto testamento legata vel fideicomissa Im-*  
*peratorem vindicare, inverecundum est. L. 3. Cod.*  
*de testament. Ex imperfecto testamento nec Impe-*  
*ratorem hæreditatem vindicare posse, sape consti-*  
*tutum est. L. 12. Cod. eod. Si unus de septem te-*  
*stibus defuerit, vel coram testatore omnes eodem.*  
*loco testes suo, vel alieno annulo non signaverint,*  
*jure deficit testamentum. Et l. hac consultissima*  
*21. Cod. e.t. in qua post descriptas solemnni-*  
*tates, hæc subjunguntur: Ex imperfecto au-*  
*tem testamento voluntatem tenere defuncti, nisi*  
*inter solos liberos (à parentibus utriusque sexūs)*  
*babeatur, non volumus. Si verò in bujusmodi*  
*voluntate liberis alia sit extranea mixta persona,*  
*certum est eam voluntatem defuncti, quantum ad*  
*illam duntaxat permixtam personam, pro nullo*  
*haberi, sed liberis ad crescere.*

Prob. eadem minor II. quoad posterio-141  
 rem partem, quòd hæ leges non sint inju-  
 stæ. Nec enim sunt contra Jus naturale,  
 nec contra Jus Divinum positivum; alio-  
 quin neque sententia Judicis secundùm il-  
 las leges Civiles lata, posset esse justa, &  
 respectu hæredis ex tali testamento inso-

lemni obligatoria , quod tamen sustinent  
adversarii. Certè Jus naturale, licet ejus-  
modi solemnitates non exigat ad testamen-  
tum , nec tamen prohibet adhiberi : unde  
accedente imperio Legislatoris humani ,  
etiam possunt esse de præcepto , & valere  
testamenti , sicut patet in matrimonio ,  
quòd , et si sit Juris naturalis , tamen post  
Concilii Tridentini constitutionem nè cui-  
dem validè inter fideles iniri potest sinè so-  
lemnitate præsentia Parochi , & ducrum  
testium. Jus positivum Divinum verò , se-  
cundùm quod *in ore duorum , vel trium testium*  
*stat omne verbum*, non est absolutè , & univer-  
saliter pro omni materia præceptivum ;  
cùm etiam Ecclesia in quibusdam , velut  
*in condemnatione Cardinalis , Episcopi ,*  
*Presbyteri , & aliorum Clericorum ordinato-*  
*rum , majorem testium numerum requi-*  
*rat , ut patet ex can. Præsul. 2. II. q. 4. ubi*  
*Præsulem nonnisi cum 72. testibus , Pres-*  
*byterum Cardinalem cum 44. Diaconum*  
*Cardinalem cum 27. Subdiaconum*  
autem , Acoly hum , Exorcistam , Lecto-  
rem , & Ostiarium , nonnisi septem testi-  
bus coademandum decernit , Et ideo ,  
cùm Pontifex consuetudinem validè non-  
testandi , nisi cum subscriptione septem vel quin-  
que testium , dicit à Divina lege , *Et sacerdotum*  
*Patrum institutis , Et à generali Ecclesiæ consue-*  
*tu-*

studine alienam, (cap. 10. de testam.) cùm scriptum sit, in ore duorum, vel trium testium stat omne verbum; ly alienum non debet intelligi adversativè, quasi Divinæ legi, & cæteris commemoratis positivè aduersaretur, sed præcivè, quatenùs de tanto testium numero in Divina lege, & cæteris, nihil præcipitur, ut in re explicat P. Schmier cit. n. 22.

His stabilitis, facile etiam respondeatur<sup>142</sup> ad fundamenta resolutionis primæ. Nam ad duo Jura priora dicitur, iis hæredem ab intestato venientem obligari legata, vel fideicommissa præstare, non ex vi testamenti, neque ex vi voluntatis Defuncti, quæ ambo defectum continent, sed ex vi suæ spontaneæ promissionis, quam percepta Defuncti voluntate fecerat de legatis, & fideicommissis præstandis; quæ proin obligatio ipsum stringit etiam in foro externo, & antecedenter ad Judicis sententiam. Tertium Jus verò est de hærede, qui sciens fideicommissum inutiliter relictum esse, nihilominus solvit; ejusmodi non potest solutum per conditionem indebiti repetrere; quia ex reg. 53. ff. de div. reg. Jur. cuius per errorem datirepetitio est, ejus consultò dati donatio est. Ad I. Rat. oppositum damus in Legibus allegatis num. 140. Ad II. patet ex ratione nostra n. 141. quemadmodum enim matrimonium, etsi sit Juris naturalis,

ralis, nullam obligationem, etiam naturalem parit, nisi suum substantiale comple-  
mentum, ab Ecclesia adjectum habeat, ita  
est de testamento comparato ad Leges Ci-  
viles. Ad III. Neg. ass. quia simile funda-  
mentum pugnat pro his omnibus. Et pro-  
fetò, si recensiti actus non pariant obli-  
gationem naturalem post sententiam Judi-  
cis, neque parient antè, cùm illa cassa-  
tio Judicis non tam sit annullatio, quam  
præviæ nullitatis declaratio, ait Schmier  
cit. num. 56. Ad IV. Idem dicere quis pos-  
set de sententia Judicis, quam tamen in-  
conscientia obligare etiam AA. affirmant;  
item de lege solemnitatis in matrimonio.  
Unde, sicut hæ adhuc obligant, quia non  
fundantur in præsumptione particulari,  
seu facti, sed generali, & Juris, ita dicen-  
dum de Legibus testamentariis.

*Punctum XII. An in illis testamentis, quæ  
regulanda sunt juxta Jus Canonicum, præsentia  
Parochi, & duorum, triūmve testium, quorum  
mentio fit in cit. cap. cùm esses. 10. de te-  
stam. sit etiam de forma, & valore testamenti,  
an solū ad probationem?*

143      RESOL. Licet major pars DD. cum  
Panormitano, Covarruvia, & Barbosa ad  
d. cap. Pirhing ad tit. de testam. num. 10. Pich-  
ler num. 36. & aliis censeat, de Jure Cano-  
nico præsentiam Parochi, & duorum, vel  
tri-

trium testium non solum probationis causâ exigi, sed etiam ad substantiam, & va-  
lorem testamenti. Nihilo seciùs teneo cum  
P. Engel in Colleg. Univ. Jur. Canon. ad tit. de  
testam. num. 14. P. Schmier cit. tract. 4. c. 2.  
num. 30. & Clariss. D. P. Placido Böckn hu-  
jatis Almæ Universitatis Procancellario ex  
Celeberr. & Antiquiss. Monasterio ad D.  
Petrum hic Salisburgi, ad tit. de testam. n. 23.  
præsentiam Parochi, & testium ibi solius  
probationis gratiâ requiri; atque adeò, si  
aliunde, v. g. ex scheda, testatoris manu  
indubitate descripta, constet de veritate  
testamenti, id pro valido habendum esse,  
etiamsi nec Parochus, nec aliis testis ad-  
fuisse. Rationes P. Engel sunt I. Quia,  
cùm Pontifex in cit. cap. cùm esses. tam acri-  
ter refutet Agri Hostiensis consuetudinem,  
legibus Civilibus attemperatam, de testan-  
do cum 5. vel 7. testibus, & urgeat Jus  
Divinum, vi cuius *in ore duorum, vel trium*  
*testium stat omne verbum*, sanè, ne sibi con-  
tradicat, non potuit dictos testes ad aliud,  
quàm ad probationē testamenti requisivis-  
se, cùm etiam sacer ille textus Scripturæ ad  
solam probationem pertineat; & ideo præ-  
cisè adjecit præsentiam Parochi, quia lo-  
quitur de testamento extremè decumber-  
tium, quibus ordinariè Parochus assistere  
solet. II. In dubio, an Lex, vel Canon  
præ-

præscribat certam formam substantialem, actui, id ex stylo, & modo loquendi aliarum legum, formas actibus præscribentium, decidendum est; sed quotquot tales leges in Jure reperimus, non tantum memorant actum ita factum valere, sed positivè statuunt, ac præcipiunt, ita & non aliter fieri debere: Ergo si etiam sacer Canon præsentiam Parochi, & testium præscriberet, ut formam substantialem testamenti, non tantum memoraret, testamentum conditum in tali præsentia esse validū, & firmum, sed etiam positivè statueret, aliter fieri non debere; quod tamen non facit. III. Non appareat, cur in testamentis merè profanis debeat intervenire Parochus; certè ille *textus Juris Divini* nihil habet de Parocco. Et peto, num testamentum ipsi, & aliis testibus sit exhibendum *clausum*, vel *apertum*? si clausum, cur necessaria qualitas Parochi ad rem sibi incognitam? Si apertum, unde obligatio hæc manifestandi hæredem, & legatarios, totamque substantiam Parocco adhuc ante mortem testatoris? IV. Quid si Parochus ipse de suis patrimonialibus, vel quasi testari velit, qui nec propriè alium Parochum habet, cùm se cuilibet legitimè exposito Sacerdoti possit subjicere?

Pun-

Punctum XIII. Quænam ergo testamenta in specie conſtruenda, & regulanda ſint ſecundūm Leges Juris Civilis, & quænam juxta Jus Canonicum?

RESOL. I. Omnia testamenta non pri-  
vilegiata in terris, & à personis, Impera-  
tori, & Imperio Romano temporaliter  
ſubditis, facienda, necessariò regulanda  
ſunt, & conſtruenda ſecundūm Leges Ju-  
ris Civilis. Patet ex materia de Legibus;  
hoc ipſo enim, quod tales personæ ſint  
temporaliter ſubditæ Imperatori, Imperio-  
que Romano, ſubduntur etiam ejus po-  
tentia legislativæ, & conſequenter tenen-  
tur ejus leges, in materia adiaphora, &  
ab iplius jurisdictione non exempta, ob-  
ſervare.

RESOL. II. Testamenta, quæ con-  
dun-  
tur in terris, & à personis temporali do-  
minio Romani Pontificis ſubjectis, vel  
probabilius etiam extra illas terras à Per-  
fonis Ecclesiasticis, conſtruenda, & regu-  
landa ſunt ſecundūm Jus Canonicum, non  
ſolemnitatis, ſed probationis cauſā. Ita  
Engel l. cit. num. 10. Et quoad primam par-  
tem patet; quia ejusdem potentia respecti-  
vè ad ſuos eft dominium Papæ, cuius re-  
ſpectivè ad ſuos eft dominium Imperato-  
ris: Ergo, ſicut iſtud obligat ad ſectandas  
Leges Civiles Imperatoris, ita illud ad ſe-

D. 148.

ständas Leges Canonicas Pontificis. Quo-  
ad alteram verò partem probatur inde ;  
quia, ubi Jus Civile, & Canonicum discre-  
pant, Clerici non subjacent Legibus Ci-  
vilibus, sed Canonicis, *cap. Quòd Clericis. 9.*  
*de foro compet.* & passim DD. *ad tit. de Imunit.*  
*Eccles.* Sed in testamentis regulandis discre-  
pant Jus Civile, & Canonicum : Ergò.

146      Quinimò, dices, quando Jus Civile di-  
screpat à Canonicō, tenendum est Jus Ca-  
nonicum etiam in terris Imperii, quia tunc  
censetur Jus Civile à Canonicō correctum,  
ut de præscriptionibus cum mala fide deci-  
ditur in *cap. ult. de præscription.* de damno ab  
hæredibus defuncti resarciendo juxta vires  
hæreditatis, in *cap. In literis 5. de Raptoribus,*  
cum similibus.

Resp. assumptum non esse universaliter  
verum, sed tunc solummodo, quando *de re*  
*conscientiae, & materia peccati agitur,* ità ut Le-  
ges Civiles foveant peccatum, prout est in  
dictis exemplis; tunc enim Summi Pontifi-  
cis tanquam communis animarum Pastoris  
est, jurisdictionem etiam in terras Imperii,  
imò in totum mundum exercere, noxias  
fidelibus leges abrogandò. At quando di-  
screpantia utriusque Juris est in materia  
merè adiaphora, nec tangit conscientiam,  
vel peccatum, ut circa solemnitates testa-  
mentorum, judiciorum, contractuum, &  
simi-

similium, quodlibet Jus in suo foro servandum est, arg. can. cùm ad verum 6. dist. 96. est que communis doctrina Canonistarum in Proœmio Juris Canonici. Vide P. Ludov. Engel ibid. num. 19.

## §. II.

### Praxis Confessoriorum circa expositionem Doctrinam.

#### CASUS I.

**J**odocus Legista callidissimus jam per aliquot annos satis feliciter in judicio decertaverat cum suo Parocho in causa immunitatis suorum prædiorum ab onere solvendi decimas, per longam quasi possessionem acquisitæ. Cùm autem jam senescens unici filii sui degenerem simplicitatem apprebenderet, timens, ne si filius in causa succumberet, fama sua post mortem pateretur, testamentum condere decrevit, in quo simul cum suo unigenito, cognatum quendam, remotum quidem, sed ære & calamo potentem, heredem instituit, ita ut in iis, quæ usum rusticum non præberent, filius, in reliquis cognatus succederet. Sepositis jam aliis, hic solùm queritur, an Confessarius desuper rogatus, tale testamentum pro suo foro possit approbare?

RE-

## RESOLUTIO.

147 **V**Idetur, quòd non. Vel enim Jodocus ipsemet persensit, suam quasi possessiōnem non esse adeò justam, & Sacris Canōnibus conformem, vel omnino invincibili-ter judicavit justum, & conformem esse? Si primum, per se peccat mortalissimè, tale testamentum faciendō, quia præcedens in-justitiae & irreligionis peccatum novo actu positivo approbat, & confirmat, ac insu-per suum cognatum ad invadenda Ecclesiæ jura gravissimo scandali peccatō inducit: cùm potiùs in tali statu debuisset securi-tati suæ conscientiæ prospicere, & post congruam satisfactionem, ac damnorum illatorum compensationem se cum Eccle-sia, ejusque Ministro reconciliare. Utinam tales legerent, & perpenderent, quæ contra sacrilegos decimarum defraudato-res detonant Pontifices in can. 1. caus. 16. q. 7. cap. Tua nobis. 26. de decimis, & in Con-cil. Trident. sess. 25. de reform. cap. 12. Si verò secundum, saltem leviter contra pie-tatem delinquere censendus est, eò quòd nulla alia ex causa filium nolit esse hæredem ex asse, quàm quia hebetior appetet ad jura sua tuenda, quæ tamen utique per alios tueri posset: item vanitate quadam amoris sui proprii, dum in successore etiam post

post mortem triumphare querit, & pro eo, qui erraverit, haberi refugit. Deficit ergo hic Intentio pura.

## C A S U S II.

**L**iborius, & Liboria conjuges se mutuo in eadem charta scripserunt heredes, & ad id praeter Tabellionem, seu Notarium rogarunt septem testes, qui testamentum post illos subscripserunt, & subsignarunt. Post mortem Liborii, statim proximi ejus consanguinei, minimè tamen heredes necessarii, comparent, & Liboriæ litem movent, impugnando dictum testamentum, I. quod licet. 19. Cod. de Pactis. vetitum sit inter privatos, exceptis militibus, scriptum hujusmodi, quod comprehenditur, ut is, qui supervixerit, alterius rebus potiatur, & ne quidem valeat in vim donationis mortis causâ. II. Quod, cum duplex sit testamentum, numerum duplicatum testium requirat. III. Quod duos domesticos ex sua, & patrem, ac filium ex aliena domo inter testes computaverit. IV. Quod etiam Religiosus numerum testium compleverit. V. Quod unus tunc necdum fuerit pubes, licet habitus pro pubere. Nam Liboria petit resolutionem Confessarii, an, cum certa sit de voluntate sui prædefundi mariti, non possit se contra iniquam sibi forte Judicis sententiam rerum præoccupatione assecutare?

K

RE.

## RESOLUTIO.

148 Confessarius hic cautè procedat, persuadendō potiūs, Judicem secundūm iustitiam causæ definiturum, ideoque causā adhuc indecisā, immeritò Liboriam per præventionis factum, Judicem se in propria causa constituturā. Poterit tamen eam consolari, eique, vel Procuratori ejus, per modum Doctoris privati, suggerere, nihil in his omnibus timendum, non in primo; tum quia in odiosis argumentum à Pactis ad testamenta non valet: tum quia *l. captatorias. 70. ff. de hæred. instituend. mutua talis institutio expressè approbatur*; tum quia inter conjuges passim in Germania ita receptum esse testantur Mynsinger, Gaill, & Nicolaus Everhardus apud Layman *Theol. Mor. lib. 3. tr. 5. cap. 1. num. 5.* Non in *secundo*; quia in isto casu solemnitas indivisibiliter afficit utrumque testamentum, adeoque septem testes sufficiunt. Et ita citatō Gomez, sentit Haunoldus in *cit. tract. 6. cap. 2. num. 103.* Non in *tertio*; quia nulla lex prohibet domesticos ad testandum rogare, nisi sint ex conjunctis, vel in patria potestate testatoris, aut hæredis constitutis, arg. §. 10. *Inst. de testam. ordin.* Idem de Patre & Filio respectu extranei testatoris permīssum esse, ex §. 8. *Inst. sed. jam diximus*

mus num. 126. Non in quarto; quia Religiosi à ferendo testimonio in materia testamenti nullo Jure arcentur; licet ad multa absurdâ vitanda consultius sit, ut, præser-tim si sint testatoris Confessarii, se à tali testimonio abstineant, nisi necessitas, vel proximi charitas, vel alia causa rationabilis illud exigat. Reiffenstuel cit. num. 13. Nec tandem in quinto; quia licet in rigore tunc non valeat testamentum, cum idem sit, ac si unus testis defuisset; de æquitate tamen sustinetur, favore scilicet ultimæ voluntatis, si talis ab omnibus, vel saltem majore parte fuerit pubes reputatus. Ayblinger in *Institut. Imperial. lib. 2. tit. 10. part. 2. num. 24.* Imò Jus ipsum ex liberalitate subvenit tali testamento, ut de servo ab omnibus æstimato libero, deciditur *J. 7. Inst. de testam. & l. i. Cod. eod.*

### CASUS III.

**M**ævius ratione opificii in peregrinas regiones discessurus, cum esset orbatus parentibus, & solum vitricum ac novercam haberet, bono amico suo, ad quem sepius solebat divertere, dixit: Si è peregrinis non rediero, sed antea mortem opperiero, omnia mea tua sunt; & ne res sine testibus ageretur, idem in præsentia uxoris amici sui (qui mox gratias retulit) & quatuor do-

mesticorum ejus, duorum marium, & duarum fœminarum, repetit & confirmavit. Factum est igitur, ut vitam in remotis clauderet; per quod janua libibus aperta est, variis hæreditatem affectantibus. Solus amicus Mævii pulsat aures Confessarii, an non sibi hæritas Mævii ex tam clara sui in hæredem nuncupatione debeatur?

## RESOLUTIO.

149 **S**atis clarum est, titulō hæredis ex testamento nuncupativo bonum hunc amicum non posse bona defuncti occupare; cùm nec debitus numerus, nec qualitas testium, nec eorum specialis ad hoc rogatio, observata fuerint. Adhuc tamen existimo, hanc dispositionem valere, non ut testamentum, sed ut donationem mortis causa; ad quam omnes conditiones de Jure requisitæ adsunt; est enim I. actus liberalitatis. II. Intuitu mortalitatis exercitus. III. Primū secuta morte disponentis irrevocabilis effectus. IV. Ut ex gratiarum actione patet, à donatario acceptatus. V. Coram quinque testibus, juxta præscriptum l. ult. Cod. de mort. caus. donat. perfectus, in quibus, cùm non sint testamentarii solemnies, illæ qualitates Juris Civilis non sunt necessariæ, ex communi cum Haunold. tr. 7. num. 199. unde nec rogatos esse oportet, *ibid.*

*ibid.* Vindicit ergò amicus bona Mævii,  
quorum dominus est factus, non jure hæ-  
redis, sed donatarii.

### §. III.

**Quinam Testamenta facere possint,  
vel non possint?**

**Punctum I.** *Quæ sit de hoc Regula genera-  
lis?*

**R**ESOL. Regula generalis hæc datur: *Te- I § 1  
stamentum facere potest quilibet, qui neque  
natura, neque Jure prohibetur.* Est nempe fa-  
ctio testamenti de genere non prohibito-  
rum, seu communiter permissorum, de qui-  
bus procedit illud Glossæ communiter re-  
ceptæ in cap. inter corporalia. *§. non invenitur.  
de translat, Episc. concessum intelligitur, quod ex-  
pressè non prohibetur, arg. l. 1. §. 1. ff. de testib. &  
l. 43. §. 1. ff. de Procurat.*

**Punctum II.** *Quinam à fætione testamenti  
probibeantur naturâ?*

**R**ESOL. I. Aliqui prohibentur naturâ *I. § 1  
ob defectum animi, aliqui ob defectum  
corporis. Ob defectum animi prohibentur I.  
Infantes ante usum rationis, regulariter se-  
ptimô primùm annô allucescentem. II. Fu-  
riosi, amentes, & mente capti, quando  
actualiter usu rationis privati existunt.;*  
*Valet enim testamentum furiosi, quod ante*

150      *Distinctio II. Caput I. §. III.*

*furorem consummavit, textu claro l. 20. §. 4. ff.  
Qui testam. facere. vel quod in lucidis inter-  
vallis condidit, l. 9. Cod. e.t.*

152      RESOL. II. *Ob defectum corporis ab ipsa  
natura testari prohibentur Surdi, & Muti-  
simul, si tales sint à nativitate; secùs si pri-  
mùm in decursu vitæ per accidens tales  
effecti sint. L. 10. C. Qui testam. facere Ec.  
ubi etiam disponitur, quod mutus tantum,  
vel surdus tantum, sive à natura, sive per  
accidens, possit facere testamentum vali-  
dissimum, ille quidem in scriptis, si scri-  
bere didicerit; hic verò vel oretensis, vel  
in scriptis. Porrò *Surdus* hic intelligitur,  
qui planè nihil percipit, & *Mutus*, qui ni-  
hil eloqui potest, non autem surdaster,  
vel balbus, qui difficulter audit, vel loqui-  
tur, arg. l. 10. cit.*

153      RESOL. III. *Cæcus, sive à natura, si-  
ve ex accidenti, non prohibetur testari,  
sed permittitur facere testamentum nuncu-  
pativum, iuxta formam præscriptam in L. 8.  
C. Qui testam. facere Ec. quatensis scilicet  
præter alias Juris solemnitates adhibeat  
Notarium, vel octavum testem, quia testa-  
mentum à testatore coram testibus ore-  
nus enuntiatum conserbat, & unà cum  
iisdem testibus subscribat, ac signet.*

*Punctum III. Quinam testari prohibeantur  
à Jure?*

RE-

**RESOL. I.** Aliqui prohibentur de Jure<sup>154</sup> Civili; alii de Jure Canonico, de quibus in sequenti Puncto. De Jure Civili quidam à faciendo testamento arcentur ob defectum etatis; nonnulli ex defectu integri statūs; plures ob vitium morum. Ita P. Robertus König ad tit. de testam. num. 18. Unde sit

**RESOL. II.** Ob defectum etatis testari prohibentur Impuberis, etiam ad pias causas; quia præsumitur ordinariè judicium in illis non esse sufficienter defæcatum, s. 1. Inst. Quibus non est permisum &c. Neque hic malitia supplet ætatem, cùm leges præcisè certum annorum numerum, scilicet quartum decimum in masculis, in fœminis vero duodecimum completum requirant. L. 5. ff. Qui testam. facere &c. Sic tamen, ut hæc completio non debeat esse de momento in momentum, sed moralis, arg. l. cit. Porro Puberes facti, testari possunt etiam sine authoritate Curatoris, secùs quam permisum sit eis disponere inter vivos; quia, cùm effectus testamenti referatur in tempus post mortem, hac ratione sibi in vita non præjudicant.

**RESOL. III.** Ex defectu integri statūs testari prohibentur I. Servi. L. 16. & 19. ff. Qui testam. facere &c. II. Capti ab hostibus, l. 8. pr. ff. eod. tit. Si tamen ante captivitatem testamentum ritè fecerint, illud sustineri

debet, vel jure postliminii, si redierunt,  
vel ex L. Cornelio, si apud hostes decesse-  
rint. *L. 18. ff. de capt. & postlim. revers.* III. Ob-  
fides, ad normam *l. 11. ff. Qui testam. facere.*  
IV. Filiis familiis, qui non nisi de bonis ca-  
strenibus, vel quasi castrenibus testari per-  
mittuntur, *l. penult. & ult. C. eod. tit.*

**157**    RESOL. IV. *Ob vitium morum Jure Ci-*  
*vili testari prohibentur I. juridicè Prodigii,*  
*postquam ipsis est interdicta bonorum admi-*  
*nistratio, §. 2. Inst. Quibus non est permisum &c.*  
II. *Rei perduellionis, l. 20. C. de accusat.*  
III. *Deportati, qui à toto Romano Impe-*  
*rio ejiciuntur, ità ut etiam Jus Civitatis*  
*Romanæ perdant. L. 8. §. 2. ff. Qui testam.*  
*facere. Hodie Deportatis æquiparantur Ban-*  
*niti, seu proscripti ab Imperatore, vel Ca-*  
*mera Imperiali. IV. Damnati ad mortem,*  
*naturalem, vel civilem, cit. l. 8. quorum*  
*tamen bona Jure novo relinquuntur De-*  
*scendentibus, & Ascendentibus usque ad*  
*tertium gradum, si adsint, per Nov. 134.*  
*cap. ult. V. Rei criminis læsæ Majestatis,*  
*L. 5. C. ad L. Jul. Majestatis. VI. Hæretici,*  
*L. 4. & 5. C. de hæreticis; itemque eorum re-*  
*ceptores, defensores, & fautores, Autb. Cre-*  
*dentes. C. eod. Quod tamen nunc de solis*  
*non toleratis est intelligendum.*

Cæterū, exceptis impuberibus, om-  
nes alii; solo Jure Civili prohibiti, testa-  
ri

ri possunt ad pias causas, cùm testamentum pium non subjaceat dispositioni Juris Civilis. Engel b.t. num. 4. Reiffenstuel e.t. num. 321. & alii; Favétque L. I. C. de SS. Ecclef. unicuique concedens licentiam testandi ad piam causam.

Punctum IV. *Quinam testari prohibeantur à Jure Canonicō?*

RESOL. I. Aliqui prohibentur ob conditionem statūs, aliqui in pœnam delicti. In pœnam delicti prohibentur I. etiam hoc Jure Hæretici, eorumque Fautores ac Receptatores, cap. 13. §. credentes, de Hæret. quæ tam proibitio rursus ad Acatholicos in Imperio toleratos non porrigitur, ut communiter observant DD. II. Percussores, ac Persecutores S.R.E. Cardinalium, cap. fin. de Pœnis, in 6. III. Usurarii manifesti, donec substantiam fœnore collectam restituant, aut de restitutione sufficienter caveant, cap. ult. de Usur. in 6. Quæ dispositio indirectè etiam tangit Judæos, quatenus Jus Canonicum à Civili tacitè recipitur, ut cum Zoëfio & Schambogen notat Schmier cit. n. 60.

RESOL. II. Ob conditionem statūs testari prohibentur I. Episcopi, & Clerici Sæculares, non quidem de bonis patrimonialibus, & quasi talibus, eoque relatis; sed de bonis Beneficialibus superfluis; & vi Juris Communis quidem, neque ad causaspias,

K 5 ne-

neque ad profanas, per cap. 1. 7. 8. 9. § 12.  
de testam. Textus præ cæteris clarior ex-  
stat in cit. cap. 9. sub his formalibus : Licet  
*Clerici de his, quæ paternæ successionis vel cognationis intuitu, aut de artificio sunt adepti, seu donec consanguineorum, aut amicorum, non habito respectu ad Ecclesiam, pervenerunt ad ipsos, liberè disponere valeant; de his tamen, quæ consideratione Ecclesiæ acceperunt, nullum de Jure possunt facere testamentum.* Ratio hujus redditur in  
cit. cap. 7. Quia in officiis charitatis primo  
loco illis tenemur obnoxii, à quibus bene-  
ficium cognoscimus accepisse; cùm igitur  
Episcopi, ac alii Beneficiati, non exiguos,  
sed amplos fructus ab Ecclesia percipient,  
æquum est, ut penes Ecclesiam fructus su-  
perflui permaneant, sive illi intestati dece-  
serint, sive aliis conferre voluerint. Nihi-  
lominus, nemine ambigente, potest Summus  
Pontifex concedere Beneficiatis liberam de  
prædictis bonis testandi facultatem *ad cau-  
sas pias*; quidnî etiam consuetudo ità testan-  
di introduci? Layman, Navarrus, cum com-  
muni, & certa aliorum, arg. cap. 12. e.t. cùm  
prohibitio testandi ad causas pias sit solùm  
Juris humani. Quid autem sentiendum de  
consuetudine ità testandi etiam *ad causas pro-  
fanas*, vide præter alios innumeros, P. Reif-  
fenstuel cit. à num. 335. & Schmier à num. 89.  
qui

qui se huic consuetudini viritim, & zelosè  
opponunt.

RESOL. III. Ob conditionem statūs de Jure 160

Canonico testari prohibentur II. Religiosi  
professi. Cùm enim per votum tolemne  
Paupertatis sint omni dominio rerum tem-  
poralium exuti, per consequens nec de eis  
testari, nec testamentum ante Professio-  
nem conditum revocare queunt. *Can. 7. 19.*  
*quæst. 3. & auth. Ingressi, Cod. de SS. Eccless.* Quod  
verum est, etiamsi Prælatus testandi licen-  
tiam concederet; cùm nec ipse habeat te-  
standi potentiam, nemo autem dat, quod  
non habet. *L. traditio 20. ff. de acquir. rer. dom.*  
Certè tamen Summus Pontifex licentiam  
potest dare Religioso, ad pias causas testan-  
di de bonis, quorum de facto administra-  
tionem habet; quam de Jure, vel con-  
suetudine habent Religiosi Ordinum Milita-  
rium: & frequenter Summus Pontifex da-  
re solet aliis Religiosis, si extra Monasterium  
Ecclesiasticum beneficium, præsertim Epi-  
scopatum, vel Cardinalatum obtineant.  
Alias exceptiones, præsertim Scholasticos,  
& Coadjutores non formatos Societatis  
JESU, concernentes, videsis apud Authores  
passim. De Religioso Novitio cujuscun-  
que Religionis, quòd liberè de bonis suis  
testari possit, antequam profiteatur, non  
est dubium. Quòd si instituerit hæredem

extraneum, communis Sententia afferit talia bona, secuta Professione, ad dies vitæ Religiosi Professi remanere penes Monasterium, si alias dominii capax sit; post mortem tamen talis Religiosi esse restituenda hæredi. Bartolus *ad Auth. si qua mulier.*  
*num. 10.* Abbas *ad cap. In præsentia, de probat.*  
*num. 58. &c seq.* Veruntamen P. Schmier *l.cit.*  
*cap. I. num. 116.* tenet oppositum; quia nisi Novitus aliud exprimat, censetur eo modo testari velle, quo alius, ut scilicet hæres institutus statim capiat hæreditatem, quam primùm testator desinet esse dominus.

## CAPUT II.

### De Hæredum Institutione, & substitutione.

#### §. I.

##### Expositio Doctrinæ Christianæ.

Punctum I. *Quid, & quotuplex sit Hæres?*

16. **R**ESOL. I. *Hæres* in genere dicitur illa persona, quæ in universum Jus defuncti vel ex testamento, & dispositione testatoris, vel ab intestato, & dispositione Legis succedit: ut colligitur ex *l. 59. &c 62. ff. de R. J.* Talis in omni testamen-

mento debet institui, unus, vel plures, ex §. 4. Inst. de hæred. instit. sub quacunque verborum formula, l. 15. C. de testam. purè, vel conditionatè, ex §. 9. Inst. & l. 6. ac seqq. ff. de hæred. instit.

RESOL. II. Hæres ex testamento alius<sup>162</sup> est necessarius, alius voluntarius. Hæredes necessarii olim generatim dicebantur illi, qui in testamento scripti, nolentes volentes debebant adire hæreditatem: & isti subdividebantur in necessarios suos, & necessarios non suos. Necessarii sui erant, qui immediate existebant in patria potestate Defuncti tempore mortis, utpote filii, filiaeque, ac in horum defectu nepotes, neptesque. Necessarii non sui erant mancipia, seu servi, qui hoc ipso, quod à Domino scripti fuerint hæredes, consequebantur libertatem, sed cum onere adeundi hæreditatem, ut, cùm bona hæreditaria fuerint posteà subhastata, id in servum, non in dominum redundaret. Hæredes Voluntarii, seu Extranei erant cæteri omnes, etiam liberi emancipati, imò & non emancipati, in casu hæreditatis maternæ. §. 3. Inst. de hæred. qualit.

RESOL. III. Hodierno Jure per Hæredes<sup>163</sup> necessarios intelliguntur omnes & soli illi, qui in testamento, saltē quoad Legitima, necessariò debent hæredes institui;

vel

vel ex hæredari. Quòd si jam tales sint, ut in paterna potestate testatoris sint constituti, velut liberi non emancipati, & illis præmortuis nepotes, dicuntur *Hæredes necessarii sui*; si autem sint extra patriam testatoris potestatem, veluti liberi emancipati, & deficientibus descendantibus ascenden-tes, dicuntur *Hæredes necessarii non sui*. *Hæredes Voluntarii* verò, seu *Extranei*, dicuntur omnes illi, qui in testamento hæredes institui necessariò non debent; quales, ut videbimus, sunt omnes, exceptis descendantibus, & descendantibus.

*Punctum II. Quinam possint, & non possint esse Hæredes?*

164. RESOL. I. Regula communis est, quòd illi omnes possint designari hæredes, qui degunt in vivis, neque de Jure positivo facti sunt hæreditatis accipiendæ incapaces. Et quidem non solùm personæ singulares, sed etiam in communi, v. g. pau-  
res, orphani &c. l. 46. & 49. C. de *Episcop.*  
& *Cleric.* Civitates, & municipia, l. 12. C.  
*de hæred. instit.* Oratoria, Hospitalia, Mona-  
steria, Conventus, & Congregationes  
utriusque sexus Regularium, arg. ll. citt.  
& Concilii Trident. sess. 25, cap. 3. de *Regu-*  
*lar.* nisi sit exceptio specialis, ut in eodem  
cap. de Ordine FF. Minorum. Quin etiam  
hæres institui potest DEUS, & Cœlites,  
l. I.

*l. i. §. 5. ff. ad L. Falcid.* quibus relicta impendenda sunt in DEI cultum, Sanctorum veneracionem, alimenta pauperum &c.

RESOL. II. De Jure Civili hæreditatis<sup>165</sup> simpliciter incapaces sunt I. Deportati, *l. i. C. de hæred. instit.* II. Liberi perduellum, *l. 5. §. 1. C. ad L. Julianam Majest.* III. Damnati ad ultimum supplicium, *l. 29. ff. de Pœnis.* IV. Damnati ad metalla, & ad triremes, *l. 3. ff. de his, quæ pro non scriptis &c.* V. Qui occidit testatorem, *l. 7. §. penult. ff. de bonis damnat.* VI. Hæretici non tolerati, & apostatae à fide Christiana, *auth. Credentes, C. de hæret. & l. 3. C. de apostat.* Demum VII. Universi illi, qui ob delictum prohibiti sunt testari, de quibus *cap. præc. §. 3. Punct. 3.* actum est.

RESOL. III. Eodem Jure hæreditatis<sup>166</sup> secundum quid incapaces sunt I. Filii, & filiae naturales, utpote qui, extante prole legitima, solum possunt hæredes à patre scribi in uncia, *l. 2. C. de natural. liber.* deficiente autem prole legitima, etiam possunt scribi hæredes ex asse, *Novell. 89. cap. 12.* II. Filii spurii, seu geniti ex thoro damnato, qui nequeunt à parentibus institui hæredes, sicut nec ab intestato succedunt, *authent. Licet. C. de natural. liber.* Attamen avus nepotem spurium ex filio legitimo natura, aut ex filio spurio legitimè genitum,

non

non prohibetur instituere, secundum Theologos communiter; cuius rationem dat Haunold tract. 6. cap. 5. num. 276. quia haec poena solum infligitur illi, qui deliquit, & respectu cuius deliquit; atqui in primo casu avus omnino non deliquit, in altero deliquit quidem respectu filii, at non respectu nepotis: Ergo in neutro casu prohibetur nepotem scribere haeredem. Excipe, si natus sit ex filio incestuoso, hoc est, nato ex matrimonio inito inter consanguineos, vel affines intra gradum prohibitum, absque dispensatione; hic enim prohibetur etiam ab avo institui, l. 6. C. de incestu nupt.

167      RESOL. IV. De Jure Canonico haereditatis simpliciter incapaces sunt I. Percussores, ac hostiles persecutores Cardinalem, cap. ult. de pœn. in 6. II. Fratres Minores, juxta Clem. Exivi. §. Quia igitur de V. S. ubi ratio additur; Quia in successionibus transfit non solum usus rei, sed & dominium suo tempore in haeredes; Fratres autem prefati nihil sibi in speciali acquirere, vel eorum Ordini possunt, etiam in communi. Unde haec constitutio solos illos FF. Minores concernit, qui regulam pure, & sine dispensatione profitentur, ideoque vi altissimæ paupertatis omnis omnino dominii tam in communi, quam in particulari incapaces existunt, uti sunt Fratres

tres Minores de Observantia, & Capucini,  
per Tridentinum cit. Sess. 25. de Regular. cap. 3.  
III. Religiosi Professi, & Coadjutores for-  
mati Societatis IESU; inter quos, & alios  
Religious, bona immobilia in communione  
possidentes, hoc vertit discrimen, juxta  
Layman cit. lib. 3. tract. 5. cap. 5. & Haunold.  
cit. à num. 281. quod priores nec pro se, nec  
eorum intuitu Collegia, vel Domus Socie-  
tatis, possint hæredes institui, juxta p. 6.  
Constit. cap. 2. §. 12. quamvis ipsa Collegia,  
& Domus, etiam Professæ, sint hæreditatis  
capaces; ast posteriores possint etiam im-  
mediate hæredes institui, per l. ult. §. 1. Cod.  
de Episc. & Cleric. sic tamen, ut cum dominii  
rerum in particulari incapaces sint, eorum  
nomine Monasteriū succedat; quod etiam,  
ignorante vel invito Religiouso, hæredita-  
tem adire potest, ipse vero non nisi ex Prä-  
lati, aut Monasterii licentia, arg. cap. si Reli-  
giosus 27. de elect. in 6.

Punctum III. Quinam igitur defacto sint ne-  
cessarii Hæredes ex testamento?

RESOL. I. Hæredes necessarii ex testa- 168  
mento sunt I. omnes liberi legitimi & sui re-  
statoris, sive filii, sive filiae; si enim liberi  
in proximo gradu, & patria potestate con-  
stituti, neque instituantur, neque nomina-  
tim exhæredentur, testamentum ex princ.  
Inst. de exhæredat. liber. est penitus inutile, ita

L

ut

ut nemo ex eo testamento hæres esse possit. Evidem de Jure veteri poterant filiæ à parentibus, imò & filii à Matre, & ascendentibus maternis, salvô testamentô, præteriri, absque exhæredatione expressa: solùmque poterat testamentum illud in priore casu per remedium possessionis bonorum contra tabulas, in posteriore per querelam in officiosi testamenti à liberis præteritis infirmari; ast de Jure novo communior Sententia apud Haunoldum cap. 7. num. 383. § 84. asserit testamentum in utroque casu esse ipso Jure nullum, saltem si ipsi non fuerit inserta præteritionis causa; nam de primo habetur textus expressus in §. 5. *Inst. de exhæredat. lib.* De altero etiam sat clarus textus habetur in *Novell. 115. cap. 3.* ubi decernitur, non licere penitus Patri vel Matri, aut avo vel aviæ, proavo vel proavia, suum filium, vel filiam, vel cæteros liberos præterire, aut exhæredes facere in suo testamento (extra scilicet ingratitudinis causas ibi recensas) & paulò infrà: Si autem hæc observata non fuerint, nullum exhæredatis liberis præjudicium generari, sed quantum ad institutionem hæredum pertinet, testamento evacuato ad parentum hæreditatem liberos tanquam ab intestato ex æqua parte pervenire &c. Excipiunt DD. frequentius casum, quō Filius, vel Filia hæreditati paternæ renunciavit quam renunciationem, saltēm si fuerit jurata,

rata, etiam apud filias valere, si non de Jure Civili stricto, certè ex æquitate, docet præxis hodierna) tunc enim sine vitio nullitatis in testamento sive paterno, sive materno, præteriri potest, cum neque succedat ab intestato; uti pluribus *citt.* P. Schmier *d. c. i. num. 162.*

RESOL. II. Hæredes quoque necessarii *169* ex testamento sunt *H. liberi legitimati* per subsequens Matrimonium; hi enim jus suitatis consequuntur per *Nov. 12. cap. ult.* ac pari jure cum filiis legitimè natis habentur, per *Nov. 89. cap. 8. in pr.* Idem est de legitimatis per Rescriptum Principis, si tempore legitimacionis nulli extiterint liberi legitimi, vel in Rescripto de jure suitatis mentio facta fuerit. Schmier *l.c. num. 142.*

RESOL. III. Quamvis aliud fuerit de *170* Jure veteri; tamen de Jure novo etiam *H. liberi emancipati* (quales in Germania censentur, postquam Matrimonium iniérunt) sunt Hæredes necessariò instituendi, vel exhæredandi; ità ut aliter testamentum sit ipso Jure nullum. Ità post Molinam, & alios à se citatos Haunold. *num. 394.* Tam quia Imperator in *præcitat. s. 5. Inst. de exhæredat. lib.* postquam retulit *Jus antiquum, Jus novum* declarans ait se velle: *ut omnes sive sui, sive emancipati sint, vel hæredes instituantur, vel nominatim exhæredentur:* Ergò sicut nullum est

testamentum, præteritis liberis suis, ita & præteritis liberis emancipatis. Tum quia in *cit. Novell. 115.* nullum planè fit discriminem inter liberos suos, & emancipatos; ut adeò in ordine ad hunc effectum liberi emancipati pro non-emancipatis habeantur.

171      RESOL. IV. Sunt etiam Hæredes necessarii ex testamento IV. *liberi adoptivi;* Jure antiquo quidem indiscriminatim omnes; Jure noviori autem soli adoptati ab Ascendentium aliquo, si adoptio usque ad mortem adoptantis duraverit. *L. penult. Cod. de adopt.* Circa arrogatos Jus antiquum manasse in vigore, ait Schmier *cit. num. 140.* sed Haunold negat eos præteritos posse nullum dicere testamentum, sed solum consequi quartam partem bonorum arrogatoris, ex *Constitut. D. Pii.* Vide eum *num. 398.* V. *Liberi postbumi, ex l. 3. ff. de injusto rupto.* idque verum est tam de posthumis naturaliter, quam juridicè talibus, seu post testamentum conditum natis, aut adoptatis. Schmier *num. 144.* Interim posthumis præteritis, testamentum non est statim ab initio nullum, sed rumpitur agnatione posthami, si is non moriatur ante testatorem, per §. I. *Inst. de exhæred. lib.* VI. Etiam *Nepotes, Neptes, Pro-nepotes, & Proneptes,* aliique descendentes cu-juscunque gradūs, ex filio præmortuo geniti; nam hi omnes per §. 5. *Inst. de exhæred. lib.*

lib. I. ult. Cod. de liberis præterit. Novell. 115.  
cap. 3. & Nov. 118. cap. 1. cum liberis primi  
gradus, pro casu prædecessionis eorum,  
coæquantur.

RESOL. V. In defectu Descendentium 172  
tantum Hæredes necessarii ex testamento,  
VII. sunt proximi Ascendentes testatoris; ita  
ut aliter factum testamentum, vel sit ipso  
Jure nullum, vel saltem proposita ab illis  
querelâ inofficiosi rescindibile. Esse ipso  
Jure nullum, contendit quidein Haunold,  
favente Reiffenstuel, ex verbis Novell. 115.  
cit. cap. 4. ubi postquam dixerat: *Sancimus non licere liberis parentes suos præterire, aut quolibet modo à rebus suis, in quibus habent testandi licentiam, eos omnino alienos facere, nisi causas, quas enumeravimus, specialiter in suis testamentis nominaverint, vel descripserint.* Infrà  
§. 9. subjungitur: *Si autem hæc omnia non fuerint observata, nullam vim hujusmodi testamentum, quantum ad institutionem hæredum habere sancimus, sed resciſſo testamento, eis, qui ab intestato ad hæreditatem Defuncti vocantur, res ejus dari disponimus.* Verum ex hoc ipso verbo resciſſo concludit P. Schmier d. cap. 1.  
num. 176. testamentum non esse ipso Jure  
nullum, sed tantum rescindi, non ex toto,  
sed quoad solam hæredis institutionem,  
salvis legatis, & aliis capitulis, ut ibi ad-  
ditur. Dixi: *In defectu Descendentium tan-  
tum;*

tum; nam talibus existentibus, Ascendentes nullo modo sunt hæredes necessarii, per clarum textum in *cit. Nov. 118. cap. 1.* ubi Ascendentes à successione per extantes Descendentes penitus excluduntur. Unde *Novella 115.* præcita debet intelligi de casu, quô nulli extant Descendentes; sic enim Jura Juribus conciliantur.

*Punctum IV. An ergo fratres, & sorores, item conjuges ad invicem, non sint Hæredes necessarii?*

373      RESOL. I. De Jure communi regulariter fratres, & sorores liberè possunt in testamento præteriri, sive adsint consanguinei de linea Descendentium, vel Ascendentium, sive non; quia nulla lex ad aliquid eis relinquendum adstringit, ut contra Nicol. Hertium, & P. Pichler ex receptissima sententia concludit, & demonstrat Clariss. D. P. Böckn. *cit. num. 53.* Unicus in Jure excipitur casus, quô quis instituisse personam turpem, id est, infamiam Juris, vel facti laborantem, ut sunt meretrices, concubinarii, mimi, lenones, filii Presbyterorum, adulterini, incestuosi, &c. tunc enim fratribus, ac sororibus consanguineis, id est, ex eodem Patre cum testatore genitis, sive eandem, sive diversam matrem habentibus (non autem uterinis tantum) in testamento prætermisssis, competit actio ad rumpendum testamentum per querelam in-

inhofficiosi, per l. 27. C. de inoff. testam. Quòd si tamen in tali testamento fratribus, & sororibus esset relicta sua legitima, deberent esse contenti, nec possent dictum testamen-  
tum quoquo modo impugnare.

RESOL. II. Conjuges sibi invicem non 174 sunt Hæredes necessarii ex testamento; cùm nullum de hoc Jus extet, imò illi regulariter sibi invicem neque succedunt ab intestato, nisi post omnes agnatos, & cognatos. In casu tamen, quò conjugi superest alteri de Jure succederet quoad portionem aliquam ab intestato, si fuerit in testamento prætermisssus, potest illam petere ab hærede instituto, vel conditione ex lege, vel extraordinaria bonorum possessione, ut opinatur Manzius, & post ipsum Schmier, & Haunold.

Punctum V. *Quantum itaque Hæredibus necessariis sit relinquendum in testamento?*

RESOL. I. Certum est, nullum testa- 175 torem teneri hæredes suos necessarios in tota sua substantia instituere, neque in toto illo, quod illi consecuti fuissent ab intestato; nimis quippe durum foret, testatori omnem liberam tollere potestatem etiam de aliis post mortem bene merendi. Unde satisfacit, si illis portionem à Jure definitam, quæ propterea vocatur Legitima, reliquerit; quò præstito, poterit de reli-

qua substantia liberè disponere, eāmque  
aliis sive titulō hæredis, sive legati, sive fi-  
deicommissi, aut donationis mortis causā  
relinquere, salvo hæredibus Jure falcidiæ,  
aut Trebellianicæ, de quibus infrà.

176 RESOL. II. Jure noviore, Legitima re-  
spectu liberorum est triens, seu tertia pars  
totius hæreditatis relictæ, si sint pauciores,  
quām quinque: sin verò sint quinque, aut  
ultra, est semis, seu dimidia pars bonorum,  
quæ deductis ære alieno & expensis fune-  
ris, habituri fuissent simul, si successissent  
ab intestato. Ità sublato Jure antiquo, in  
quo quadrans fuerat generaliter determi-  
natus. *Novell. 18. cap. 1. & Authent. Novissima,*  
*Cod. de inofficiis. testam.* Inde vulgares illi  
versiculi:

*Quatuor, aut infra dant natis Jura trientem;*  
*Semissēm verò dant natis quinque, vel ultra:*  
*Arbitrium sequitur substantia cetera Patris.*

177 RESOL. III. Etiam Nepotibus, quorum  
parentes jam sunt mortui, debetur legitima,  
ita quidem, ut si cum filiis testatoris  
seu ut vocant, *Thiis*, id est, patruis suis con-  
currant, tunc præfati nepotes, sive multi  
sint, sive pauci, non plus acquirant, quām  
accepisset eorum Pater, quem repræsentant;  
adeoque non possunt cum filiis ad compu-  
tandam legitimam plūs augere numerum,  
quām

quām auxisset eorum Pater. Si verò soli Nepotes existant, tunc vel ex diversis filiis aut filiabus, vel ex uno tantūm filio vel filia præmortua testatoris? Si ex diversis, non faciunt majorem numerum, quantum ad legitimam, quām fecissent eorum parentes; nam etiam ab intestato tunc succederent in stirpes, & non in capita: si verò ex uno eodemque, tunc quia succedunt in capita, & in propria persona, faciunt numerum, capiuntque legitimam, ac si essent veri filii testatoris. Haunold *num. 499.*

RESOL. IV. Si sint plures liberi, sed <sup>178</sup> unus aut aliqui eorum non succedant, puta vel quia sunt justè exhæredati, vel quia incapaces facti v. g. per ingressum in Religionem successionis incapacem, aut per renuntiationem, aut per repudiationem hæreditatis, aut per statutum; tunc isti probabilius non computantur in numero ad augendam, vel minuendam legitimam aliis, qui succedunt, sed habentur pro non extantibus vel mortuis. Ideoque si liberi sint quinque, & unus illorum exhæredatus, legitima non est semis, sed triens, ac si solum essent quatuor. Schmier *num. 225.* & in re Haunold *num. 493.* ubi tamen quoad renuntiationem advertendum, quod si hæres necessarius renuntiet hæreditati, eò quod portionem suam jam acceperit in vita testa-

L 5 to-

toris, non habeatur pro mortuo, sed debet nihilominus titulo hæredis in legitima institui, non ut de novo aliquid accipiat, sed ut jam acceptum in legitimam computetur. Quod si illud acceptum fuerit minus legitimâ, potest institutus agere ad complementum legitimæ, non verò testamentum dicere nullum, vel per querelam inofficiosi impugnare. Reiffenst. loc. cit. num. 454.

**179** RESOL. V. Etiam filiorum adoptivorum, & deficientibus Descendentibus, Parentum aliorumve Ascendentium, legitima est triens, & quidem universaliter, quia plures Parentes respectu unius testatoris, quam quatuor, nunquam erunt. Colligitur ex clausula finali *cit. Novellæ 18.* ubi dicitur, id quod de liberis constitutum est, in omnibus personis observandum esse, *in quibus ab initio antiquæ quartæ ratio de inofficio legge decreta est;* atqui tam filii adoptivi, quam Parentes in defectu descendentium, nisi quarta eis relicta fuerit, habebant querelam inofficiosi: ergo. Hic tamen ex Fachneo, Tuscho, Berlichio, Reiffenstuel num. 450. & aliis advertendum, per *trientem,* ubi agitur de legitima Parentum, non semper intelligi tertiam partem totius hæreditatis, sed solùm tunc, quando nulli extant fratres aut sorores germani, vel extantes à

ce-

testatore fuerunt præteriti; si autem hi simul cum parentibus fuerint instituti, legitima Parentum solum esset tertia pars illius portionis hæreditariæ, quam accepissent ab intestato: consequenter cum ab intestato una cum extantibus fratribus ac sororibus germanis solum successissent æqualiter in capita, legitima Parentum foret solum tertia pars illius portionis, sibi ex æquali divisione cum fratribus & sororibus obvenientis.

Punctum VI. *An testator licet uni ex suis liberis majorem hæreditatis portionem assignet, quam alteri; & quid de collatione bonorum?*

RESOL. I. Salvâ semel legitimâ, & singularis illius portionibus, sicut potest testator in reliqua bonorum suorum parte licetè aliquem extraneum hæredem scribere, aut legatarium, vel fideicommissarium, sive de natarium; ita etiam, & à fortiori poterit de illa in favorem unius ex liberis licetè disponere, vel totam, vel majorem, quam alii, portionem ejus eidem assignandô; dummodo non faciat ex odio vel passione in alios. Communis; & patet ex l. 8. Cod. de inoff. testam. ubi dicitur: *Parentibus arbitrium dividendæ hæreditatis inter liberos adimendum non est.*

RESOL. II. Collatio bonorum nihil aliud est, quam illatio lucri, à vivo paren-

te

te profecti, in communem hæreditatem, facienda à liberis succendentibus post mortem parentis, ut æqualis bonorum divisio inter hæredes fieri queat. Olim in sola successione ab intestato moris erat; Jure verò novo Authenticarum ac Novellarum etiam ad liberos ex testamento suis Parentibus succedentes fuit extensa, nisi Parens testator contrarium expressè statuerit, significandō, se nolle, ut aliquid à liberis in hæreditatem conferatur, sed relinquere illis ut prælegata; prout habetur præfertim in *Novell. 18. cap. 6.*

182      RESOL. III. Conferendum est omne, & solum lucrum liberorum, ab eo parente, cui succeditur, adhuc vivo profectum, per l. 17. § 19. C. de collat. Unde sola dos profectitia, & donatio propter nuptias, quas pater filiæ, vel filio sibi succedenti constituit, conferenda est, non item ea, quæ à matre provenit, nisi quando filia matri succedit: Multò minùs tenetur filius conferre bona adventitia, quorum proprietas omni jure ad ipsum pertinet, neque bona castrensia, aut quasi castrensia, per l. 3. §. 15. ff. eod. tit. Et ideo etiam à collatione libera sunt omnia à filio ex Clericatu, artibus liberalibus, officio Aulico, Notariatu &c. comparata; imò & sumptus studiorum, artiumque mechanicarum ad-

di-

discendarum : nec non impensæ factæ ad visitationes Provinciarum , Primitias, installationem in Beneficio. Idem censem. Haunold num. 580. de donationibus simplicibus filio à parente factis , nisi alter filius debeat conferre donationes propter nuptias , vel filia dotem. Vestimenta tamen , & ornamenta nuptialia, quæque à parentibus in liberos ad instruendam , vel sublevandam œconomiam data sunt : sicut & illud patrimonium , quod pater dedit filio ad ingressum Religionis, vel suscep-<sup>181</sup>tionem SS. Ordinum, cum se habeat instar do-  
tis, conferenda sunt. Schmier n. 142.

Punctum VII. *Qualiter Legitima Hæredibus necessariis sit relinquenda?*

RESOL. I. Legitima debet Hæredibus 183  
necessariis relinquere titulō institutionis, seu hæredis , adeò , ut , si uni alio titulo , v. g. legati , fideicommisi &c. relinquatur, is testamentum quoad hæredis institutionem possit dicere nullum , arg. §. 5. *Inst. de exha-  
red. lib.* Potest tamen ipsis pro legitima res certa , vel certa pars assignari , dummodo portionem Legibus debitam attingat ; & si non attingat , potest Hæres necessarius agere ad supplementum legitimæ , juxta-  
§. 3. *Inst. de inoff. test.* & *Novell. 115. cap. 3.*

RESOL. II. Est quoque Legitima Hæ- 184  
redibus necessariis relinquenda absque omni

ni onere, gravamine, & conditione odiosa, secundum communem DD. cui favet l. 32. C. de *inoff. testam.* ex qua tamen colligitur, quodsi contrarium contingere, testamentum non posset per querelam inofficiosi impugnari, sed conditio, seu onus haberetur pro non adjecto. Nec obest, quod l. fin. ff. de *condit. instit.* etiam haeres suus dicatur posse institui sub conditione potestativa; hoc enim intelligendum respectivè ad eam portionem haereditatis, quæ legitimam excedit. Schmier cap. i. n. 287.

Punctum VIII. *Quid sit Exhaeredatio, & qualiter, ac quas ob causas facienda?*

185      RESOL. I. Exhaeredatio est actus, quod personæ, alias necessariò instituendæ, ob commissam ingratitudinis causam à successione excluduntur. Quæ, ut valeat, debet I. exprimi nomen, aut agnomen Exhaeredati, aut æquivalens demonstratio ponni. II. Debet esse exclusio à totali, & non tantum partiali haereditate. III. Debet fieri ex certa scientia, & consulto. IV. Facienda est ex causa quadam ingratitudinis, in Novell. 115. cap. 3. expressa, quarum quatuordecim ibi enumerantur pro exhaeredatione liberorum, & cap. seq. octo pro exhaeredatione parentum, statim recensendæ. V. Illa causa nominatim inserenda est

est testamento, & ab hærede scripto probanda.

RESOL. II. Causæ ingratitudinis, ob 186.  
quas parentes suos liberos exhæredare possunt, à Justiniano in *d. Novell. 115. cap. 3.* enumerantur quatuordecim sequentes. I. Injectio violenta manuum. II. Injuria quælibet gravior, etiam verbalis. III. Si vitæ parentum struxerint insidias. IV. Si eos capitalis criminis accusaverint. V. Aut per delationem grave damnum ipsis intulerint. VI. Si parentem ab hoste captum, cum potuissent, non redemerint. VII. Aut carceri inclusum fidejussione liberare noluerint; quod tamen ad solos filios pertinet, non ad filias. VIII. Si parentis furiosi curam non habuerint. IX. Si cum noverca, vel patris concubina se carnaliter filius miscuerit. X. Si parentes testari prohibuerit. XI. Si se mimis, vel XII. maleficiis, parentibus invitîs, junxerit. XIII. Si ad hæreticos desciverit. XIV. Si filia vitam meretriciam infra annum 25. duxerit. Quas omnes memoriarum jurandarum causâ his versibûs intimamus:

*Bis septem ex causis exhæres filius esto;*

I. *Si patrem verbis, II. verberibusve gravet.*  
*III. Nec redimat captum, IV. linquat si carcere clausum;*

*V. Præsumat patrium si violare thorum.*

VI.

VI. *Si, suprema pater ne prodat sensa, resistat;*

VII. *Aut curam amentis spernat habere pa-*  
*tris.*

VIII. *Insidians vitæ IX. capitalis criminis actor;*

X. *Aut Delator opum damna pudenda ferens.*

XI. *Si mimos, XII. hominésque magos, XIII.*  
*sextámque sequatur;*

XIV. *Filia si Venerem luxuriosa colat.*

Porrò octo causas, ex quibus vicissim licet  
liberis exhæredare parentes, per quatuor  
disticha, nullius explicationis indigentia,  
communicamus :

*Ex octo licitum causis removere parentem :*

I. *Præsumat Nati si violare thorum.*

II. *Negligat amentem. III. Si dogmata falsa se-*  
*quatur.*

IV. *Captivóque neget si malè fidus opem.*

V. *Insidias Nati vitæ si struxit iniquus.*

VI. *Aut matri innocuae fata cruenta paret.*

VII. *Si sobolem genitor testandi pellat ab actu,*

VIII. *Deferat aut stricto Judicis ipse fo: o.*

An verò præter has dentur aliæ etiam cau-  
sæ justæ, liberos, vel parentes respectivè  
exhæredandi,

*Causidici certent quorum est decidere litem.*

Punctum IX. *An Falcidia, & Trebelliani-  
ca sit idem, ac legitima; vel, an saltem cum le-  
gitima singulariter detrahi possit à liberis testa-  
toris?*

RE-

RESOL. I. *Falcidia, & Trebellianica null. 187*

Io modo sunt idem cum legitima liberorum; nam legitima competit solis Hæreditibus necessariis ex ipso Jure naturæ, ob summæ conjunctionis vinculum, & quasi identitatem cum testatore; at Falcidia, & Trebellianica est communis etiam Hæreditibus voluntariis, sicutque originem habet ex Jure Civili, ob longè aliam rationem, scilicet, ne hæreditibus scriptis, quos subin contingit legatis, donationibus mortis causâ, & fideicommissis, tum universalibus, tum particularibus nimium gravari, aditio hæreditatis ultra modum difficilis evadat.

Itaque

RESOL. II. *Falcidia (cujus nomen à C. 188*  
Falcidio Tribunoplebis, & Legis hujus  
Authore appellatum est) est quarta pars  
bonorum testatoris, quam, deducto ære  
alieno, & expensis funeralibus, permisum  
est hæredi instituto, nimiis legatis grava-  
to, detrahere s. 2. & 3. *Inst. de L. Falcid.* ubi  
per legata etiam fideicomissa particularia,  
& donationes mortis causâ intelliguntur.  
De Jure communi tamen potest testator  
detractionem Falcidiæ de legatis &c. ex-  
pressè prohibere, &, si prohibet, locum  
non habet, per Autent. Sed cum testator. C.  
ad L. Falcid. & Novell. i. cap. 2. quod etiam  
ad Trebellianicam extendendum voluit.

M

Mo-

Molina, Petrus Waddingus, Hunnius, Haunold num. 378. & alii. Item, si hæres sit profanis, & legata sint ad causam piam, locum Fal'cidiæ non esse, textus rotundus est in *Authent. Similiter. Cod. e. t. Secūs* est, quando etiam hæres est causa pia, ut latius videri potest apud Clariss. D. P. Böckn *hic num. 122. & seqq.* Demum, licet hæres sit causa pia, perdit jus deducendi Falcidiam, & tenetur solvere legata, & debita etiam ultra vires hæreditatis, si hæreditatem adiit, neglecta confectione inventarii; Trebellianicam tamen non amittit, teste Haunold *nam. 394.*

189      RESOL. III. *Trebellianica* (quæ à Trebelliano Senatusconsulto dicta est) pariter est quarta pars bonorum testatoris, quam deductis funeralibus, & ære alieno, de Jure potest hæres fideicommisso universali nimium gravatus, detrahere, per §. 7. *Inst. de fideicommiss. hæredit. & l. 3. C. ad Sctum Trebell.* Inter Falcidiam, & Trebellianicam, licet in aliis fermè omnibus convenient, hoc notabilis discriminis intimatur *l. 91. ff. ad L. Falcid.* quod in quartam Falcidiae solum computentur res, quas hæres capit Jure hæreditario, non autem, quas Jure legati, vel fideicommissi, vel implendæ conditionis causâ; At verò in quartam Trebellianicæ imputentur omnia, quæ hæredi

di quocunque Jure , sive hæreditario , sive  
alio cuiuslibet nominis debentur. Unde  
Falcidia favorabilior est hæredi, quàm Tre-  
bellianica.

RESOL. IV. Si contingat , Hæredem <sup>190</sup> necessarium , cui legitima debetur , adeò  
gravari legatis , vel fideicommissis , aut  
donationibus mortis causâ , ut post dedu-  
ctam legitimam , ex suppositione solutio-  
nis illorum , sibi non remaneat quarta pars  
reliquæ substantiæ testatoris ; potest is unà  
cum legitima etiam quartam Falcidiæ , vel  
Trebellianicæ detrahere , Legatariis , aut  
Fideicommissariis ex massa post legitimam  
deductam residua solo dodrante restituto.  
Ita Canonistæ , & Legistæ orthodoxi ferè  
communiùs contra Acatholicos simpliciter  
negantes , & Andream Gaill negantem so-  
lum circa legata purè , & sinè conditione  
relicta. Favet apertè Jus Cañonicum in  
*cap. Raynutius* , & *cap. Rainaldus* , *de testam.*  
ubi Pontifex confirmat , & approbat senti-  
entiam Judicis delegati , qui pronuntia-  
verat , legitimam restitutioni non fuisse  
subjectam , & insuper Trebellianicam de-  
trahi potuisse. Et licet in ea facti specie  
filius fuerit rogatus sub conditione hære-  
ditatem restituere ; Pontifex tamen in *citt.*  
*capp. se* in hoc non fundavit , sed in eo , quod  
filius in legitima gravari non potuerit , ut-

pote Jure naturæ debita; nec à Trebellianica excludi, cùm eandem quilibet Extraneus, restitutione hæreditatis gravatus, deducere queat. Unde sic argumentari licet: quando eidem Personæ diversa Jura accidunt, illa est censenda jure duorum, quorum vices sustinet, *arg. l. 3. ff. de adoptio i. at qui legitima, & falcidia vel Trebellianica accidunt liberis ex diversis Juribus, illa ex Jure naturali, ista ex Jure Civili: ergo utrāque debent gaudere.* Favet etiam Jus Civile, dum *l. 8. §. 14. ff. de inoffic. testam.* decidit, quòd si filius fideicommisso gravatus, testamentum paternum tanquam inofficium impugnet, & succumbat, solam legitimam perdat, non autem Trebellianicam; quæ pœna inepta foret, nisi extra easum succumbentiæ, filius gravatus legitimam simul cum Trebellianica deducere posset. Accedit, quòd Trebellianica solum detrahatur ex bonis, quæ sunt in hæreditate; legitima autem propriè non continetur in bonis hæreditatis, sed eam filius accipit jure proprio, ac in natura fundato, quasi æs alienum, ut uno ore clamant Juristæ.

191      Nec dicas I. Filio non deberi legitimam, nisi in quantum hæredi: consequenter æquè Jure hæreditario, ac Trebellianicam. Nam contrà est; quia esto Filius legitimam accipiat quæ hæres, non tamen exili-

libero judicio defuncti, sed ex quadam obligatione naturæ, non quidem quoad istam quantitatem, attamen quoad substantiam. Deinde posset filius, acceptâ legitimâ, ab hæreditate abstinere, & sic non esse hæres in actu secundo.

Nec dicas II. Juxta l. 159. ff. de R. f. non posse eandem rem duobus titulis lucrativis acquiri: ideoque nec quartam titulô legitimæ simul, & Trebellianicæ. Nam negatur suppositum I. Quod legitima aceipiatur titulô lucrativô, cùm sit per modum æris alieni. II. Quod hic eadem quarta duobus titulis acquiratur; nam alia est quarta, vel potius (Jure novo) tertia legitimæ, alia est quarta Trebellianicæ, utraque alio ex titulo acquirenda.

Nec dicas III. quod l. 6. in princ. Cod. ad SCtum Trebell. filius hæres, à testatore rogatus portionem hæreditatis paternæ fratribus suis restituere, jubeatur ex Sententia allegati Senatusconsulti, retentâ quartâ Trebellianicâ, dodrantem illius portionis paternæ restituere; quod non fieret, si etiam legitimam sibi reservaret; nam sic semissem solūm illius portionis restitueret, ut consideranti patebit.

Nam contrâ. Intentum Senatusconsulti non fuit, ut filius restituat dodrantem totius portionis cumulatæ ante detraciam

legitimam, sed restantis post eam detra-  
ctam; nam alias Trebellianica potius fu-  
set nociva filio, quam utilis, cum legitima  
Trebellianicam ex jure moderno tota un-  
ciā excedat.

**192**    RESOL. V. Si plures sint scripti hære-  
des finē certis partibus, & omnes legatis  
vel fideicommissis onerati, simul omnes de-  
trahunt unam quartam, eāmque inter se  
dividunt, pr. *Inst. de L. falcid.* At si solum ali-  
qui sint gravati, illi soli detrahunt quar-  
tam ex portione legatis aut fideicommissis  
gravata. Ex. gr. Titius & Sejus æquis par-  
tibus sunt instituti hæredes in hæreditate  
200. aureorum, Titius verò solus est dām-  
natus ad solvendos pro legatis 100. aureos,  
qui forent integra hæreditatis ipsius por-  
tio, potest ab his deducere, sibique retine-  
re 25. aureos. Quod si Titius omnino re-  
pudiet hæreditatem adeò gravatam, ea ac-  
crescit alteri hæredi non gravato, qui cum  
etiam soluti legatis, adhuc retineat semi-  
sem totius hæreditatis, non est, cur ab eis  
solvendis deobligetur; ut patet ex l. 87. §. 4.  
*ff. ad L. falcid.*

Punctum X. Quid si hæres necessarius, vel  
voluntarius instituatur in re certa, v. g. in domo  
aut prædio testatoris, vel 1000. fl.?

**193**    RESOL. I. Si unicus sic hæres institu-  
tus, non obstante ista modificatione, cen-  
se-

setur hæres ex asse, & succedit in Jus universum testatoris, per l. i. §. 4. ff. de Hæred. instit. dummodo testator usus fuerit nomine hæredis; secùs enim illa res certa censetur velut legatum codicillô relictum. Quòd si testator expressè declaret, hæredem hunc debere illâ re certâ esse contentum, putant aliqui cum Haunoldo num. 304. testamentum non valere, sed hæredes ab intestato debere illam rem ut legatum restituere hæredi instituto; sed Reiffenstuel num. 425. cum aliis reclamat, suffultus cit. l. i. §. 4. ff. de Hæred. instit. & l. 74. ff. eod. ex quibus constat, testatorem noluisse totam hæreditatem hæredi instituto relinquere, & tamen à Jure eidem adjudicatur; quia nempe *nemo potest in suo testamento cavere, ne leges in suo testamento locum habeant*, ut dicitur l. 55. ff. de legat. i.

RESOL. II. Si plures sint hæredes scri- 194  
pti in re certa sive æqualis, sive inæqualis valoris, tunc singuli rem sibi assignata accipiunt tanquam prælegatum, in reliquo æqualiter succedentes velut hæredes ex asse, arg. l. 35. ff. de Hæred. instit. Si autem unus solùm vel plures sint instituti in re certa, alius verò vel alii indefinite, aut in determinata parte, v. g. semisse hæreditatis, tunc videndum, an omnes hæredes sint Extranei, an verò unus aut plures eorum.

hæredes necessarii. Et in primo casu, illi in re certa instituti, habentur solum pro Legatariis, quod titulō capiunt rem sibi assignatam, reliquis in tota hæreditate æqualiter succendentibus, textu clarō in l. 13. Cod. de hæred. instit. In altero vero casu, illi in re certa instituti, rem sibi assignatam capiunt titulō hæredis; quia cum sint hæredes necessarii, possent alias testamentum dicere nullum, velut in testamento præteriti, cuius oppositum statuitur expressè in Novell. 115. cap. 5. Communis cum Reiffenst. num. 427. & seq.

Punctum XI. *Arē valeat institutio, quæ alieno committitur arbitrio?* E. g. Instituo hæredem, quem Parochus meus nominaverit. Vel: Titius hæres esto, si Sempronius voluerit.

**195** RESOL. I. Si institutio hoc modo fiat ad causas profanas, non valet. Ita expressè deciditur in l. 32. ff. de hæred. instit. ubi etiam hæc ratio datur, quod jura testatorum per se firma esse oporteat, non vero ex alieno arbitrio dependere.

**196** RESOL. II. Si institutio eo modo fiat ad causas pias, valet, uti Jure Canonico cautum est cap. cum tibi 13. de testam. ubi Innocentius: *In secunda quæstione dicimus, quod qui extremam voluntatem in alterius dispositionem committit, non videtur decidere intestatus.* Videatur de hoc latè P. Haunold. cap. 5. Contrav.

trov. 5. ubi etiam observat, nè quidem de Jure Civili improbatam esse institutionem, in qua non ipsa substantia, sed solum electio certæ personæ ex pluribus à testatore designatis, alterius arbitrio committitur, v.g. *Instituo ex cognatis meis illum, quem Titius elegit.*

*Punctum XII. An licet Sempronio Cajum instituere sub ea conditione, si & ipse vicissim Sempronium pro hærede scripserit?*

RESOL. Talis institutio in Jure voca-197  
tur *captatoria*, eò quòd sit occasio fraudis  
committendæ, proindeque reprobatur à  
l. 70. ff. de hæred. instit. ubi tamen additur,  
eam institutionem non esse contendam ca-  
ptoriam, nec improbandam, quâ aliqui  
sinè conditione præfata, solum mutuæ af-  
fectionis gratiâ se invicem hæredes scri-  
bunt. Nec esset captatoria, si conditio  
reciprocae institutionis poneretur de præ-  
terito, v. g. *Instituo Titum hæredem, si ille me*  
*suum hæredem esse voluerit*; quia, cùm hic re-  
quiratur, institutionem jam fuisse positam  
à Titio, nulla ponitur fraus eum illiciendi  
ad institutionem faciendam.

Punctum XIII. Quid, & quotuplex sit substitutio?

RESOL. I. Substitutio est secundi hæredis in locum prioris institutio ; ubi per secundum intelliguntur quicunque non primus,

etiam tertius, quartus, quintus, &c. Contingit enim aliquando, ut testatores provisionaliter in casum, quō hæres primus à se institutus, aut nolit, aut non possit esse hæres, ei alium hæredem substituant.

**199**    RESOL. II. Substitutio in genere dividitur in *directam*, & *indirectam*, quæ etiam *fideicommissaria* appellatur. Directa est, quā quis immediatè ab ipso testatore, absque alterius instituti ministerio, hæreditatem consequitur. Indirecta, quando directo hæredi, ejusque fidei committitur, ut hæreditatem tradat alteri; ut adeò hic non à testatore, sed ab hærede directo immediatè hæreditatem accipiat: ideoque *fideicommissaria* dicitur, & sit verbis obliquis, id est, obliquè ad substitutum directis, e.g. *Cajus hæres esto, quem rogo, ut, cum morietur, hæreditatem meam Mævio restituat.*

**200**    RESOL. III. Substitutio directa est quintuplex, nempe *vulgaris*, *pupillaris*, *exemplaris*, *compendiosa*, & *reciproca*, quibus aliqui addunt sextam, nempe *militarem*. Vulgaris substitutio (inde dicta, quod cuivis, & ab omnibus, alias à testando non impeditis, fieri queat) est secundi hæredis institutio in casum, quō primus hæres non erit hæres, vel quia non potest, & hic vocatur *casus impotentiae*: vel, quia non vult, qui dicitur *casus noluntatis*. Pupillaris sub-

sti-

stitutio est secundi hæredis institutio, collata in casum, quô suus hæres intra ætatem pupillarem decesserit. Exemplaris est secundi hæredis institutio, collata in casum, quô liberi ratione furiositatis, vel amentiæ nequeunt sibi condere testamentum. Compendiosa, quâ parentes suis liberis in casum, quô ex quacunque ratione, vel quocunque modo decesserint, hæredes substituunt; unde pro diversitate casuum hæc substitutio potest esse vel vulgaris, vel pupillaris, vel exemplaris. Reciproca est plurium personarum ad invicem substitutio. Militaris est substitutio à milite facta ex speciali privilegio. De his latè tractant Juristæ; nos paucissima delibabimus.

Punctum XIV. *Quid operetur substitutio vulgaris? Et quando expiret?*

RESOL. I. Generaliter operatur hoc, 201  
ut casu quo hæres institutus hæreditatem  
adire vel noluit, vel non potuit, in bo-  
nis testatoris non succedant hæredes ipsius  
instituti, sed substitutus, ut clarè habetur  
*I. un. §. 5. C. de caduc. tollend. ibi: hæredita-*  
*tem, nisi fuerit adita, transmitti nec veteres con-*  
*cedebant, nec nos patimur. Excipit tamen ibi-*  
*dem liberos ab ascendentibus hæredes in-*  
*stitutos, qui sive sciverint, sive ignorave-*  
*rint se hæredes scriptos, si decedant, jure*  
202  
*sax-*

*sanguinis* transmittunt hæreditatem sibi de-relictam in suos descendentes, arg. l. un. C. de his, qui ante apertas tabulas &c. Et quod hoc etiam de aliis, ius transmissionis, sive jure suitatis, sive jure deliberandi habentibus, verificetur, quatenus, si hæreditatem non adierint, eis non hæres substitutus, sed hæredes proprii transmissarii succedant, ex eisdem LL. concluditur. Excipiendus etiam hic est casus, quod hæres institutus proficitur Religionem successionis capacem; quia per Novell. 123. cap. 37. in favorem Monasterii omnia onera substitutionum sunt sublata. His Duarenus, Bartolus, Sichardus, Zasius, Haunoldus tr. 7. cap. 1. num. 31. addunt casum, quod hæres ab extraneo institutus est filiusfamilias; tunc enim, si iste repudiarerit hæreditatem, ipsius parentem, excluso substituto, ad hæreditatem admittendum volunt, favore l. 8. §. 2. C. de bonis, que liberis &c. & quia juxta §. ult. Inst. de vulgar. substit. quoad personas alieno juri subjectas, substitutio sub his verbis: si hæres non erit, sic accipienda est: si neque ipse hæres erit, neque alium hæredem fecerit, uti filiusfamilias facit parentem, casu quo hæreditatem ipse repudiatur.

202      RESOL. II. Substitutio vulgaris regulariter expirat, quamprimum hæres institutus adit hæreditatem; quia tunc deficit

cit conditio ipsius, nempe, si primus hæres non erit hæres. Exceptio est I. Si hæres institutus sic pupillus, & post aditam hæreditatem ante annos pubertatis moriatur; tunc enim, quia substitutio vulgaris expressa continet tacitam pupillarem, ex communī DD. apud Reiffenstuel num. 564. substitutus vi substitutionis tacitæ pupillaris succedit; nisi mater instituti impuberis adhuc in vivis degat, quia hæc substituto præferenda esset, arg. l. 8. C. de Impuber. Exceptio est II. Si hæres post aditam hæreditatem, intra annum voluntatem Defuncti non implet; tunc enim lex instituto hæreditatem aufert, & substituto, si de implenda Defuncti voluntate caver, applicat. *Authent.* Hoc amplius. C. de fideicommiss. Porrò substitutio vulgaris etiam expirat morte instituti ante testatorem, quia tunc substitutio revocatur ad institutionem, & substitutus succedit testatori tanquam institutus. Item si substitutus ante institutum, vel saltem ante aditam ab ipso hæreditatem moriatur.

Punctum XV. *Quid operetur, & quando expiret, substitutio pupillaris?*

RESOL. I. Substitutio pupillaris tres<sup>203</sup> præcipue habet effectus: I. Quod vi illius substitutus succedat non tantum in bonis, seu hæreditate testatoris substituentis, sed etiam in bonis pupilli, cui substitutus est,

un-

undecunque demum , sive à patre, sive à matre, sive aliunde acquisitis, si is ante pubertatem moriatur. Communis , & certa ex l. 10. §. 5. ff. de vulg. Et pup. substit. II. Quod substitutio pupillaris expressa contineat vulgarem tacitam , sicut Punct. præced. diximus è converso ; ideoque sive post mortem testatoris filius impubes adierit hæreditatem , sive non, eo moriente ante annos pubertatis, substitutus capit hæreditatem paternam , in prima hypothesi ex vi substitutionis pupillaris expressæ , in secunda ex vi vulgaris tacitæ. Reiffenstuel num. 576. cum communi, & fundatur in l. 4. ff. eod. III. Quod substitutio pupillaris expressa excludat etiam matrem à successione impuberis, intra annos pubertatis decedentis. Sic clarè decisum in cap. si Pater. 1. de testam. in 6. ubi etiam ratio adjungitur : *Quia licet filius testamentō suō matrem portione jure naturæ debita privare non possit; Pater tamen in testamento, quod filio impuberi facit, potest: nam testamentum hujusmodi pupillare paternum, vel paterni pars potius est censendum.* Similia habentur l. 8. §. 5. ff. de inoffic. testam. Duxi pupillaris expressa ; quia pupillaris tacita , in vulgari comprehensa, matrem non excludit , ut ex num. præced. constat.

204      RESOL. II. Substitutio pupillaris exprimatur revocatione vel rescissione testamenti; mor-

morte substituti ante pupillum, cui est substitutus; impubere emancipato, vel puber-  
tatem adepto, dum adhuc vivit testator: in  
quo tamen casu, licet cesser substitutio pu-  
pillaris expressa, ita ut substitutus nequeat  
amplius succedere in bonis hæredis institu-  
ti; manet tamen adhuc juxta veriorem  
sententiam substitutio vulgaris tacita, cum  
effectu, ut si hæres institutus nolit adire hæ-  
reditatem, substitutus succedat in bonis te-  
statoris substituentis. Reiffenst. à n. 580.

Punctum XVI. Quid operetur, & quando  
expiret substitutio exemplaris?

RESOL. I. Substitutio exemplaris ope-  
ratur eosdem pñne effectus, quos substi-  
tutio pupillaris, cùm ad ejus exemplum,  
& similitudinem sit introducta, arg. l. 9. C.  
de impub. & aliis substit. Ubi tamen hoc spe-  
ciale constitutum legimus, quòd parentes  
liberis mente captis non possint substitue-  
re, quoscunque voluerint, sed si mente  
captus habeat Descendentes, vel in horum  
defectu fratres sapientes, teneantur istos,  
vel aliquos, aut unum ex ipsis substituere;  
quod, quia masculinum comprehendit fœ-  
mineum, etiam ad sorores, siquæ essent  
sapientes, extendi cupit, atque ex decis. 802.  
Rotz probat Card. de Luca citatus à P.  
Schmier num. 402. Amplius id aliqui ad ma-  
trem filii mente capti protrahunt, ut sal-  
tem

tem quoad legitimam ei substituenda sit, utpore magis propinqua, quam fratres. Sed ex hoc ipso alii inferunt, matrem substitui non debere; quia, cum Imperator, hujus majoris propinquitatis non ignorans, fratres solos nominaverit, matrem exclusse censendus est. Ita Covarruv. *de test. m.* cap. 16. §. 6. num. 10. Reiffenstuel *num. 589.* & alii.

206      RESOL. II. Substitutio exemplaris, præter casus omni substitutioni communes, expirat I. Quando ille, cui alias substitutus est, penitus liberatur ab amentia, *§. i. Inst. de pupill.* II. Quando post substitutionem furioso nascuntur liberi. Ita DD. communiter.

Punctum XVII. *Quid de reliquis substitutionibus?*

207      RESOL. I. Quantum ad substitutionem compendiosam, attendi debet, an testator utatur verbis ad substitutum directe terminatis, an solùm obliquis, an verò communibus. Si primum, revera censendus est hæres à testatore substitutus: si secundum, communiter non censetur hæres, sed vel legatarius, vel fideicommissarius: si tertium, modò hoc, modò alterum dijudicandum ex circumstantiis; de quo latius Haußold *trad. 7. à num. 177.*

RE

RESOL. II. In substitutione reciproca be-<sup>208</sup>  
ne attendendum est ad qualitatem perso-  
narum, tām substituentium, quām substi-  
tarum, ut possit discerni, an substitu-  
tio sit vulgaris, an pupillaris, an mixta, &  
tunc superiores regulæ sunt applicandæ.

RESOL. III. De substitutione militari<sup>209</sup>  
hoc sciendum, quòd milites ex privilegio  
speciali possint hæredi à se instituto, qui-  
cunque ille sit, sive filius, sive extraneus, seu  
pubes, seu impubes, substituere directè, ac  
etiam ad tempus, quod sibi placuerit, per  
*l. 41. ff. de testam. milit.* De aliis vide Hau-  
nold. *cit. num. 172. & seq.*

RESOL. IV. Substitutione indirecta coin-<sup>210</sup>  
cidit cum Fideicommisso, si formaliter, seu  
pro ipso actu ultimæ voluntatis Defuncti  
accipiatur, quo hæres fiduciarius gravatur  
hæreditatem totam, vel quandam ejus par-  
tem, vel rem certam alteri restituere; un-  
de si hæres, directè & primò institutus, hæ-  
reditatem non adit, regulariter evanescit  
fideicommissum, nisi causa pia fuerit in-  
stituta. Sed cùm de Fideicommisso ser-  
mo sit redditurus in cap. seq. hic à pluri-  
bus circa hanc materiam  
abstineo.

## §. II.

Praxis Confessoriorum circa exposi-  
tam Doctrinam.

## CASUS I.

**N**Athanaël plurium liberorum jam emancipato-  
rum, & partim Religioso, partim conjuga-  
li statui devinctorum parens, cum recogitasset,  
illos jam aliunde habere sustentationem sufficientem,  
quā vivere possint, donec etiam mater oculos clau-  
serit, fortè etiam bujus apud liberos venerationi  
eò majori provisurus, condidit testamentum, in-  
quo uxori suæ usumfructum omnium bonorum,  
quin & pecuniarum liberrimam administrationem  
ad dies vitæ reliquit, liberis, ut ab omnipre-  
tensione hæreditatis ad interim abstineant, sub  
pœna exclusionis ab illa obligatis. Quæritur, an  
iste modus condendi, & clausulandi testamentum  
validus sit, & licitus?

## RESOLUTIO.

**211** **F**Atetur, me in resolutione hujus casus,  
quem factum, & juxta voluntatem re-  
statoris executioni datum novi, potius cu-  
pere doceri, quam docere. Hoc imprimis  
habeo pro certo, dictos liberos non posse  
hoc testamentum dicere nullum, quod  
fue-

fuerint in testamento præteriti, & uxor sola nomen habeat hæredis, saltēm fiduciarii, & ad restituendam ipsis hæreditatem gravati. Nam ex nullo verbo apparet, uxorem hic fuisse institutam hæredem; potius ei censetur ususfructus omnium bonorum fuisse legatus, ipsis liberis solis pro hærede, institutis, & dominium proprietatis omnium illorum bonorum pro indiviso habentibus; cuiusmodi legatum Jure saltēm antiquo valuisse, constat ex l. 37. ff. de usu, & usufructu per legatum &c. ibi: *uxori meæ usumfructum lego bonorum meorum, usquedum filia mea annos impleat octodecim.* Solū ergo in illud recidit difficultas, an etiam hodie Jure hæreditas liberorum tam universali, & illimitato usufructu gravari potuerit? Et videtur dicendum, quod minimè; nam expressè id prohibetur in Novell. 18. cap. 3. his verbis: *Prohibemus autem & illud grave existens, & habens quidem aliquam legalem occasionem, in duram tamen incidens crudelitatem, & amaritudinem.* Novimus enim aliqua testamenta, secundūm quæ morientes, non paternè, nec ut viros oportebat, sed nimis molliter, atque remissè fecerunt institutiones uxoribus, siquidem illis omnem reliquerunt suarum rerum usumfructum, filiis autem proprietatem nudam. Tunc post pauca sic statuit: *Non licebit igitur de cetero ulli omnino filios habenti, tale aliquid age-*

re , sed modis omnibus eis bujus NB. legitimæ partis , quam nunc deputavimus , & usumfructum insuper , & proprietatem relinquat . Quantum igitur ad legitimam liberis illis debitam sentio dispositionem illam non valuisse , cum hæc sinè omni onere , ac gravamine relinquenda sit , & si de facto adjiciatur , pro non adjecto habendum , per l. 32. C. de inoff. testam . Quantum vero ad portionem , liberorum legitimam excedentem , valuit omnino , cum circa eam testator pleno Jure possit disponere . Illa etiam clausula , quâ pars non contenta ab hereditate omnino excluditur , est nullius roboris ; quia non est causa exheredationis ex approbatis à Jure . Interim , sicut testatorem ex conscientia pura , & sincera processisse firmiter suppono , ita filios ipsius ob insignem in observanda ultima ejus voluntate pietatem , studiositatēmque singulariter laudo , & commendō .

212 Alium modum , quod liberi ad relinquendum matri pro diebus vitæ , omnium bonorum usumfructum indirecte cogi possint , assert Reiffenstuel num. 368. & 458. scilicet , si pater testator dicat , v. g. Ego filium pro herede instituo , volens tamen , ut ad dies vitæ usumfructum totalem relinquat matri & cui dispositioni , si acquiescere volit , velo , ut ei titulō heredis detur sola legitima

tima jure debita, reliquum totum verò tam quo-  
ad proprietatem, quām usumfructum remaneat  
matri. Ubi hæres necessitatum se videt,  
vel ad tempus vitæ suæ matris carere Le-  
gitimā sibi debitā, saltēm quoad usumfru-  
ctum, vel in perpetuum carere tota por-  
tione Legitimam excedente, sibi indebita.

Verūm, licet hic modus à P. Reiffen-  
stuel citato dicatur communiter admissus,  
& in more positus, mihi tamen de validi-  
tate omnino est suspectus; quia per illum  
usumfructum totalem matri relictum certò  
etiam gravatur legitima filii, neque hoc  
gravamen ei satl compensatur per spem al-  
terius portionis indebitæ; tūm quod du-  
bium sit, an filius sit supervicturus matri;  
tūm quia periculum est, ne mater diu super-  
stes illam portionem simul cum legitimam  
filii consumat. Et licet filio detur optio  
statim præripiendi legitimam, hæc ipsa ta-  
men ex amissione reliqui emolumenti spe-  
rati ita vilificatur, ut prudenter eligibilis  
non censeatur, sitque moraliter minor se  
ipsa.

## C A S U S II.

O Liverius morbō extremō laborans, carens li-  
beris, facit testamentum, in quo uxorem  
suam instituit bæredem ex asse, adjecto tamen one-

N 3 re,

*re, suam testatoris matrem ad dies vitæ alienā, & si uxor deceperit, hæreditatem totam relinquendī liberis sui fratrīs adhuc viventis. Quæritur, an tale testamentum valeat, & liceat?*

## RESOLUTIO.

**21;** *T*estamentum istud non valet, neque licet; quia deficētibus liberis, & aliis descendētibus, parentes, vel aliquis eorum superstes, necessariō instituendi sunt hæres, saltem quoad legitimam, ut dictum est. *num. 172.* ubi tamen addidimus probabile esse, quod si prætereantur parentes, testamentum non sit ipso Jure nullum, sed tantum rescindibile. Neque sufficit, quod alio modo, sicuti hic per demandationem alimentorum, eis provideatur; quia in *Novell. 115. cap. 3.* dicitur, nec si per quamlibet donationem, vel legatum, vel fideicommissum, vel alium quemcunque modum eis dederit legibus debitam portionem, testatorem satisfacere; quod etiam respectu parentum procedere, colligitur ex initio capitū seq. ubi Imperator: *Justum autem perspeximus, & è contrario de liberorum testamentis hæc eadem cum aliqua distinctione (quæ causas ex hæredationis concernit) disponere.* Itaque in hoc casu juxta præscriptum *Novellæ cit. cap. 4.* rescissō testamento, ii succedunt, qui ab intestato ad hæredi-

reditatem Defuncti vocantur, scilicet mater, & frater germanus defuncti, per Novell. 118. cap. 2. quibus tamen jure substitutionis in bonis testatoris succedere debent liberi illius fratris; eò quod, præter hæredis institutionem, nihil in tali testamento mutandum imperet Novella 115. præallegata.

## CASUS III.

**P**ompeja vidua conditura testamentum, aperit intentionem suam Confessario, quod, cum filias suas jam satis adjuverit in vita, eisque ultra dimidiam bonorum suorum partem applicuerit, exigua tamen gratitudinis signa ab eis experta fuerit, immo una ex illis contra voluntatem parentum nupserit ei, à quo fuerit corrupta, & imprægnata; quod, inquam, ob tales circumstan-tias velit reliquam suam substantiam pro sue animæ refrigerio Ecclesiis consignare, modo, quem suus Confessarius judicaverit meliorem. Quid iste?

## RESOLUTIO.

**C**onfessarius, præsertim, si Religiosus sit, 214 se ab hoc salebroso negotio debet omni, quâ potest, modestiâ continere, & subducere, utpote, qui non ad curam temporalium, sed immortalis animæ habendam advenerit, & præsto sit. Causæ hujus sunt plu-

N 4

plurimæ , sed præsertim , ne qua avari-  
tiæ labes sibi , suóque Ordini , etiam per  
injuriam maledicentium aspergi possit , né-  
ve unius , vel alterius Partis sinister exitus  
ipsi , velut causæ , vel adjutori valeat im-  
putari. Unde hlc præ oculis habenda illa  
aurea S. Ambrosii lib. 3. de offic. cap. 9. verba:  
*In causis pecuniariis intervenire non est Sacerdotis ,*  
*in quibus non potest fieri , quin frequenter lœdatur*  
*alter , qui vincitur , quoniam intercessoris beneficio*  
*se victimum arbitratur.* Præsertim verò in tali  
casu , cujus tam ambigua ob varias circum-  
stantias concurrentes est resolutio , diri-  
get eam ad Virum sæcularem , Legisperi-  
tum , & DEUM timentem , cujus consi-  
lium in re ista sequatur. Quàm autem  
difficile sit hlc consulere , liquet I. Quia ,  
licet legitima à parentibus adhuc in vita  
possit assignari , in morte tamen primùm  
completur , ità ut quantitas legitimæ ex  
quantitate bonorum testatoris , prout te-  
mpore mortis reperitur , metienda sit , arg.  
l. 6. C. de inoff. testam. proindeque , quamvis  
priùs expensa liberis , possint à parente in  
legitimam conferri , juxta resoluta à n. 181.  
non tamen à testamento eam penitus de-  
jicere , per dicta num. 178. II. Quia so-  
la omissione gratitudinis , nisi sit inter causas  
à Jure expressas , non est ad exhæredatio-  
nem sufficiens ; unde , quòd testatrix exi-  
guia

gua gratitudinis signa à suis filiabus fuerit experta, non relevat eam ab illarum institutione in hæredes. III. Si illa filia contra voluntatem parentum nupserit suo imprægnatori ante annum 25um suæ ætatis, maximè, cùm dicti parentes eam voluerint honestis nuptiis aptare, & illa noluerit; est quidem probabiliter locus exhæredationi, sed causa hæredi probanda incubit, quod est onus non leve. IV. Demum Ecclesia non tantum non affectat, sed repudiat hæreditates, cum damno liborum delatas. *Can. si quis 8. 13. q. 2.* (cujus verba sumpta sunt ex Augustino serm. 49. de diversis.) sic habetur: *Si quis irascitur filio suo, & moriens exhæredat eum, si viverem, non eum placarem? non ei filium reconciliare deberem?* Quomodo ergò cum filio suo volo, ut habeat pacem, cuius appeto hæreditatem? Sed planè sic faciat, quod sèpe hortatus sum. *Unum filium habet, putet Christum alterum: duos habet, putet Christum tertium; decem habet, Christum undecimum faciat, & suscipio.* Locus, inquit Marchant, notandus contra quosdam --- qui non curant de damno hæredum, de pace filiorum, & consanguineorum, vel de præsenti, aut futura indigentia eorum, sed suadent sibi relinquī, aut Ecclesiis suis in testamento excessivas summas, imò hæreditates, & bona, frustratis hæredibus, vel

N 5 con-

consanguineis, qui verè bonis illis pro se, & familiis suis indigent, sub titulo, quòd bona DEO offerant, & magis accepta sint, non absimiles illis, de quibus Christus in Evangelio Matth. 15. *Munus*, quodcunque est ex me, tibi proderit, §c. Audiatur etiam S. Antoninus 3. p. tit. 10. cap. 1. §. 2. ubi, si alii, inquit, egerent tota bæneditate, quia modica, convenientius est, ut eis relinquat, quam aliis pauperibus, vel Ecclesiis; cùm § Ecclesia debeat, cùm potest, pauperibus subvenire; quia, quidquid habent Clerici, pauperum est; ad quod citat S. Hieronymum in epist. ad Damasum, relatum *Can. Quoniam.* 68. 16. q. 1. & confirmat insigni exemplo Augustini in serm. 2. de vita Cleric. relatō *Can. ult.* 17. q. 4. Qui cunque vult, exhæredato filio, hæredem facere Ecclesiam, querat alterum, qui suscipiat, non Augustinum; imò, DEO propitio, neminem inventiet. Lege totum capitulum, non te pigebit.

### §. III.

#### De Accessoriis Testamenti.

Punctum I. *Quenam* sunt accessoria Testamenti?

215 **R**ESOL. sunt varia. I. Apertura testamenti. II. Jus deliberandi, & Beneficium Inventarii. III. Petitio, & acquisitio hæredi-

reditatis. IV. Repudiatio, & renuntiatio hæreditatis. V. Jus acriescendi. VI. Jus transmittendi hæreditatem. VII. Executio testamenti. De his breviter.

Punctum II. Quo fine, & quo modo fit apertura testamenti?

RESOL. I. Apertura testamenti scripti, 216 vel saltem, etsi nuncupativum sit, pro meliori notitia in scripturam redacti, post mortem testatoris ideo facienda est, ut per eam parefiat, quisnam sit institutus hæres, & quid, ac quantum ei, quibusque sub conditionibus fuerit in testamento relictum; qualia porro sint legata &c. l. ult. Cod. testamenta quemadmodum aperiantur.

RESOL. II. Ista apertura potest fieri dupl. modo, scilicet privatim, & solemniter. Privatim contingit, quando ad hæredis, vel aliorum interesse habentium instantiam, coram aliquibus honestis viris aperiuntur tabulae testamentariæ, seu scripture testamenti. Solemniter, quando coram Judice competente, convocatis hæredibus, & omnibus, quorum interest, etiam testibus ad revidenda sua sigilla, & subscriptiones, codex testamenti referatur.

Punctum III. Quid, & cujus effectus sint Jus deliberandi, & Beneficium Inventarii?

RESOL. I. Jus deliberandi est facultas legge concessa hæredi, ut possit, priusquam

hæ-

hæreditatem adeat, eam explorare, quid importet, quantaque commoda vel incommoda. Hos jus, urgentibus legatariis vel creditoribus hæreditariis aditionem hæreditatis, non nisi ad spatiū unius anni à Principe, vel ad novem menses à Principe inferiore concedi potest. *l. fin. C. de jur. delib.* At si nemo urgeat aditionem hæreditatis, potest eam hæres differre usque ad 30. annos, per *l. 9. C. d.t.*

219      RESOL. II. *Inventarium* (prout definit Glossa in *s. si verò abfunt, auth. de bæredit. & Falcid. coll. 1.*) est scriptura in qua res inventæ in hæreditate defuncti describuntur, sive ab hærede ipso, sive à Notario. Debet autem inchoari intra 30. dies post apertas tabulas, & notitiam habitam delatae sibi hæreditatis; & absolvī intra alios 60. dies, si hæreditas sit præsens: vel intra annum, si nimis remota sit ab hæredis domicilio. *l. fin. C. de jure delib.* Effectus ejus sunt I. Quod sit imunis ab omni periculo adeundæ hæreditatis, possitque illam absque ullo suo damno iterum repudiare, nec ingeat jure deliberandi, an velit hæreditatem adire nec ne, cùm etiam adeundo securus sit, dummodo cum Beneficio Inventarii adeat. II. Quod non teneatur creditoribus ultra vires hæreditatis solvere. III.

Quod

Quod possit contra legatarios uti beneficiis  
legis falcidiæ.

Punctum IV. Quid sit hæreditatis petitio,  
& quid acquisitio?

RESOL. I. *Hæreditatis petitio* est actio,<sup>220</sup>  
quà quis hæreditatem vel totam, vel pro  
parte petic, seu vindicat ab eo, qui illam  
pro hærede, aut pro possessore possidet. l. 9.  
ff. de hæredit. petit. Unde hæc actio datur I.  
Contra eum, qui possidet pro hærede, hoc  
est, qui reverè hæres non est, sed tamen  
hæres haberi vult, & quà talis possidet. II.  
Contra eum, qui possidet pro Possessore, seu  
qui aliam causam suæ possessionis reddere  
nequit, quàm, *quia possideo*, l. 11. & 12. ff.  
eod. Hanc eandem actionem, præter actionem  
ex testamento, & actionem familiæ erciscun-  
dæ, competere etiam hæredibus necessariis  
ad petendam legitimam, probat Haunoldus  
tr. 6. num. 539.

RESOL. II. *Acquisitio hæreditatis* pro di-<sup>221</sup>  
versitate hæredum est diversa. Hæres ne-  
cessarius, & suus à momento demortui pa-  
tris, citra factum hominis, est ipso Jure  
hæres; hodie tamen ex benignitate Præ-  
toris habet licentiam ab hæreditate jam de-  
lata abstinendi, per s. 2. Inst. de hæred. qual.  
& diff. Hæres voluntarius & extraneus non  
aliter acquirit hæreditatem, quàm eandem  
actio-

adeundō ; quod sit verbis, vel factō, dum se tanquam hæredem gerit.

**222** RESOL. III. Aditio hæreditatis hos patrit effectus, quod I. nisi adiens sit pupillus, vel minor, ei amplius pœnitere, aut hæreditatem repudiare (nisi confessio Inventario) non liceat, per §. 5. *Instit. eod.* II. Quod acquirat jus & dominium omnium rerum hæreditariarum, quas habuit Defunctus. III. Quod contrahat obligationem solvendi omnia debita, & obligationes Defuncti. IV. Quod teneatur solvere legata, & fideicomissa, salvo tamen jure detrahendi falcidiam, & Trebellianicam.

Punctum V. *Quid sint, & operentur repudatio, & renuntiatio hæreditatis?*

**223** RESOL. I. Repudiatio hæreditatis nihil aliud est, quam ejus jam delatae recusatio, aut rejectio ; unde supponit potentiam statim adeundi, si hæredi placeret. Potest autem repudiare hæreditatem, quisquis potest acquirere, per l. 18. ff. *de acquir. hæred.* qui vero semel illam adiit, nequit amplius repudiare, ut dictum est, nisi sit hæres suus, qui repudiare eam potest, quamdiu alienata non est, l. 6. *C. de repud. hæred.*

**224** RESOL. II. Renuntiatio hæreditatis est cesso juris, quod quis ad hæreditatem habet, vel habere potest ; intellige, in futurum. Ubi notandum est I. Nihil repugnare, quin ali-

aliquis renuntiet, præsertim juratò, hæreditati paternæ, aut maternæ; sicut enim potest eam repudiare, ex dictis num. 223. ità & illi renuntiare. Interim renuntians hæreditati, non eo ipso censeretur renuntiare legitimæ; quia legitima formaliter non est pars hæreditatis, sed bonorum, quæ supersunt deducto ære alieno, l. 8. §. 9. de inoff. testam. Multò minus censeretur cedere juri ad alimenta in casu necessitatis, cùm his renuntiare nè quidem possit, l. 8. ff. de transact. II. Etsi filius vel filia, accepto patrimonio, vel dote, renuntiaret legitimæ, per hoc non noceret suis liberis, nisi expressè etiam pro his renuntiasset; siquidem hi, mortuo patre vel matre, succedunt jure proprio avo vel aviæ. Reiffenstuel n. 546. III. Renuntiatio hæreditatis in favorem alterius, si fiat in genere, valet; si verò fiat in specie circa hæreditatem hominis determinati adhuc viventis, & sinè ejus consensu, non valet, ut tenent omnes, textu claro l. fin. C. de Pactis; ubi etiam ratio adjicitur: quia bujusmodi pactiones odiosæ videntur, & plenæ tristissimi exitus, ac contra bonos mores sunt.

Punctum VI. Quid sit, & quibus competit Jus acrescendi, & hæreditatem transmitendi?

RE-

**225** RESOL. I. *Jus accrescendi hic est facultas, quā alicui jam habenti aliquid de hæreditate, accrescit alia hæreditatis portio, ex certa causa vacans.* Ità Reiffenstuel num. 555. Datur autem I. Quando testator unicum instituit hæredem in re certa, nihil disponens de reliqua parte; quia tunc tota hæreditas accrescit hæredi instituto. *l. 1. §. 4. ff. de hered. instit.* II. Quando hæres in re particulari institutus, habet co-hæredem universalem; tunc enim huic, et si in certa solùm quota instituto, omnia accrescunt, *l. 19. Cod. eod.* III. Quando ex pluribus hæredibus unus adit suam partem, alter verò repudiat, vel alio modo in ejus persona deficit successio; tunc enim istius portio accrescit adeungi, *l. 9. ff. de suis, Et legit. hæred.*

**226** RESOL. II. *Jus transmissionis est jus, quod competit hæredi ad hæreditatem morte sua in hæredes proprios transferendam.* Istud jus regulariter, & per se loquendo, hæredi non competit, nisi post aditam hæreditatem, per clarum textum in *l. un. C. de caducis toll.* & *l. 4. Cod.* *Qui admitti ad bonorum possessionem possint.* Exceptio est I. in hærede suo, qui cùm absque ulla aditione, vel acceptatione sit ipso jure hæres, *juxta dicta num. 221.* & dominus bonorum hæreditorum, *l. 11. ff. de liber. Et posthum.* ut note fictio-

hætione juris eadem persona cum defuncto; si decebat, transmittit hæreditatem ad quoscumque hæredes, sive suos, sive extra nos, *jure suitatis*. II. In hærede vel suo, vel emancipato, qui patri, vel matri, vel alteri ex ascendentibus in gradu proximo successit, sive ex testamento, sive ab intestato; hic enim, si nec aditâ, nec repudiata hæreditate moriatur, transmittit hæreditatem ad suos descendentes, *jure sanguinis*, sed non ad alios extraneos hæredes, quia hoc soli hæredi suo conceditur. l. un. Cod. de his, qui ante apertas tab. III. In hærede deliberante, seu qui sciens sibi delatam hæreditatem, & de ea adeunda deliberans, intra tempus ad deliberandum concessum moritur; nam & iste hæreditatem ad hæredes quoscumque transmittit, *jure deliberandi*, sic tamen, ut hæredibus transmissariis non plus temporis, quam fuerit residuum defuncto, ad deliberandum concedatur. l. 19. Cod. de jure delib. Porro quod hæres transmissarius etiam hæredi substituto anteferendus sit, jam diximus suprà num. 201.

Punctum VII. Qualiter facienda sit execu-  
tio testamenti, & quid de Executoribus?

RESOL. I. Executio testamenti tam 227  
quoad modum, quam quoad tempus, con-  
formanda est voluntati testatoris justæ;  
hæc enim in omnibus principaliter obser-

O van-

vanda, & pro lege habenda. l. 120. de V. S. & Novell. 22. cap. 2. Quòd si testator in gene-  
re solùm disposuerit, v.g. ut hæreditas, vel  
legata dividantur in pauperes, vel ad pias  
causas, recurritur ad præsumptam testato-  
ris voluntatem. Sic in legato pauperibus  
relicto præfrendi sunt pauperes consan-  
guinei extraneis; magis egeni minùs ege-  
nis; pauperes illius loci, ubi testator de-  
functus est, alienigenis, nisi aliud suadeant  
circumstantiæ. König *ad tit. de testam. n. 60.*  
Imò etiam sibi, si verè pauper sit, poterit  
Executor aliquam partem discretè applica-  
re; nisi, ut limitant Menochius & Sanchez  
apud Reiffenstuel *num. 803.* contraria volun-  
tas testatoris præsumi possit, veluti in casu,  
quòd is bene perspectam habuit Executoris  
paupertatem, nec ullam tamen ipsius men-  
tionem fecit. Similiter si quis in genere  
Ecclesiam hæredem instituerit, sintque plu-  
res in eadem civitate, vel vicinia, præsu-  
mitur cogitâsse de Ecclesia sua Parochiali,  
vel in qua solitus est frequentare Sacramen-  
ta, vel in qua elegit sepulturam, vel eam,  
quæ est indigentior. His omnibus pari-  
bus, ad alias conjecturas, & denique ad de-  
cisionem Ordinarii deveniendum est. Quo-  
ad tempus Executionis verò, *pro legatis piis*  
*per Novell. 131. cap. 12.* determinati sunt sex  
menses ab insinuatione testamenti nume-  
ran<sup>a</sup>

randi: pro cæteris conceditur ad summum annus, intra quem si legata, post Judicis admonitionem, non prætentur ab hærede, perditur ab eo hæreditas (salvâ tamen legitimâ, si sit hæres necessarius) juxta Novell. i. cap. i. §. i. & inde desumptam auth. hoc amplius, Cod. de fideicommiss.

RESOL. II. Ubi constat de determinata voluntate testatoris ad certas pias causas, ea regulariter neque ab Executore, ut cavitur cap. 3. §. 17. de testam. neque ab Episcopo in aliud opus, etiam evidenter melius, potest commutari, ob Clem. quia contingit, 2. de relig. domib. Imò vigore Concilii Tridentini Sejj. 22. cap. 6. de Reform. neque ab Apostolica Sede debet fieri commutatio, nisi ex justa & necessaria causa. Si tamen voluntas testatoris commodè eo modo, quo voluit, impleri non possit, tunc possunt & debent Episcopi, cum consensu tamen hæredis & Executoris deputati, relictâ ad aliam causam piam converrere, juxta rationabiliter præsumptam testatoris voluntatem. arg. cit. cap. 3. de testam. Hoc etiam eximi Theologi extendunt ad casum, quô emergente causa rationabili, non datur recursus ad Sedem Apostolicam; vel si talis circumstantia superveniat, quam si prævidisset testator, verosimiliter disposuisset ali-

ter, tunc enim commutationem indulgent  
Episcopi.

**229**    RESOL. III. Executores ultimarum vo-  
luntatum sunt varii, alii *Legitimi*, alii *Te-  
stamentarii*, alii *Dativi*. Legitimi dicuntur,  
qui dantur ab ipsa lege: Testamentarii,  
qui in testamento designantur à testatore:  
Dativi, qui dantur à Judice, vel Magistra-  
tu, casu quo in testamento constitutus no-  
lit, aut non possit munus exequendi acci-  
pere. Hi rursus subdividuntur in *univer-  
sales*, quando nullus hæres in particulari  
persona institutus est, sed anima defun-  
cti, ad quam voluntatem exequendam ali-  
quis nominatur: & *particulares*, quando  
aliquis est institutus hæres in particulari,  
& constituitur aliquis, qui cætera, quæ in  
testamento ordinata sunt, mandet execu-  
tioni. Porro Executores ultimarum vo-  
luntatum esse possunt quicunque ratione  
utentes, etiam minorennæ, dummodo  
annum 17. in Procuratore ad negotia re-  
quisitum, excesserint, Glossa in cap. 2. de  
testam. in 6. Etiam foeminæ, ut colligitur  
ex cap. 3. eod. & tenet Covarruvias cum  
communi. Non tantum Laici, sed etiam  
Clerici, & Religiosi, ob claram Juris di-  
spositionem, cap. 2. de testam. in 6. & Clement.  
un. eod. soli excipiendi sunt Fratres Mino-  
res, quibus id interdictum per Clement.

*Exi-*

*Exivi. §. Verùm etiam. de V. S. ubi tamen consilium executionis dare, eisdem expressè conceditur. An verò alii Religiosi sine licentia sui Superioris se validè ad executionem testamenti intromittant, lis est inter Doctores, quibus decisionem non invidemus.*

---

## CAPUT III.

### De Testamentis Privilegiatis, & cæteris ultimis Voluntatibus.

#### §. I.

##### Expositio Doctrinæ Christianæ.

Punctum I. *Quotuplia sunt testamenta privilegiata, seu non solemnia?*

**R**ESOL. Sunt septemplicia. I. Testamento ad pias causas. II. Oblatum Principi. III. Conditum apud Acta. IV. Testamentum Parentum inter liberos. V. Testamentum militum. VI. Testamentum rusticorum. VII. Tempore pestis confectum.

Punctum II. *Quid, & qualiter privilegium sit testamentum ad pias causas?*

O 3

RE-

**231** RESOL. I. Testamentum ad pias causas est ultima voluntas, quâ hæres ex motivo aliquo pio, & supernaturali instituitur; cuiusmodi motiva censentur honor DEI, cultus Sanctorum, sublevatio pauperum, redemptio captivorum, bonum, & salus animæ; item relictæ pro Ecclesiis, Monasteriis, domibus Presbyterorum, Confraternitatibus, Hospitalibus, Nosocomiis, Orphanotrophiis; pro literarum studio, & sacrarum præsertim disciplinarum promotione. Hujusmodi testamentum possunt condere, quicunque liberam testandi facultatem à Jure naturali obtinent, tametsi à Jure Civili ex speciali quadam prohibitione nequeant ad causas profanas testari, ut habet Riccius in *Praxi aurea* p.4. resol. 89. quia dispositio ad causas pias non secundum leges Civiles, sed secundum Decreta, Juri naturali insistentia, tractari debet, per cap. relatum 11. de testam. Quasdam tamen personas etiam de Jure Canonicō ad causas pias testari prohibitas esse ob conditionem statūs, patet ex num. 159. & seqq.

**232** RESOL. II. Testamentum ad causas pias est privilegiatum pro utroque foro, interno, & externo, etsi careat solemnitatibus Juris Civilis, ut habet communissima Orthodoxorum sententia; & patet tum ex cap.

*cap. relatum cit.* ubi expressè statuitur, ut cùn tale testamentum, seu dispositio ad causas pias ad examen, utique Judicij forensis, deductum fuerit, non secundùm Leges, sed secundùm Decretorum Statuta tractetur: tum, quia in causa, seu materia merè spirituali, ut est dispositio ad causas pias, in utroque foro servandum est Jus Canonicum, art. cap. 7. § 10. de Constit. juncto Can. 17. 9. q. 3.

RESO.. III. Testamentum ad pias causas varia habet privilegia. I. Quòd non requirat solemnitates Juris Civilis, ex *cit. cap. relatum.* II. Quòd valeat etiam solo nutu ad interrogationem alterius factum; quia hoc à sda lege Civili invenitur prohibitum. Julius Clarus *s. testamentum*, q. 6. num. 7. citans communeim. III. Quòd valeat, etsi hære incertus instituatur, vel institutio alterius arbitrio committatur, ex eadem ratione Layman *cit. lib. 3. tract. 5. cap. 2. num. 7.* IV. Quòd in testamento principaliter ad pias causas absque solemnitatibus civilibus condito, valeant etiam legata profana eiden inserta. Reiffenstuel *num. 161.* Engel *num. 19.* Pirhing *num. 22.* & alii communius. Eratio est; quia juxta reg. 42. *Jur. in 6. accessorium sequitur naturam principalis;* unde cùn valeat testamen- tum tanquam principale, etiam valebunt

legata tanquam accessorium. V. Quod è converso, si testamentum principaliter ad causas profanas conditum, ob defectum solemnitatum necessiarum, aut quia hæres institutus hæreditatem non adit corrut, vel deficiat, nihilominus legata pia ibi relicta debeantur. Covarruv. d testam. cap. 11. num. 4. Layman, Pirhing, Engel, Reiffenstuel, Zypæus, Tuscus, & alii pas- sim contra Jasonem. Ratio: quia secundum dicta, in relictis ad causam piam Jus Civile non attenditur; sed, quod legata à solemnitatibus testamenti, vel aditione hæreditatis dependeant, est dispositio Juris Civilis: Ergo, licet quod legata profana, quoad legata tamen pia non attenditur. Neque obstat illa regula præallegata, quod accessorium sequatur naturam principalis; nam id regulariter solum procedit, quando non adest specialis ratio, ex qua accessorium sustineatur, proit hic favor Religionis. Tandem VI. Quod hæres profanus nequeat à relictis ad pias causas detrahere Falcidiam (& eadem sit ratio de Trebelianica) jam dixi sup'a num. 188. ubi etiam oppositum innui, quando hæres est causa pia; quia privilegitus contra privilegium, ex recepto Juri axiomate, non utitur privilegio, sed Jure communi, quando utriusque est par conditio, & uterque cer-

certat de lucro captando, uti hic; licet aliud sit, si unus certet de lucro captando, alter de damno vitando, veluti fit in præscriptione. Ita Engel hic num. 21.

Punctum III. Qualis ergo forma in testamento pio fit observanda?

RESOL. I. Pro foro interno ad testa-234  
mentum pium nihil requiritur, nisi institu-  
tio hæredis, & alia, quæ de Jure naturæ &  
gentium ad testamentum sunt necessaria,  
velut libera voluntas testandi, sufficiens ra-  
tionis usus, ac voluntas enixa testatoris.  
Unde si hæres ab intestato ipse undecunque  
demum certo cognovit voluntatem defun-  
cti concernentem causas pias, tenetur eam  
in foro interno adimplere, etsi nullus adsit  
testis; & vicissim si hæres aut legatarius  
pius, v. g. pauper scit voluntatem defuncti,  
licet in foro interno accipit hæreditatem,  
vel legatum sibi relictum, etsi nec scriptu-  
râ, nec testibus probare valeat. Quod  
idem facere potest quicunque alias, cui te-  
stator secretò commisit, ut post mortem  
suam pecunias in certo loco depositas, jux-  
ta intentionem datam ad causas pias appli-  
cat. Reiffenstuel à num. 146.

RESOL. II. Pro foro externo in testa-235  
mentis ad pias causas requiruntur tres, aut  
duo legitimi testes ex saepè cit. cap. relatum,  
non quidem ad substantiam & valorem te-

O 5 sta-

stamenti, sed tantum ad probationem in casu, quod aliunde non constat, nec probari potest voluntas testatoris. Ita noster P. Sannig *Schol. Canon. lib. 3. tit. 26. num. 8.* Fagnanus, Menochius, Pirhing, Reiffenstuel, Layman, Engel, & alii communiter. Ratio vero, cur tales testes ad substantiam & valorem testamenti non exigantur, est; quia Juris Civilis dispositio hic non attenditur, Jus Canonicum vero nullibi irritat, testamenta ad causas pias sine testibus facta: imo supra num. 143. jam generaliter resolutum, & probatum est, solemnitates Juris Canonici ad testamenta secundum illud regulanda, solum probationis causam exigi, non vero ad valorem, & substantiam. Accedit, quod testamentum ad pias causas non minus privilegiatum esse debeat, quam testamentum militare, aut parentis inter liberos; sed illa valent sine omni teste, si aliunde, ex manu nempe testatoris, constet de ejus voluntate, ut est certum ex l. 21. C. de *testam. & authent. seq.* Ergo a fortiori sic valet testamentum ad causas pias. Et ideo

236      RESOL. III. Quando de voluntate testatoris aliunde sufficienter constat, v. g. ex scheda, quam constat manu testatoris esse scriptam, vel saltem subscriptam, aut si ipsum testamentum sit holographum, seu pro-

propria testatoris manu conscriptum; testimoniū adhibitio non est necessaria, cùm stando Juri naturali & Divino, cui tale testamentum commensuratur, testes non requirantur, quando aliunde constat de veritate. Schmier cit. tr. 4. p. 1. cap. 3. num. 54. Clariss. D.D. Peregrini in lib. 2. Instit. tit. 11. §. 2. Pirhing num. 20. Et colligitur ex cap. Indicante 4. de testam. ubi Pontifex mandat uxoris cujusdam voluntatem per omnia adimpleri, quæ concham argenteam jussit venundari, & suis dari liberis, & scutellam argenteam cuidam reliquit Monasterio, nudis verbis, id est, ut explicat Gloss. ibid. ¶ nudis. & Barbosa in collect. ibid. c. 4. sinè ulla testimoniū, vel scripturæ solemnitate.

RESOL. IV. Si tamen aliae probationes<sup>237</sup> vel signa prorsus deficiant, tunc in foro externo, contradicentibus hæredibus ab intestato, ad probandam testatoris voluntatem in rigore Juris duo testes sunt necessarii, ita ut unus testis, licet omni exceptione major, & probatissimus, nisi alia indicia concurrant, plenam fidem non faciat in judicio. Layman cit. lib. 3. tr. 5. c. 2. num. 4. Reiffenstuel num. 152. Et probatur tūm ex cit. cap. relatum, ubi duo saltem, vel tres testes ad testamentum pium requiruntur; tūm ex universalī regula, quod unus testis ad probandum non sufficiat, arg. cap. licet universis

23. *ad testibus*, ubi dicitur: *Licet quedam sint cause, quæ plures, quam duos exigant testes, nulla est tamen causa, quæ unius testimonio (quamvis legitimo) terminetur.* Similia habentur in cap. *veniens 10. eod.* Quod vel maximè verum est, ubi agitur de alterius præjudicio, uti hic de præjudicio hæredum ab intestato; quia omnium gentium recepta est regula, ut neque in judicio, neque in foro conscientiæ quisquam cum suo, vel alterius præjudicio; asseverationi unius, quantumvis probatissimi, & omni exceptione majoris testis stare teneatur, ut videre licet apud Navar. lib. 5. consil. 3. num. 2. de accusat.

238      *Dixi I. in rigore Juris.* Cùm autem juxta l. *Placuit & C. de judiciis*, in omnibus causis potior debeat esse æquitatis, quam stricti Juris ratio, judico præsertim in hac causa, in qua partim de favore Religionis agitur, partim de favore animæ Defuncti, forsitan executionem suæ ultimæ piæ voluntatis, quatenus tali medio sui purgatorii pœnæ mitigentur vel tollantur, effictim postulantis, in hac, inquam, causa assertioni, maximè juratæ, viri spiritualis, nullum interesse exin habentis, v. g. Confessarii probatae virtutis, & fidelitatis, ex æquitate deferrendum esse; eum & in aliis plena fides habeatur ei, qui testimonium fert de actu ab ipso

ipso gesto, ratione officii sui, quod fungitur, si exinde nullum sentiat commodum, vel incommodum, ut ex Menochio, Maserdo, Farinacio probat ac docet Pirhing in lib. 2. Decretal. tit. de testib. num. 112. Et confirmatur ex l. Theopampus 14. ff. de dote præleg. ubi unius, cui testator voluntatem suam declaraverat, testimonio fides est adhibita; Unde Bartolus in d. l. ait: dicto unius testis statut ex voluntate & dispositione defundi, cuius solius dispositioni staretur. Quod etiam intimat Glossa in cap. ex insinuatione 3. de Procurat.

Dixi II. *Nisi alia indicia concurrant; cum enim unus testis, omni exceptione major, semiplenam probationem faciat in judicio, concurrentibus cum ejus testimonio aliis indiciis, seu præsumptionibus, potest plenam probationem efficere.* Farinacius tract. de testib. q. 63. num. 35. & seq. Hinc si testator vel in testamento, vel coram testibus declaraverit, se velle quædam ad pias causas erogari eum in modum, quem suo v. g. Confessario detexerit, Confessarius audiri debet, & secundum ejus relationem executio fieri, dummodo, spectatis circumstantiis, verisimile sit, Defunctum ita demandasse. Ita post Covarruviam cap. cum tibi, n. 23. de testam. & Navarrum lib. 3. consil. 16. de testam, Layman l. cit. concl. 3. Pleniū id

con-

confirmatur ex cap. *Dilectus 3. S. ult. de success.*  
*ab intest.* ubi cùm quidam Archi-Presbyter  
 moriens coram solo Abbatore Monasterii con-  
 fessus fuisset, quòd se & sua Monasterio  
 contulerit, & donârit, Episcopus autem il-  
 lum Archi-Presbyterum intestatum dece-  
 sisse, & sic omnia illius bona ad se, suám-  
 que Ecclesiam Cathedralem spectare præ-  
 tenderet; *Innocentius III.* re ad se delata,  
 sufficienter probatum esse, respondit, quòd dictus  
 Archi-Presbyter agens in extremis, velut ultimam  
 exprimens voluntatem, asseruit se & sua Mona-  
 stero contulisse - - - nam licet unus testis solus  
 dixerit se vidisse, quando se & sua obtulit Mona-  
 stero; quia tamen alii testes dixerunt se audivisse  
 ipsum in Abbatis præsentia, quod prædictum est,  
 confitentem, non tanquam sufficienter probantes,  
 sed tanquam vehementer adminiculantes, assertio-  
 nem Abbatis plurimi adjuvabant. Unde etiam  
*Gloss. in cap. licet, de testib. ait: unus testis præ-*  
*sumptionem inducit, sed non facit probationem.*

Cæterùm cùm Pontifex ad hujusmodi  
 testamenta requirit duos vel tres testes le-  
 gitimos, hoc non secundùm Jus Civile, sed  
 præcisè secundùm Jus naturæ & gentium,  
 ac secundùm Jus Canonicum debet accipi,  
 ità ut soli, qui ex his Juribus ad testifican-  
 dum sunt inhabiles, à ferendo in his testa-  
 mentis testimonio excludantur. *Reissen-*  
*stuel num. 157.*

Pun-

Punctum IV. Quid, & qualiter privilegia-  
ta sint, testamentum oblatum Principi, & datum  
ad Acta?

RESOL. I. *Testamentum Principi oblatum* 239  
est illud, quod inseritur libello supplici, &  
offertur Principi, ut ejus authoritate susti-  
neatur. Est autem perinde, utrum ipsi  
Principi immediatè, vel ejusdem nomine  
Deputatis, Cancellariis v. g. vel Secreta-  
riis, offeratur, aut coram eis erigatur. Ad  
hujus valorem testamenti nulla penitus re-  
quiritur Juris Civilis solemnitas, sed præ-  
cisè, ut offerens in eo profiteatur, ultimæ  
suæ voluntatis elogium inibi contineri; sic  
enim inconcussam meretur fidem, cùm  
Authoritas Principis omnem defectum sup-  
pleat, per l. 19. C. de testam. Ut tamen con-  
stet, & probari possit, quod reverè Princi-  
pi oblatum sit, expedit, monente P. Schmier  
cit. cap. 3. num. 66. petere aliquod antogra-  
phum Principis, vulgo einen Gegenschein.  
Volunt aliqui cum Vultejo, tale testamen-  
tum debere Principi prælegi; sed carent suf-  
ficieni fundamento.

RESOL. II. *Testamentum ad acta datum*, 240  
est illud, quod testator priùs absque sole-  
mnitate factum, & in scripturam redactum,  
Judici offert. *Apud acta factum* verò dicitur,  
quando testator voluntatem suam coram  
Judice, vel ab eo deputatis, oretenùs de-  
cla-

clarat , sīcque declarandō coram eo testā-  
mentum facit. Potest hoc fieri coram quo-  
cunque Judice , etiam incompetente , ut  
concedunt DD. unanimiter ob texum d.l.  
19. C.b.t. actis cuiuscunq; Judicis; & est ratio:  
quia nempe depositio , seu factio testamen-  
ti apud acta est voluntariæ jurisdictionis,  
& quidem simplicis , qui coram quovis  
Judice , & tam intra , quām extra territo-  
rium jus dicente , expediri potest. König  
ad b. t. n. 5. Cæterū etiam ad hujus testa-  
menti valorem nec testis , nec alia Juris  
Civilis solemnitas requiritur ; dummodo  
aliās legitimè constet , & probari possit ,  
testamentum reverā ad acta fuisse datum.  
Cujus quidem nulla difficultas est , si testa-  
mentum fiat , vel deponatur coram Com-  
munitate , vel Magistratu , jus Judicis te-  
nente , aut coram duobus ab eo deputatis ;  
At , si fiat coram Judice singulari , nec Al-  
sēffores , nec aliam personam publicam ,  
v.g. Notarium , vel Actuarium , secum ha-  
bente , requiruntur saltem duo testes , non  
ad valorem testamenti , sed ad probandum ,  
quod testamentum ad acta reverā datum  
sit , quia unius Judicis , quantæcunque  
fuerit authoritatis , verbo non creditur ,  
ut expressè in cap. cùm à nobis 28. de testib.

241      RESOL. III. Utrūm Judex particularis  
in persona impeditus , possit per alium à se  
dele-

delegatum, tale testamentum ad acta validè suscipere; & vicissim, an testator etiam per nuntium, vel Procuratorem possit illud ad Judicem, rogandō eum, quatenus ad acta recipiat, mittere; differentia est inter DD. Et videtur utrumque affirmandum, dummodo probationis causā utробique duo testes adhibeantur; quia nullus Juris textus ostendi potest, in quo talis delegatio irritetur, aut personalis præsentia testatoris pro hoc casu requiratur Reiffenst. num. 266. & num. 270. & P. Placidus Böckn cit. num. 35.

Punctum V. An, & qualiter privilegium sit testamentum Parentum inter liberos?

RESOL. I. Testamentum inter liberos illud<sup>242</sup> dicitur, quod Parentes, pater nempe vel mater, vel alii ascendentēs in linea recta faciunt, in eoque liberos, vel nepotes instituunt. Hoc testamentum pro utroque foro est ita privilegiatum, ut valeat, etsi communibus Juris Civilis solemnitatibus careat, dummodo habeat ea, quæ ad ipsum in Jure specialiter requiruntur, nimirūm I. Si sit testamentum scriptum, valet, dummodo testator in subscriptione tempus, quō testamentum fecit, dein filiorum nomina propria, ac demum uncias, seu quotam, quam singulis relinquere intendat, non signis numerorum, id est, cifris, sed per totas literas,

P

ex-

exprimat, ut requirit Imperator in Novell.  
107. cap. 1. Illud autem, quod de *subscriptione testatoris* dictum est, intelligendum,  
quando testamentum ab alio, quam à Pa-  
rente, scriptum est; si vero ipse scripsit,  
non opus est, ut subscribat, arg. l. Hac  
*consultissimā*, & Auth. *Quod sine C. de testam.*  
Unde quævis schedula, manu Parentis scri-  
pta, & in cista patris v. g. reperta, in utro-  
que foro servanda est. Gaill l. 2. observ. 112.  
num. 7. & 8. cum communi aliorum. II.  
Si vero testamentum sic nuncupativum, exi-  
guntur duo testes, saltem ad probationem,  
si de voluntate testatoris aliunde non satis  
constet. Laym. cit. tract. 5. cap. 2. n. 13. Reif-  
fenstuel num. 188.

243 RESOL. II. Si in isto testamento simul  
personæ extraneæ aliquid fuit relictum,  
tunc scire interest, an titulō hæredis, vel  
per modum legati, aut fideicommissi: si pri-  
mum, certum est, eam voluntatem defuncti, quan-  
tum ad illam duntaxat permixtam personam, pro  
nullo baberi, sed liberis accrescere, ut dicitur l.  
bac *consultissima* 21. Cod. de testam. in fine; quod  
intellige, nisi respectu illius personæ extra-  
neæ habeat solemnitates ad testamentum  
non privilegiatum requisitas, vel ad acta  
tradatur, vel nisi cohæres institutus sit cau-  
sa pia. Si secundum, probabile est quidem  
valere, etiam sine solemnitatibus, quia ac-  
ces-

cessorium naturam sequi convenit principalis, Reg. 42. Jur. in 6. At probabilius non valet, nisi saltem solemnitates ad codicillum requisitæ adhibeantur, scilicet quinque testes; quia Novell. 107. cap. 1. expressè requirit, ut dum parens in scriptis testans, pro extraneis vult facere legata, hæc debeant esse propria scripta manu, dictaque à testatoribus coram testibus. Ita Jason ad b.l. num. 10. & plures alii.

Punctum VI. Quid Juris de testamentis Militum, Rusticorum, & tempore pestis confectis?

RESOL. I. Testamentum Militis subsistit 244. sinè omni solemnitate, sufficitque, si modò de voluntate militis satis constet, quomodo docunque demum, per l. 15. Cod. de testam. milit. & l. 1. ff. eod. Hoc tamen privilegio, quantum est de Jure communi, gaudent solùm, dum sunt in expeditione, seu in apparatu ad conflictum, non verò in hybernis, aut præsidiis, nisi hostium incursibus ibi subjiciantur. §. 3. Inst. de testam. milit. Ait Jure novo ex Constitutione Maximiliani I. Imp. de Anno 1512. si milites non quidem sint in conflictu, sed tamen in castris, valet eorum testamentum, dummodo adhibeant duos testes. Alia adhuc privilegia adducit, & probat P. Schmiter cap. 3. à num. 1 26. utpote quod testari possint, etiamsi ob aliquod delictum militare, sinè violatione fi-

dei commissum, capitis sint damnati; quod possint hæredes instituere personas alias de Jure incapaces, exceptis hæreticis insignioribus, & mulieribus suspectis; quod possint partim testati, partim intestati decedere; quod filium, cuius notitiam habent, possint præterire in vicem ex hæredationis; quod eorum testamentum per agnationem posthumum non rumpatur, neque per querelam in officiosi testamenti evertatur; neque per legem falcidiam quoad legata & alia minuatur &c. Denique Privilegio militari etiam gaudent Curiones, seu Clerici campestres, Magistratus Militares seu Auditores, Medici & Chirurgi bellici, si in hostiaco deprehendantur, & ibidem decedant.  
*l. ult. ff. de testam. milit.*

**245**    RESOL. II. *Testamentum Rusticorum instantum est privilegiatum*, ut si in locis degant, ubi non inveniuntur litterati, septem testes etiam sine subscriptione testimonium adhibentes possint admitti. Si autem in illo loco septem testes de Jure habiles inventi non fuerint, requirantur, & sufficiant quinque; ex quibus si unus, aut duo, aut plures sint litterati, illi testamentum scriptum pro se, & sociis illitteratis subscribere debeant. Ita statuitur *l. fin. Cod. de testam.* Hanc testandi facultatem DD. extendunt, non tantum ad rusticos rus co-  
len-

Ientes, sed etiam ad Nobiles, & Cives, qui ruri habent sua prædia, & ibidem tempore testamenti conditi versantur. Vide Schmier cit. cap. 3. num. 137.

RESOL. III. *Quoad Testamentum tempo-* 246  
*re pestis confectum de Jure communi quidem*  
*solemnitates Juris non sunt sublatæ, nec di-*  
*minutæ, nisi in hoc solo, quod ob infectio-*  
*nis periculum testes non oporteat esse si-*  
*mul & semel congregatos, sed successivè ac*  
*separatim venire queant, textu expresso in*  
*l. 8. Cod. de testam.* Attamen ex recepta, &  
in Camera Imperiali approbata consuetu-  
dine, tres vel duo testes sufficiunt in simili  
testamento, ut tradunt Gaill l. 2. observ. 118.  
num. 18. & alii.

Punctum VII. *Quæ forma requiratur ad*  
*Codicillum, & ad quid serviat?*

RESOL. I. *Codicillus (cujus definitio* 247  
*patet ex n. 115.) potest fieri cum testamen-*  
*to, & extra testamentum; item ante, & post*  
*illud; in scripto, vel oretenuis, ut conce-*  
*dunt communiter omnes, & patet ex §. 1.*  
*Inst. de Codicill. l. 4. & fin. C. eod. & l. 3. ff. de*  
*Jure Codicill.* Servit itaque ad hoc, ut qui  
testamentum facere nolunt, libenter tamen  
aliqua legata, vel donationes mortis causâ  
sacerent, id possint per Codicillum ab in-  
testato dictum. Servit etiam, ut qui testa-  
mentum jam fecerunt, possint illud muta-

P 3 re,

230      *Distinctio II. Caput III. s. I.*

re, declarare, minuere, vel augere, salvâ tamen hæredis institutione; nam (ut dicitur §. 2. *Inst. de Codicill.*) *Codicillis hæreditas nec dari, nec adimi potest, ne confundatur Jus testamenterum, & Codicillorum.* Intellige directè; nam indirectè per fideicommissum hæreditas in Codicillo dari potest, v.g. si quis intestatus decedens rogar hæredem ab intestato, ut hæreditatem totam, vel partem ejus restituat alteri.

248      RESOL. II. Forma Codicilli testamentarii, seu illius, qui fit cum testamento, seu ante, vel post, non est alia, quam ipsius testamenti; cùm enim hic Codicillus ad testamentum se habeat, velut accessorium, nihil speciale vel separatum ab eo exigit, sed sequitur conditionem ipsius, ejusque formâ informatur, l. 16. ff. *de Jure Codicill.* Forma verò Codicilli, qui fit extra testamentum, seu ab intestato, consistit in quinque testibus, etiam non rogatis, nec specialiter qualificatis, cùm etiam foeminae possint esse testes in Codicillo, ut contra Antonium Perez communis habet. Sententia cum & apud Haunold tr. 7. n. 199. Nec requiritur facialis eorum præsentia coram Codicillante, sicut coram testante; debent tamen nomina sua subscribere, si Codicillus sit scriptus. l. ult. §. 3. *Cod. de Codicill.* Legatarios tamen, & fideicommissarios com-

mu-

muniter Interpretes excludunt à testificatione Codicilli; cùm inter eos, & Codicillantem geratur principale negotium, expediti autem Juris sit, neminem in propria causa testificari posse.

RESOL. III. Diēta forma probabiliter<sup>249</sup> non ad substantiam Codicilli, sed solum probationis causā desideratur; ideoque si Adversarius fateretur, vel ex aliis indiciis constaret, hanc fuisse mentein Codicillantis, etiam deficientibus testibus judicandum foret pro valore Codicilli. Fundamentum hujus resolutionis sumitur ex §. 3. Inst. de Codicill. ubi dicitur: *Codicillos autem etiam plures quis facere potest, & nullam solemnitatem ordinationis desiderant.* Accedit, quod Codicillus possit nuda voluntate testatoris resolvi; consequenter etiam perfici, juxta Reg. 35. ff. de div. Reg. Jur. Nihil tam naturale est, quam eo genere quidque dissolvere, quō colligatum est.

Punctum VIII. *An testamentum, ex defectu solemnitatis invalidum, valeat per modum Codicilli, si ejusdem conditiones habeat? Et quid, ac cuius effectus sit clausula Codicillaris?*

RESOL. I. Tale testamentum regulari-<sup>250</sup> ter non valet in vim Codicilli, nisi Clausulam Codicillarem habeat adjectam, per tex- tum expressum in l. 1. ff. de Jur. Codicill. ibi: *Sepissimè scriptum, & constitutum est, eum qui te-*

stamentum facere opinatus est, nec voluit, quia Codicillos id valere, videri nec Codicillos fecisse. Ei clarius l. fin. §. 1. Cod. de Codicill. Illud quoque pro ratione servandum est, ut testator, qui decrevit facere testamentum, si id adimplere nequiverit, intestatò videatur esse defunctus, nec transducere licet ad fideicommissum interpretationem, velut ex Codicillis ultimam voluntatem; nisi id ille complexus sit, ut vim etiam Codicillorum scriptura debeat obtainere. Sed dixi, regulariter; excipitur enim testamentum parentum inter liberos, & ad pias causas; item si hæres intestamento scriptus, fecit juramentum præstandi fideicomissa tabulis data. arg. l. 77. §. 23. ff. de legat. 2.

**251** RESOL. II. *Clausula Codicillaris* est, quam testator testamento apponit, expressè vel tacite per eam declarandō, quod si voluntas sua ultima ex defectu alicujus solemnitatis non valeret ut testamentum, valeat tamen ut Codicillus. Est igitur duplex, expressa, & tacita. Expressa est, si testator expressè dicat: *Si hæc mea dispositio non valet ut testamentum, volo ut valeat quæ Codicillus.* Tacita, quando simili modo scribit: *Si hæc mea dispositio non valeat ut testamentum, volo ut valeat, modo quo potest, meliore.* Hodie præxi utraque Clausula Codicillaris solet apponi testamentis; nec abs ratione, nam

RE-

RESOL. III. Dicta clausula Codicilla-<sup>252</sup>  
ris operatur plurimūm. I. Casu quo te-  
stamentum ex defectu alicujus solemnitatis  
est nullum, valet tamen dispositio ut Co-  
dicillus. II. Institutio directa hæredis,  
quæ ob testamenti nullitatem est irrita, ob-  
liquatur in fideicommissariam, ita, ut hæ-  
res ab intestato veniens debeat, detractâ  
Trebellianicâ, hæreditatem restituere hæ-  
redi scripto, per l. fin. §. 1. C. de Codicill. &  
l. 29. ff. *Qui testamenta facere &c.* III. Juxta  
multos hæres necessarius, injustè præteri-  
tus, vel ex hæredatus, non obstante nulli-  
tate testamenti, gravatur, retentâ legitimi-  
mâ, & Trebellianicâ, reliquum restituere  
hæredi scripto in vim fideicommissi. Cu-  
jus tamen sententiæ oppositum sustinet Hau-  
noldus tract. 6. num. 406. pluribûs citatîs, ut  
pote magis conforme æquitati, & menti  
Legislatoris. IV. Vi hujus clausulæ debet  
hæres ab intestato solvere legata relicta in  
testamento solemnitatibus destituto. V.  
Potest hæres in tali testamento institutus  
agere pro libitu vel ex testamento, vel in  
vim Codicilli; ubi tamen variationi locus  
non conceditur. d. l. fin: §. 1. & 2. C. de Co-  
dicill.

Punctum IX. *Quotupliciter fieri possit Le-  
gatum, & quæ ejus forma?*

P 5

R E

**253** RESOL. I. Legata quoque fieri possunt tam in - quam extra testamentum ; tam oretinus , quam in scriptis , ut constat ex tot. tit. f. de Legat. Item Inst. & Cod. de Codicillis. Ulterius possunt Legata relinqu pure , id est , absque ullo adjecto tempore , conditione , vel modo , §. 2. Instit. de V. O. Vel in diem , ut cum testator quid legat tradendum tempore certo ac determinato post mortem ; si enim dies vel tempus incertum apponatur , Legatum censetur non in diem , sed conditionatum , l. 75. ff. de condit. & demonstrat. Vel sub conditione , eaque vel de praeterito , vel de presenti , vel de futuro ; inter quas conditiones aliæ sunt potestativæ , quæ nempe sunt in potestate illius , pro quo apponuntur : aliæ casuales , quæ à casu fortuito dependent ; aliæ mixtæ , quæ de utroque aliquid participant. Item aliæ impossibilis à natura , vel de Jure , seu turpes ; aliæ possibilis , tam ex sua natura , quam ex lege , scilicet honestæ .

**254** RESOL. II. Si Legata sint relictæ pure , legatarius statim fingitur habere illorum dominium à puncto mortis testatoris , ideoque etiamsi , antequam hæreditas ab hæredie adita sit , moriatur , transmittit illud ad hæredes , l. i. §. i. & §. Cod. de caduc. tollend. Quanquam ejusmodi legata peti non possint , quousque hæreditas adita sit , à quo tempore primùm , supposita acceptatione , legata-

rins

rius accipit dominium verum, & comple-  
tum rei legatæ, unà cum fructibus, etiam  
ante aditam hæreditatem post mortem te-  
statoris perceptis, secundùm communio-  
rem, & in praxi receptam sententiam. Si  
relicta sint in diem certum, æquiparantur  
legatis puris, & licet ante præfixum diem  
peti non possint, jus tamen petendi, & actio  
transmittitur ad hæredes legatarii, si hic  
post mortem testatoris ante illum diem de-  
cedat. l. 21. ff. quando dies legat. cedat. Si sint  
relicta in diem incertum, idque in gratiam  
hæredis, ad instar conditionatorum de fu-  
turo suspenduntur ad eventum tali diei an-  
nexum, nec transmittuntur ad hæredes le-  
gatarii, si ante illum eventum è vivis de-  
cedat. Ibid. Si sub conditione de præteri-  
to, vel præsenti, non suspenduntur, sed  
vel illicò debentur, vel statim evanescunt.  
Si demum relicta sint sub conditione de fu-  
turo, eaque sit possibilis & honesta, sive  
potestativa, sive casualis, sive mixta, ad  
ejus eventum suspenduntur: si verò impos-  
sibilis, vel turpis, habetur pro non adjecta,  
arg. l. 14. ff. de condit. instit.

RESOL. III. Si Legatum fiat in testa- 258  
mento, vel Codicillo, regulariter sequitur  
eorum naturam, & conditionem; unde si  
testamentum ex defectu alicujus solemnita-  
tis deficit, corruunt etiam legata profana-

ci-

eidem inserta, nisi testamentum appensam habeat clausulam codicillarem. Textus expressus in l. 1. ff. de jur. Codicill. Si verò legatum fiat extra testamentum, requiruntur & sufficiunt quinque testes, etiam non rogati, sive fiat oretenus, sive in scriptis, sic tamen, ut si in scriptis fiat, debeant illi testes esse simul præsentes, & se subscribere, l. fin. C. de Codicill. Hæc tamen omnia intellige de legatis profanis; nam ad legata pia tam in quām extra testamentum sufficiunt duo testes, itaque solius probationis causā adhibendi, per dicta superiùs n. 235.

Punctum X. *Quis, Cui, & Quid legare possit?*

**256** RESOL. I. Omnes & soli illi possunt legare, qui possunt testari. Certum ex l. 2. ff. de Legat. 1. quinam verò gaudeant, & quinam careant jure testandi, patet ex dictis cap. 1. §. 3. Puncto 3.

**257** RESOL. II. Regulariter loquendō, illis omnibus, & solis potest quid legari, qui possunt hæredes institui, per textum in §. 24. Inst. de legat. quinam verò possint hæredes institui, & qui non, dictum in Cap. II. §. 1. Punct. 2. Dixi, regulariter; quia limitatur resolutio in Fratribus Minoribus, quibus, et si hæredes institui nullatenus valeant, legata tamen fieri possunt per modum eleemosynæ, dummodò sint ita moderata, ut ex-

exinde nulla fraus, quasi sub forma legati hæreditas relinqueretur, præsumi possit, nec relicta sint sub modo repugnante suæ Regulæ, & Ordinis puritati, ut cavit Clemens V. in *Clem. Exivi, de V. S.* Quòd si testator aliquid non excessivum generaliter leget, absque modi expressione, tale legatum sub modo licito intelligatur Fratribus esse relictum, ità quòd nec legans merito, nec Fratres ipsi effectu relicti fraudentur, ait Nicolaus III. in cap. *Exiit, de V. S. in 6.* Ad quorum plenioram intelligentiam, & conscientiarum directionem atque securitatem Anno 1628. 9. Septemb. sub Urbano VIII. emanatae sunt quædam declarationes Sac. Congr. pro FF. Min. de Observantia, & Reformatorum, vindicandæ apud Fagnanum in *s. Decretal. ad tit. de excess. Prelat. cap. Nimis prava, à num. 46.* ubi 12. Articuli de hujusmodi legatis licitis vel illicitis continentur.

RESOL. III. Legari possunt res omnes, 258 seu corporales, seu incorporales, quæ sunt in hominum commercio, nec prohibitæ alienari. *s. 21. Inst. de legat.* Et I. quidem legari possunt non solùm res in specie, v. g. hic bos, ille equus, sed etiam in genere, ut cum Juristis loquar, e.g. equus indeterminatè, ubi electio discreta est penes legatarium, arg. *l. 37. ff. eod.* II. Non solùm res præsentes, sed etiam futuræ, v. g. fructus agri

agri jam seminati, §. 7. *Inst. eod.*    III. Etiam res aliena, si testator scivit esse alienam; quia tunc tenetur hæres vel illam emere, vel si Dominus vendere recuset, pendere ejus æstimationem, §. 4. *Inst. eod.*    Nec ista Lex fuit correcta per Jus Canonicum, ut videri posset ex *cap. Filius*, §. de *Testam.* quia Pontifex ibidem solum improbat iniquam detentionem Legatarii, rem ad aliam Ecclesiam pertinentem sibi retinentis, ut communiter explicant Interpretes.    IV. Dum quis alicui legat rem alteri oppignoratam, sciente testatore, tenetur hæres pignus luerre, l. 57. ff. *de legat. I.*    Et dum legat debitori suum debitum, ab ejus solutione liberatur, §. 13. *Inst. eod.*    Dum vero creditori legat rem ei alias debitam, distinguendum est inter debitum pure legale, cuiusmodi est legitima, dos, donatio propter nuptias &c. & inter debitum ex contractu, vel ex delicto, aut quasi contractu, & quasi delicto: in priori casu secundum proportionem debiti liberatur à solutione, *per Authent. Præterea, Cod. unde vir & uxoris.* in posteriori non item, quia legatum est liberalitas & donum, quô non extinguitur debitum justitiæ commutativæ, vel gratitudinis.    Vide hæc, & plura alia apud Haunoldum tract. 7. controv. §. 6. 7. §. 8.

Pun-

Punctum XI. Quid censendum de Legato  
sub his conditionibus: Si legataria non nupse-  
rit; si nupserit; si nupserit certæ personæ;  
si ingressura sit religionem; si non ingre-  
sua?

RESOL. I. Conditio illa, si non nupserit,<sup>259</sup>  
respectu personæ nunquam maritatæ in Ju-  
re habetur pro non adjecta; ed quod sic  
contra favorem matrimonii, & bonum  
Reipublicæ ex procreatione prolis prove-  
niens, l. 62. § duabus seqq. ff. de condit. § de-  
monstrat. consequenter legataria illa poti-  
tur legatō, etiamsi nubat. Altera verò,  
si nupserit, valida, & observanda est, per  
l. 63. ff. eod. quia licitum est ad matrimo-  
nium certa lege invitare; dummodo talis  
conditio non in præjudicium ingressus Re-  
ligionis, vel susceptionis SS. Ordinum in-  
tendatur; quia alioquin haberetur pro non  
adjecta, per Novell. 123. cap. 37. Similiter  
tertia conditio, si nupserit certæ personæ, ob-  
servanda est, nisi vi illius legataria nubere  
deberet personæ indignæ, aut illa, in cu-  
jus favorem conditio est apposita, connu-  
bium detrectaret, tit. l. 63. §. 1. ff. de condit.

RESOL. II. Valet etiam conditio, si<sup>260</sup>  
ingressura sit Religionem, vel Clericalem Ordi-  
nem suscepserit, arg. cap. 2. de condit. appos. cùm  
licitum sit sub spe lucri temporalis quem-  
piam ad Religionem, vel Clericatum invi-  
tare,

tare, nec per eam Legatarius, vel Legataria, nisi indirecte, & per quandam consequiam, à statu matrimoniali retrahatur, directe autem intendatur status perfectior. Opposita verò conditio, si Religionem non ingrediatur, tunc solùm sustinenda est, quando testator pro fine habuit conservationem familiæ, vel stemmatis, aut quia in sæculo pluribūs ad suī, & familiæ sustentationem indiget; non verò, quando pro fine habet retractionem Legatarii à statu Religioso, vel alio perfectiore, ut post Covarruviam, & Molinam bene advertit Reiffenstuel num. 653.

*Punctum XII. Quotuplex sit fideicommissum, & qualem exigat formam?*

261. RESOL. I. *Fideicommissum formaliter sumptum* I. aliud est *universale*, aliud *particulare*; vi prioris tota hæreditas, vel certa quota ejus debet restituī: vi verò posterioris res aliqua singularis, quod proinde ipsa à legato non distinguitur, sed ei per omnia exæquatur, l. i. ff. de legat. i. II. Aliud est *expressum*, quod sit verbis expressis: aliud *tacitum*, quod præsumitur ex indiciis proportionatis, veluti, si testator prohibeat, ne bona immobilia alienentur extra familiam. III. Aliud est *absolutum*, quō hæres fiduciarius absolute gravatur ad hæreditatem restituendam; Aliud *conditio-*

n.d.

natum, quô solum gravatur sub conditione,  
v.g. istâ : si heres sine liberis deceperit ; quæ  
per hæredis ingressum in Religionem & quæ  
censetur adimpta, ac si liberos reliqui-  
set, ut ex cap. 8. de probat. & Nov. 123. c. 37.  
deducit P. Schmier cap. 4. num. 8. citans plu-  
res alios. IV. Dividitur in *commune*, &  
*familiare* ; in hoc attenditur specialiter ad  
Familiam, secùs in illo.

RESOL. II. Pro forma fideicommissi<sup>262</sup>  
inspiciendum, an relinquatur in testamen-  
to, an in Codicillo; & si primum, requi-  
runtur solemnitates testamentariæ : si se-  
cundum, quinque testes, qui simul præ-  
sentes esse, fideicommittentem videre, &  
si scriptum sit fideicommissum, subscribe-  
re debent. *L. ult. s. ult. C. de Codicill.* Quòd si  
fideicommittens has quoque solemnitates  
evitare cupiat, poterit hæredem fiduci-  
arium coram se præsentem sinè ulla scriptu-  
ra, vel teste rogare, ut hæreditatem al-  
teri restituat; quo casu ad eam restituendam  
in utroque foro tenebitur : & si ne-  
get fideicommissum, potest à fideicommis-  
sario compelli, ut vel juret fideicommissum  
non esse relictum, vel illud restituat. *s. ult.*  
*Inst. & l. ult. C. de fideicommiss.* Unde

RESOL. III. Potest heres fiduciarius<sup>263</sup>  
fideicommissario per implorationem officii Ju-  
dicis compelli, ut hæreditatem audeat, & te-

Q

sti.

stituat, per l. 4. ff. ad SCtum Trebell. tunc autem ex dispositione hujus legis amittit quartam Trebellianicam, omniaque emolumenta fideicommissi, cùm tam lucra, quām damna pertineant ad fideicommissarium. Si verò sponte adierit hæreditatem, quam totam, vel ultra dodrantem restituere est rogatus, tunc liberum est ei, ut vel retentâ quartâ Trebellianicâ pro rata illius onera, & actiones cum fideicommissario dividat: vel eâdem quartâ dimissâ, actiones hæreditarias omnes in fideicommissarium transferat. §. 7. in fin. Inst. de fideicommiss. hæred.

*Punctum XIII. Quid si vel hæres fiduciarius, vel fideicommissarius ante aditam ab illo hæreditatem moriatur; aut filio à parente fideicommisso gravato, postea nascantur soboles?*

**264** RESOL. I. Si hæres præmoriatur, obligatio restituendi hæreditatem transit ad hæredes ejus transmissarios: si verò præmoriatur fideicommissarius, ipsum fideicommissum purum, & non conditionale, ad ipsius hæredes transmissarios devolvitur. *L. un. C. de cad. toll.*

**265** RESOL. II. Si filio, postquam fideicommisso à parente gravatus est, subnascantur proles, fideicommissum ex præsumpta defuncti voluntate expirat; quia in ejusmodi fideicommisso tacita subintelligitur conditio,

ditio, nisi eidem nascantur liberi, l. 30. C. de fideicommiss. Si tamen proles ante hæredem gravatum moriatut, jus fideicommissarii reviviscit; quia tunc jam verum est, quod filius fideicommittentis sine sobole vitam suam reliquerit, ut in l. cit. requiritur. Hanc tamen constitutionem de solis liberis ex legitimo matrimonio postea natis, vel saltem per subsequens matrimonium legitimatis, non verò de aliis, multò minus de adoptivis, intelligendam putat Sanchez de matr. lib. 7. disp. 105. n. 7. & seqq. eumque secutus Perez, qui etiam causam piam, si hæc fideicommissarium agat, à liberis excludi judicat, contradicente tamen P. Haunold tract. 7. num. 144. ex præsumpta voluntate testatoris, quod animam suam saltem nepotibus præferri cupiat.

Punctum XIV. Quot modis fiat donatio mortis causâ, & qualis ad eam solemnitas, vel forma exigatur?

RESOL. I. Donatio mortis causâ præ-<sup>266</sup>  
cipuè fieri potest tribus modis, qui refe-  
runtur l. 2. ff. de mortis causâ donat. ibi: tres  
essè species mortis causâ donationum, Julianus  
ait. Unam, cùm quis nullo præsentis periculi metu  
conterritus, sed sola cogitatione mortalitatis do-  
nat. Aliam essè speciem mortis causâ donationum  
ait, cùm quis imminentे periculo commotus, ita  
donat, ut statim fiat accipientis. Tertium esse ge-

Q 2

nus

*nus donationis ait, si quis periculō motus non sic donat, ut statim fiat accipientis, sed tunc demum, cùm mors fuerit secuta. Inter has verò species notabile est discriminē; quia, si donatio sit secundæ, vel tertiæ speciei, scilicet facta ex motivo præsentis, vel imminentis periculi mortis, transactō illō periculō, exspirat ipso Jure, ut dicemus Punct. ult. Se- cùs verò, quando est donatio primæ speciei, sīnè intuitu talis periculi perfecta. Item, si sit secundæ speciei, dominium rei donatæ statim transfertur in donatarium acceptantem, attamen revocabile per to- tam vitam donantis; si verò sit tertiæ spe- ciei, dominium non transfertur ante mor- tem donantis.*

267      *RESOL. II. Forma donationis mortis causâ in eo consistit, quod præter mortali- litatis cogitationem debeat expediri inter donantem, & donatarium præsentes; nam mortis causâ donatur, quod præsens præsenti dat, dicitur l. 38. ff. de mort. caus. donat. vel saltē, ut nunc communiū traditur, donatario per aliūm acceptante; quia hoc est gene- rale donationibus, quod etiam absenti per epistolam, aut nuntium fieri possint, sta- timque valeant, quamprimum alter acce- ptaverit, sive per se, sive per aliū à Ju- re ad hoc admissum; & quod in specie va- leat, si donatio mortis causâ acceptetur*

per

per alium, textus clarus est l. 11. §. 2. ff. de donat int. vir. & uxor. ubi uxor, quod mortis causâ donatum voluit, per filium acceptasse dicitur. Præterea, dum fit ad causas profanas, adhibendi sunt quinque testes; siquidem in omni ultima voluntate, excepto testamento, quinque testes - - debent adhiberi, ait Imperator l. fin. C. de Codicill. Ludwell pag. mihi 430.

Punctum XV. Quis, & cui donare mortis causâ valeat?

RESOL. I. Omnes illi, & soli mortis causâ donare possunt, qui testari; nam ita dicitur, l. 32. §. 8. ff. de donat. int. vir. & uxor. mortis causâ donare poterit, cui testari permissionem est. Ubitamen Ludwell pag. 432. quoad partem negativam facit exceptionem in filiofamilias, qui, licet de bonis profectiis, & adventitiis testari non possit, adventitia tamen, in quibus plenum Jus habet, mortis causâ donare non prohibetur, arg. Nov. 117. §. 1.

RESOL. II. Omnibus illis mortis causa donari permittitur, quibus legari, vel quoquo modo aliquid ex testamento relinqui potest. l. 9. ff. de mort. caus. donat. Hinc cum conjugibus legari posse non dubitetur, nec mortis causâ donari prohibendum est, per textum expressum in l. 9. 10. & 11. ff. de donat. int. vir. & uxor.

246      *Distinctio II. Caput III. §. I.*

Punctum XVI. Qualiter compleatur, &  
quomodo expiret donatio mortis causâ?

270      RESOL. I. Donatio mortis causâ com-  
pletur per ipsam mortem donantis, ita, ut  
citra rei donatæ traditionem ipsius domi-  
nium irrevocabile transeat in personam  
donatarii ipso Jure. l. 32. ff. de mort. caus. donat.  
& patet ex paritate legatorum, quorum  
dominium etiam citra traditionem post-  
mortem legantibus transit in legatarium, arg:  
l. 80. ff. de legat. 2. Unde non est paritas  
instituenda de donatione inter vivos, &  
aliis contractibus seu pactis, & de donatio-  
ne mortis causâ; quia hæc posterior po-  
tiùs ultimis voluntatibus, & præcipue le-  
gatis, quam contractibus comparatur, per  
l. 37. ff. de mort. caus. donat.

271      RESOL. II. Donatio mortis causâ expi-  
rat, seu resolvitur duobus modis, ipso Jure,  
& per voluntatem Donatoris. Ipso Jure expi-  
rat I. Quando cessat infirmitas, seu mortis  
periculum, intuitu cuius facta est donatio,  
§. i. Inst. de donat. l. 19. & l. 29. ff. de mort.  
caus. donat. II. Quando donatus mori-  
tur ante Donatorem. cit. §. i. Inst. de donat.  
& l. 19. ff. de reb. cred. III. Si Donator pœ-  
nâ capitatis afficiatur, l. 7. ff. de mort. caus. do-  
nat. Per voluntatem Donatoris verò Do-  
natio mortis causâ resolvitur I. Si donato-  
rem factæ donationis pœnitit, l. 13. & 30.  
ff.

ff. eod. II. Si rem in specie donatam, nulla urgente necessitate voluntariè alienaverit. III. Si inimicitia gravis inter donatorem & donatarium supervenerit. IV. Si præter spem donatori nascantur proles, quæ cùm sit causa sufficiens revocandi donationem inter vivos, arg. l. 8. C de revocand. donat. à fortiori sufficiens erit revocandi donationem mortis causâ. Imò propriè non est revocatio, sed potius defectus conditionis tacitè subintellectæ, nisi liberi supervenerint. Haunold tr. 7. num. 439.

### §. II.

#### Praxis Confessorum circa expostam Doctrinam.

### CASUS I.

**Q**uintinus Parochus ac Decanus non modicè divisus moritur ex improviso intestatus. Misso autem, ut moris est, Commissario, & exacte cuncta indagante, comparet quidam Civis, qui asseveravit se ex ore Defuncti semel audivisse, quod cùm sua bona acceperit ab Ecclesia, illa quoque eidem fit redditurus; quod hæredibus ab intestato non nisi invisum esse potuit. Similiter comparet œconomam coram Confessario, dicitque promissa sibi à Defunto fuisse supellecilia quædam, si modò patientiam haberet adhuc per annum gubernandi familiam;

Q 4

m-

interim se illa clām substraxisse, bene gnaram, ab  
bæredibus non fuisse concedenda. Quæritur jam,  
quid in duplice hoc Casu & Commissarius, & Con-  
fessarius habeat resolvendum?

## RESOLUTIO.

272 **Q**uantum ad primum (quod solum for-  
sitan factum, alterum verò fictum) præscindendo jam ab illa quæstione delica-  
ta, an valeat consuetudo, vel etiam privi-  
legium, vi cuius consanguinei possint indi-  
scriminatim etiam ab intestato succedere in  
bonis Clericorum Beneficiatorum, adhuc  
duo valdè difficilia consideranda sunt. I.  
Quòd unus solum testis id asseruerit, II.  
quòd Decanus id non per modum disposi-  
tionis actualis, sed præcisè discursus gra-  
tiâ, significandô suum propositum, ac in-  
tentionem, illa protulerit. De primo pa-  
tet ex num. 237. in foro externo unum te-  
stem, licet omni exceptione majorem, etiam  
in causis piis non sufficere ad plenam fidem  
faciendam, nisi alia accedant indicia; un-  
de ex hoc capite Commissarius ad interi-  
mendam successionem ab intestato proce-  
dere non potest. De altero communis est  
Sententia, quòd tale dictum nihil valeat;  
quia deest consensus de præsenti ad testan-  
dum, vel aliam ultimam voluntatem fa-  
ciendam, qui tamen est de jure naturæ;

ne-

neque enim hic Parochus ullo modo suam ultimam voluntatem facere incepit, sed solum de facienda cogitavit, & mentionem fecit. Aliud dicendum foret, si actu, licet sine solemnitate, suam ultimam voluntatem ore, vel calamō declarāisset, dicendo; *bunc hæredem instituo; buic legatum facio,* etsi tunc, antequam finiret, morte præoccupatus fuisset; sic enim valeret favore causæ piæ, ut cum Tiraquello, Molina, & aliis, resolvunt Layman cit. tract. 5. cap. 2. num. 6. & Reiffenst. num. 167. Ista tamen testimonia, & indicia satis erant ad permovendum Ordinarium, ut ex plenitudine potestatis imperfectum Defuncti consensum suppleret, & partem bonorum relictorum detraheret pro Ecclesia.

Quoad secundum, dico Oeconomam poruisse bonâ conscientiâ subtrahere ea, quæ sibi à Domino promissa sciebat, si conditionem adimpleverit; quia hic intervenit contractus, saltem innominatus, de cuius natura est, ut dum una pars conditionem suam implet, etiam altera implere teneatur; unde hæc non erat propriè ultima voluntas. Sed etsi fuisset, nihil obstat, quia de Jure Canonico, ad quod solum stringebatur Parochus, nulla solemnitas requiritur ad substantiam voluntatis ultimæ, sed solum ad probationem in foro

Q 5

ex-

externo, secundum dicta num. 143. adeoque  
in foro interno potest quilibet rem sibi re-  
lictam licet accipere, conformiter ad ea,  
quæ diximus num. 234. præsertim in tali suæ  
defraudationis periculo.

## C A S U S II.

**R**Aynaldus binâ vice se despousaverat, prima vi-  
ce quidem habenti dotem valde congruam,  
quam ad suam negotiationem impendendo, non pa-  
rum res suas adauxit: altera vice verò inopi, sed  
multum à se dilectæ. Cùm igitur ex utroque Ma-  
trimonio haberet proles in æquali numero, eas an-  
te suam mortem in æquali portione hæredes insti-  
tuit, unâ etiam uxori relicta reservata, Quæri-  
tur, an validè, & licet?

## R E S O L U T I O

**E**st negativa; quia prolibus ex primo Ma-  
trimonio præter hæreditatem patris,  
in qua utique poterant æquales fieri cum  
liberis secundi Matrimonii, etiam de Jure  
competebat hæreditas matris, constans ex  
allata dote, & acquæstibus, seu communi-  
bus lucris, interim permixta cum bonis pa-  
ternis, quæ de Jure tota, vel si aliter con-  
ventum fuerit inter ipsos conjuges, saltem  
ex parte transmitti debebat ad illius uxo-  
ris

ris liberos, & hæredes; unde hæc portio, quasi prælegatum, ipsis à patre relinquendi debat, salva cæteroquin dispositione de bonis paternis. Interim non judico, quod dictæ proles possint testamentum omnino dicere nullum, cum non fuerint ex hæreditatæ, sed agere ad supplementum legitimæ sibi debitæ, conformiter ad dicta num. 184. Quantum verò ad necessarias in tali testamento solemnitates, recole dicta n. 243.

### C A S U S III.

**S**Empronia facit testamentum, & in eo varia legata pro diversis Monasteriis, & Ecclesiis, ac inter ea etiam Fratrum Minorum. Contingit autem, ut testamentum, nescio qua ex causa, per hæredes ab intestato impugnetur, sicque hæres institutus diu à præstandis legatis impediatur, sollicitans propterea etiam legatarios, ut, quod citius pia voluntas Defunctæ adimpleatur, ejus causam velint coadjuvare. Quid hic agendum Fratribus Minoribus?

### R E S O L U T I O.

**P**Rorsus nihil; cum enim vi suæ Regulæ 274 sint omnis juris ad temporalia incapaces, etiam ad hæc legata nullam possunt facere prætensionem: unde se perinde habere

bere debent, ac si res ipsos omnino non attingeret, liberi tamen ad interiū ab omni obligatione, utpote quam ante eleemosynam actu acceptam nullus pauperum in se agnoscit. Quod si jam ultrò legatum per modum eleemosynæ eis præsterur, illud cum gratiarum actione acceptare possunt, & conditiones, quæ sunt adjectæ, tenentur adimplere. Arque hic modus omnino conformis est nostræ Regulæ, & Summorum Pontificum Nicolai III. & Clementis V. Declarationibus, nec, quæ forsan indulgentiores postea emanârunt quoad Legatorum receptionem, apud nos in Germania sunt receptæ. Hinc cùm in certo loco Patronus quidam (cujus memoria in benedictione est) provisionem aliquam mensalem nobis in natura testamentō reliquisset, & ad hujus publicationem humilis obsequii causâ ob requisitionem Executoris deputatus à Superiore locali comparuisse, mox ubi legatum hoc prælectum fuit, præmissis debitiss gratiis, publicè hanc contestationem feci, nos dictum legatum haud aliter, quam per modum puræ eleemosynæ, pro qua Defuncto grati esse velimus, acceptare, & ut id Protocollo inseratur, supplicare, quod & factum est.

## §. III.

## §. III.

De eis, quæ sunt contraria  
Testamento.

Punctum I. Quæ, & quot sint contraria  
Testamento?

**R**ESOL. Contraria testamento dicuntur modi illi, quibus testamentum infirmatur, annullatur, aut evertitur; & sunt duo, nempe *Via Juris*, & *factum hominis*. *Via Juris* id contingit, quando testamentum rumpitur, irritatur, vel destituitur. tot. rubr. ff. de *injustorupto*, & *Inst.* Quibus modis testamenta infirmantur. Facto hominis id evenit, quando, proposita querela inofficioi testamenti, per sententiam Judicis rescinditur.

Punctum II. Quid sit Testamentum rumpi,  
& quot modis fiat?

**R**ESOL. I. Rumpi testamentum dicitur, cum in eodem statu manente testatore, ipsius testamenti jus vitiatur, sunt verba princ. *Inst.* Quibus mod. testam. infirm. Et hoc fit tribus modis, agnatione hæredis; effectione in filium suum, vel civilem; & mutata voluntate testatoris. Patebit explicatione.

**R**ESOL. II. Testamentum rumpitur agnatione hæredis, ist est, quando post conditum testamentum testatori hæres suus, & legitimus, dummodo vivus, & non der-

declinans in monstrum , venerit in lucem,  
*l. 3. §. 4. ff. de injusto rupto* , & *l. 3. C. de posthum. hæred. instit.* Quòd si vivo testatore, hæres agnatus moriatur , ex æquitate Prætoria testamentum reconvalescit , *l. 12. ff. de injust. rupt.* si verò primùm moriatur mortuo testatore , manet ruptum testamentum ; quod idem fit , quando in locum filii præmortui subintrat nepos , de quo vide Clariß. D.D. Peregrini *l. 2. Instit. ad tit. 13. §. 1.* Si testamentum maneat ruptum , ne quidem legata debentur , saltem profana , *l. 1. C. de posthum. hæred.* Attamen legata pia , si sint in moderata quantitate , manere salva , cùm etiam illi , qui habent liberos , ejusmodi legata in subsidium suæ animæ facere soleant , rectè sentit P. Wiestner *ad h.t. num. 227.*

278 RESOL. III. Rumpitur etiam testamentum *effectione filii naturalis in filium suum* , quod fit , si post testamentum conditum legitimatur , *juxta Nov. 89. & §. fin. Inst. de nupt.* aut , si quis ab ascendenre in filium adoptatur , *§. 2. Inst. de adoption.* aut à quo cunque arrogatur , quia sic civiliter fit quasi hæres suus , *§. 1. Inst. quib. mod. test. infirm.* in quo tamen casu nec legata pia corruunt , nec testamentum ad pias causas rumpitur , sed solum filio hujusmodi arrogato præstanda est quarta debita ex constitutione D. Pii , *l. 8.*

l. 8. §. 15. ff. de inoff. test. ut notavit Wiesner num. 230.

RESOL. IV. Rumpitur denique testamento-<sup>279</sup>  
mentum mutata voluntate testatoris, seu re-  
vocatione, aut verbali, aut reali. Ut verba-  
lis revocatio testamenti valeat, requirun-  
tur duo, scilicet, ut fiat coram tribus sal-  
tem testibus, vel apud Acta: & ut elas-  
psum sit decennium à tempore conditi te-  
stamenti, prout sat clarè exprimitur l. 27.  
C. de testam. estque communis DD. Realis  
autem testamenti revocatio fit duplii mo-  
do. I. Si testator consultò, & animò re-  
vocandi, aut aliis ejus jussu, testamen-  
tum rescindat, dilaceret, sigilla amoveat,  
scripturam deleat, inscribat, superscribat,  
vel cancellat, l. 1. & 2. ff. de bis, quæ in testam.  
delenit. Ubi tamen notandum ex P. Reiffen-  
stuel num. 750. quodsi plures sint scripti hæ-  
redes, & testator solummodò unius, vel  
alterius, non verò omnium nomina de-  
leat, testamentum non rumpatur, sed to-  
ta hæreditas accrescat hæredibus non dele-  
tis. II. Fit realis revocatio, si testator  
aliud condiderit testamentum, etsi hoc po-  
sterius ex aliquo accidente non sortiatur  
suum effectum, ut clarè deciditur §. 2.  
Inst. quib. mod. test. infirm. Debet tamen il-  
lud posterius testamentum legitimè, & cum  
debitis Juris solemnitatibus fuisse factum,

ut

ut exigitur cit. §. 2. *Inst.* & l. 2. ff. de *injust. rupt.*  
 ubi tamen duplex exceptio apponitur, scilicet, si posterius testamentum sit militare;  
 vel, si in eo haeres, alias ab intestato ve-  
 niens, institutus fuisset; tunc enim rum-  
 peretur prius testamentum, dummodo po-  
 sterius coram quinque testibus erectum  
 fuisset, juxta l. 21. §. 3. *C. de testam.* De te-  
 stamento parentum inter liberos etiam Ju-  
 re Novellæ 107. constitutum est, quod  
 non rumpatur, nisi per aliud testamentum  
 coram septem testibus legitimè confe-  
 sum.

*Punctum III. Quid sit testamentum irritari,  
 & quomodo fiat?*

280. RESOL. I. *Testamentum irritari* dicitur,  
 quando post conditum testamentum aliqua  
 mutatio statūs ex parte testatoris contingit,  
 ob quam Jura volunt illud reddi irritum.  
 Licet enim testamenta, ex quocunque ca-  
 pite nulla, dicantur irrita, tamen placuit  
 Juris Compilatoribus singulas testamenti  
 infirmationes etiam appellationibus distin-  
 guere, ut dicitur §. 5. *Instit. quib. mod. testam.*  
*infirm.*

281. RESOL. II. *Testamentum tunc præci-  
 puè irritatur*, quando testatus subit aliquam  
 mutationem statūs, seu, ut Jura loquuntur,  
*capitis diminutionem*; quæ triplex est, *Maxi-  
 ma, Media, & Minima*: prima est amissio li-  
 ber-

bertatis, altera civitatis, tertia juris proprii, ut dum quis prius sui juris, juri alterius subjicitur, v.g. per arrogationem. Patet ex §. 4. Inst. eod. An autem, si testator ante mortem pristinum statum recuperet, testamentum ejus reconvalescat, non expediti Juris est; Potiores dicunt reconvalescere, si testator passus sit maximam, vel medium capitis diminutionem, quam patiebatur invitus, nisi §. 6. Inst. eod. non autem, si minimam, in quam sponte se conjectit, nisi expressè declaraverit, se illo testamento velle decedere.

Punctum IV. Quid sit, & quomodo continet, *destitui* testamentum?

RESOL. *Testamentum* *destitui* cunc dici-<sup>282</sup> tur, quando nullus ex eo hæres existit, vel quia non vult, vel quia non potest, utpote vivo adhuc testatore, vel saltem ante aditam hæreditatem defunctus, aut à conditione, sub qua hæres institutus est, quacunque ex causa deficiens. Ità clarè §. 2. *Inst.* *Quibus modis* &c. Quid autem sit de hærede, ante aditam, sed non repudiatam hæreditatem intra annum deliberationis moriente, jam dixi num. 226.

Punctum V. Quid sit, & cui competat *Querela inofficiosi* *testamenti*?

RESOL. I. Querela inofficiosi est re-<sup>283</sup>; medium Juris, quò injustè præteritus, aut

R

ex-

exhæredatus petit testamentum rescindi, sibique & aliis ab intestato venientibus hæreditatem restitui. Colligitur ex princ. Inst. de inoffic. test.

**284**    RESOL. II. Ista querela competit omnibus, & solis, quibus ex Juris dispositione debetur legitima portio, de quibus cap. præced. §. 1. Puncto 3. per totum. Ita quidem DD. communiter, sed non caret difficultate; nam saltèm Descendentibus præteritis, & omnino non, aut non justè exhæredatis, testamentum est ipso Jure nullum; querela inofficiosi autem supponit testamentum priùs validum, & solùm officiò Judicis rescindibile. Credendum itaque, querelam inofficiosi tunc solummodo liberis præteritis servire, quando in foro externo dubium est de justitia præteritionis, aut exhæredationis, & ideo testamentum adhuc supponitur validum; licet, dum de injustitia exhæredationis constat, eisdem alia actio ad testamentum dicendum nullum concedatur, & quidem durans 30. annis, ubi altera solis quinque terminatur.

**285**    RESOL. III. An, si filius carens liberis, omisso parente, instituit hæredem extraneum in suis bonis quasi castrensisbus, parenti omisso competat querela inofficiosi contra testamentum filii, magna est inter DD. dissensio, & affirmativam tenent Ju-

lius

lius Clarus, Covarruvias, multisque aliis citatis, P. Schmier cit. lib. 3. tr. 4. p. 1. c. 1. num. 539. ubi in facti contingentia ita unanimiter ab Inclita Facultate Juridica Salzburgensi decisum fuisse refert. Verum contrariam sententiam multò communiorē, & melius fundatam asserit P. Haunold tr. 6. num. 624. Sed forte hæ sententiæ concilia-ri possent, dicendō, esse locum illi querelæ, si filius jam sit paterfamilias effectus, seu emancipatus (cujusmodi ex universali Germaniæ consuetudine censentur omnes, separatam à suo patre œconomiam, & familiam habentes) non autem, si filius testator adhuc sit filiusfamilias respectu ascen- dentis præteriti. Sic enim expressè vide- tur decisum in l. ult. s. 1. C. de inoff. testam. ubi Imperator testamenta, de peculio qua- si castrensi facta, eximit à querela inoffi- ciosi, donec in sacris parentum suorum constitu- ti sunt hi, qui quasi castrense peculium possident; si enim sui juris efficiuntur, procul dubio est, eo- rum testamenta, & pro ipsis rebus, quas antea ex quasi castrensi peculio habebant, posse de in- officioso querelam sustinere. Et additur ratio elegans: cum neque nomen peculii permanet, sed aliis rebus confunditur, & similem formam recipit, quemadmodum & ceteræ res eorum, que in unum congregantur ex omnibus patrimonium. Scio difficultatem moveri posse ex Novell.

115. generaliter pronuntiante, quod non  
liceat filio in iis bonis, in quibus testan-  
di licentiam habet, parentes suos præteri-  
re. Verum, quia haec Novella non expli-  
cat, an de filio emancipato, an vero de  
omni loquatur, juxta sensum legis ante-  
rioris, clarè solum filium emancipatum hanc  
querelâ stringentis, intelligenda est, ut  
sic Jurium correctio melius  
evitetur.



DI-